

# MILIMO OYO EZALI NA BOLOKO SIKAWA



Matondi. Togumba mitó mwa moke.

Tata na Likoló, tozongisi matondi epai na Yo, lelo, mpo na litomba oyo ya kosangana elongo mbala moko lisusu, koyeba ete mokolo moko tokosangana mpo na mbala na biso ya nsuka, lokola bato na bowei, na nsima tokosangana na lolenge ya nkembo elongo ná Yo, ná basíkolami nyonso, ya bileko nyonso, bakosangana kuna.

<sup>2</sup> Oh, mitema na biso ezali kobeta makasi, na . . . mpe na lúkulúku, kozeláká ngonga yango kokóma! Ná yango, bobangi nyonso esili biso. Tozali na eloko ya kobanga te, eloko te ya koyoka nsomo. Tozali kotalela elaká oyo Nzambe ya Seko asili kopésá biso, mpe toyebi ete ezali Solo. Yango nde ntina oyo tozali na bomoi. Tozali na bomoi mpo na yango, na ngonga yango, ntango yango, ntango nzoto-ya-kufa oyo ekobongwana, mpe tokókóma lokola Ye, mpe bokono ekozala lisusu te, mpasi ekozala lisusu te, motéma mpasi ekozala lisusu te. Oh, nyonso wana ekosila na ntango yango. Mpe na esengo na motema, biso, na kondima mpe mpiko, tozali kotalela Mokolo wana.

<sup>3</sup> Yango wana tosangani awa lelo, Nkolo, mpo na koyambola mabe na biso mpe kosenga mawa. Yango wana toyebi liboso na etumbelo oyo na ntongo oyo, mpo toyebi ete tozali bato-na-kufa, tozali mpe na mabunga mingi kati na biso, mpe totóndi na mabe. Kasi toyebi mpo na koyambola mabúnga na biso, na nsima kotalela Tata na biso ya Likoló na mitema mifungwámi, mpo na mapamboli, ná makasi ya sika ná kondima, oyo Ye akopesa biso na ngonga oyo, wana tosangani awa kokokana na elaka, “na bisika ya Likoló kati na Klisto Yesu.” Mpamba te tolobaka ete tosílí kolongwa na kufa mpe tokómi na Bomoi, na nzela na elaka na Ye, mpe tonétolami kati na loyengé ya Likoló, wana tofandi elongo ná Ye sikawa. Tika ete Áteya biso, na ntongo oyo, makambo oyo Alingi ete biso tóyeba, mpe pesa biso Lipa ya Bomoi, mpo tókoka kozua makasi mpo na mikolo oyo ezali liboso na biso. Kokisa yango, Nkolo. Yango nde libondeli na biso, oyo toseni na Nkomo na Yesu Klisto. Amen.

Bokoki kofanda.

<sup>4</sup> Mbote na moto nyonso. Ezali malamú mingi ya kosangana lisusu awa elongo ná bino na ntongo oyo, kati na loyengé ya Likoló ya kosambela.

<sup>5</sup> Naye mwa moke nsima na ntango, tozalaki na . . . babengaki biso mpo na makambo ya mpasi, ya mpasi mpenza, eleki miniti

moke; mwana mobali moko alalaki kuna, kobundáká na liwa. Mpe na bosolo mpenza lokola natelempi awa, Nkolo asimbaki nzoto na ye mpe atelemisaki ye. Boye . . .

<sup>6</sup> Mpe mwa—mwa—mwana mobali moko azali awa, azali mwana ya cousin na ngai. Bazalaki mpenza Bakatoliko, mpo na kobanda, kasi bakendeki na mísa na ntongo oyo, mpe eloko moko eyebisaki bango ete báya awa. Na bongo bango . . . Mbongwana moko esalemi. Boye, bazali—bazali sikawa koya na ndako, mpe komilengela mpo na libatizi na mai. Na bongo, ezali na—ezali na . . . makambo ya kokamwa mpenza, oyo Nkolo na biso asalaka ntango nyonso. Azosalaka ntango nyonso makambo. Bayaki mpo na kokota, kasi bakokaki kokota te. Balobaki ete bazuaki nzela ya kokota te.

<sup>7</sup> Nalobaki: “Ee, bolingi kosolola na ngai,” mpe nalobaki, “ee, boya kaka na ndako, mpe tokosolola makambo yango, kuna.”

<sup>8</sup> Boye namilobelaki, wana nákokende na New York sikawa, na liyangani oyo ezali koya, ete ekozala mpenza malamú . . . Nayebi ete nakozua makasi ya sika kolekela awa mpe—mpe koyeisa lisusu móto na ngai mwa makasi uta na móto na bino nyonso, mpe totelemi awa, na ntongo oyo, mpo na mokolo moko. Tokómaki lobi, liboso na lobi, na midí.

<sup>9</sup> Na nsima nde tosengeli kokende. Nalingaki kokende, nsima ya nzánga oyo, kasi nakanisi nakokende . . . Tokolongwa na ntongo, na ntongo-ntongo, na ntongo-ntongo mpenza . . . Tokoki kokutana na néige na bazela, ná makambo mosusu, katikati ya awa ná New York. Tosengeli koleka na Virginie, na bangomba, tokoleka mpe na Alleghenys, mpen kaka nsima na ngambo ya nsé ya—ya Adirondack.

<sup>10</sup> Boye tokobanda na, nabosani, ezali stade oyo kuna, ya sika. Babukaki stade ya kala ya Saint Nicholas, ndenge nayoki. Batongakí moko oyo ya sika. Mpe na boyebi na ngai, biso nde tokozua bampokwa ya liboso, oyo etikali . . . oyo esili kopesama. Boye, tozongisi matondi mpo na yango, mpo na ba-Pantekotiste ya engumba monene ya New-York. Nakanisi mangomba mingi ezali na boyokani, mpe tozolikia kolekisa ntango moko ya malamú mpenza.

<sup>11</sup> Mpe tokozonga, soki Nkolo alingi, na mpóso oyo ekoya. Mpe—mpe soki ezali mokano na Nzambe, boye, tozali kolikia ete tokosengela kotelema awa mokolo ya Lomingo, na mposo ekolanda, mpo na—mpo na liyangani ya Lomingo na ntongo.

<sup>12</sup> Na bongo nalekeli lisusu mokengeli na biso, ndenge nasalaka ntango nyonso, bomoni, mpe—mpe, namilobelaki, ntango mosusu, soki naye, mpe ata naséngaki nzela te. Na bongo, lokola ezali na lisanga moko malamú awa, ná bato oyo namoni ete bauti libanda na engumba oyo, bazali awa; namilobelaki ntango mosusu, na mpokwa ya lelo, soki mokengeli azali na liteya mpenza te, ete ekozala, tokosala liyangani moko

ya moke na mpokwa, ya mokuse mpenza, mpe, ee, ntango mosusu tokobondela mpo na babeli. [Losambo elobi: “Amen.”—Mok.] Matondi.

<sup>13</sup> Tozali kolikia ete tokobondela mpo na babeli na mpokwa ya lelo, kolobela lobiko na nzoto uta na Nzambe mpe—mpe kobondela mpo na babeli. Tokobanda na ntango malamumu mpo tókoka kobima na ntango malamumu. Mpe soki mokengeli akolinga, ngonga. . . Na momesano bobandaka na ngonga ya nsambo na ndambo. Boye te? Bongo soki tobandi na ngonga ya nsambo na mpokwa, na ngonga ya nsambo? [Ndeko Neville alobi: “Amen.”—Mok.] Mpe ngai nakomata na ngonga ya nsambo na ndambo, ekosala ete násilisa na ngonga ya mwambe to ya mwambe na ndambo, na bongo, ekopesa bato ntango ya—ya kozonga, soki ezali—ezali ma—mabe te. Bato nyonso baseki ntango na—ntango nalobi ngonga ya mwambe, to ya mwambe na ndambo. Na—na—nabanzi ete nakoki kosilisa na ntango yango. Kobondela mpo na babeli, boyebi, toyebaka ata moke te.

<sup>14</sup> Boye, tolekisaki nta—ntango moko malamumu kobanda ntango totikaki bino na ebandeli ya Automne oyo, mpe Nkolo apambolaki biso na makambo minene mingi. Yango. . . Mpe na mpokwa ya lelo, soki Nkolo alingi, nalingi kolobela bino na ntina na bokutani ya nsuka nazwaki kouta na Nzambe, na Colorado, eleki mwa bampóso. Mpe yango nde likambo oyo nakanisaki ete nakoyebisa bino sikawa, ntango mosusu ekopesa mpiko na kondima, mpo tólekisa liyangani malamumu na mabondeli ya babeli na mpokwa, mpo na babeli ná bato na mpasi.

<sup>15</sup> Sikawa, na ntongo oyo, mpo na kokóta mbala moko na liteya, na. . . Likambo moko esimbaki motema na ngai, eleki pene na sanza moko. Mpe ekoki kozala, sikawa, nakanisi baza. . . Bazali kotia yango na bande? Bazali kotia yango na bande? Iyo. Malamumu. Mpo náyeba esika oyo, soki bande yango ekopesama na bato mosusu. Nakoki koloba te ete makambo oyo nakoloba na ntongo oyo. . . Nakoki koloba te ete e—e—ezali. . . Nayebi ezali solo, bomoni, eteni ya Nsango ekozala solo. Kasi likambo oyo nalingi kosala, ezali motuna na makanisi na ngai. Ezali komonana mpenza likambo ya solo. Ata bongo, kobanda ntango nakómaki awa, mpe ntango na. . . emonisamelaki ngai, nazalaki kobanga mingi ete náloba likambo oyo elongobani te mpe nátika bato na likanisi moko ya mabe. Mpe ezali. . . Mpe ngai. . .

<sup>16</sup> Makambo oyo nasiláki kokoma, na oyo nalingaki koloba, nakataki eteni na yango, mpo nákomisa yango makasi mingi koleka te. Mpamba te, bomoni, soki—soki moto. . . Na—nalingaka Nkolo Nzambe, mpe, nzela bobele moko nayebi ete nalingaka Ye, ezali mpo nalingaka bino. Bomoni? Yango nde nzela bobele moko oyo nayebaka. Ata bongo, na—nalingi kozala na likambo moko te oyo emonisamelaki ngai, na bongo náyebisa bino yango te, soki esengeli koyebisa bino. Mpe lisusu, nabángaka ete soki nalobi likambo moko mwa makasi koleka,

ekoki kosala moto moko mpasi. Mpe, boyebi, ezali . . . Osengeli kaka, tóloba, koyá na eteyelo, mpe koyoka kokambama mpo na koloba likambo oyo olingi koloba. Esili. Na bongo, ntango mosusu, okoki koloba likambo moko, mpe moto moko akozua . . . akozua yango ndenge mosusu, mpe bakokima na ngámbo wana; na nsima, moto mosusu akoloba: “Oh, ezali nde *oyo*,” bomoni.

<sup>17</sup> Kasi nalingi ete bóyeba ete oyo nalingi koloba ezali kaka kokanisela mpe liloba oyo *kokanisela* elingi koloba “komikotisa na likambo kozanga koyeba mpenza.” Boye, nazali . . . na—nalobi te ete ezali solo, kasi ezali kaka likanisi moko ya moke, oyo nakoki kolobela bino, mpo bókoka kopima yango mpe koyeba eloko nini bozali kokanisa na ntina na yango. Mpe na nsima, ekozala, na ntembe te, eko—ekouta na Makomi, mpo nakolinga te koteya eloko moko te . . .

<sup>18</sup> Kasi ngonga yango ekoki? Likambo yango esili kokóma na ngonga oyo, mpe makambo oyo elingaki nde koloba yango? Nabondeli, ná oyo nyonso ezali kati na ngai, ete ézala bongo te. Bomoni? Nabondeli ete ézala bongo te, ete ézala ngonga yango te. Ekosalema, kasi ntango yango esili nde kokóma? Bomoni, yango nde eloko oyo nazali komituna. Sikawa, bato nyonso basosoli mpenza, ete nayebi yango te? Ngai . . . Ntango yango nde yango oyo? Soki ezali bongo, Nzambe áyokela biso mawa. Kasi, soki ntango yango ekoki naino te, tika ete . . . ekoya.

<sup>19</sup> Sikawa, na ntango nyonso oyo tokokoka, tozali na mobembo molai liboso na biso, soki Nkolo alingi. Mpe nasengeli kokende na mikili mosusu, kaka nsima na Nowéle, na Europe mpe na Asie; koleka mingi na Europa. Na nsima, nakozonga awa na États-Unis, mpo na mwa mayangani, na nsima nakozonga na Afrika ya Sudi. Nakobanda na mokolo ya mibale na—na sanza ya Libwa, na Durban, mpe nakobanda mokolo ya mibale, nakanisi, kino pene na mokolo ya zomi, na nsima nakozua mikolo misato mpo na kolongwa wana kino Johannesburg, mpe nakobanda lisusu. Kasi nakanisi ete, na sanza ya Minei nde tokobanda na bikólo ya Scandinavie, na Norvège, na Suède mpe—mpe na Finlande, mpe—mpe na Hollande, na Suisse, na Allemagne, mpe—mpe na bikólo mingi ya Europe kuna. Boye, bózala kati na mabondeli mpo na biso.

<sup>20</sup> Tozali na mwa mayangani awa, na eleko ya Nowéle, kaka nsima na Nowéle. Kutu, tolingi kozala awa, epai na biso, na eleko ya Nowéle. Bana bazali na mposa ya koya awa, epai na biso, na eleko ya Nowéle. To—tolingaka Arizona, kasi boyebi, e—eloko oyo tokanisaka, oyo tozokoka kaka kobosana te, ezali ndako-a-nzambe oyo ná bino. Ata tokei wapi, ata tosali nini, ezali . . . Bana, ngai, mwasi na ngai, biso nyonso. Esika lokola oyo ezali te. Ezali solo. Esika moko ezali te.

<sup>21</sup> Natámboólá mokili mobimba mpe na—nakendé bisika ndenge na ndenge, kasi esika moko te, mpo na ngai, ezali bulee lokola

mwa esika moke oyo awa. Yango nde. Meká kaka kokende mosika na yango mokolo moko, soki olingi koyeba yango. Ezalaka na eloko moko na ntina na awa. Natéyá na mokili mobimba, tóloba, kasi natikálá te, mbala moko te, na esika moko te, ata koyóka Molimo ya Nzambe, ná bonsomi mpe nyonso wana, ndenge nayokaka yango ntango nazalaka awa. Oyo nde yango.

<sup>22</sup> “Nzambe, tika ete . . .” Lokola mokolo oyo natiaki libanga ya litúmu kuna, nalobaki: “Nkolo Nzambe, kotika te ete ékweya.”

Bato balobaki: “Nsima na sánzá mibale, ekokóma garage.”

<sup>23</sup> Nalobaki: “Kotika te ete ékweya, Nkolo. Tika ete ékoba kotelema, mpe bato, awa, bázala kokumisáká Yo, ntango Yesu akozonga.” Nazali kolikia ete ekosalema bongo.

<sup>24</sup> Sikawa, tofungola Biblia sikawa, mpe—mpe tozolikia ete Nkolo akopesa biso mapamboli na Ye. Mpe tolingi kotánga mwa Makomi. Nazali na mwa Makomi nakomaki awa, oyo nalingi kotalela, mpe mwa makomá. Nalingi kotánga na bisika misato na Biblia, mpe nakopesa bino yango liboso. Nalingi kotánga na Yuda 5 mpe 6. Yuda ezali kaka Buku moko, boyebi. Na nsima nalingi kotánga Petelo ya Mibale, mokapo ya 2, eteni ya 4 mpe 5. Na nsima nalingi kotánga Petelo ya Liboso 3:18 kino 20.

<sup>25</sup> Mpe motó ya liteya na ngai na ntongo oyo, soki Nkolo alingi, ezali: *Milimo Oyo Ezali Na Boloko Sikawa*. Iyo. *Milimo Oyo Ezali Na Boloko Sikawa*, ekangámá, ekweisámá mpo na libela. Ata moke te, makoki ya kobikisama ezali ata moke te, bomoni, milimo oyo ekangámá na boloko sikawa.

<sup>26</sup> Sikawa tótánga liboso na Buku ya Yuda. Nabanzi nakomaki awa, litánga ya liboso, Yuda; na nsima Petelo ya Mibale, mpe na nsima—nsima Petelo ya Liboso. Sikawa, Yuda, nalingaki kotánga mobimba na yango; kasi mpo na kowela ntango, mpo ngonga ya zomi na ndambo esili kobeta, nakobanda na molongo ya 5. Sikawa, Yuda azalaki ndeko, ndeko ya Yesu Klisto kati na nzoto, ndenge biso nyonso toyebi. Bomoni? Azalaki mwana ya Yosefe.

*Nalingi kokanisela bino, ata bosili koyeba makambo oyo mbala moko mpo na libela, ete Nkolo abikisaki bato na mokili ya Ejípito, nde na nsima abomaki baoyo bandimaki te.*

<sup>27</sup> Abikisaki bango, liboso, Abimisaki bango na Ezipito, bongo na nsima Asengelaki koboma bango, mpo bakóbaki ná nsango na bango te, bomoni.

*Na banje oyo babatelaki motindo na bango na liboso te kasi batikaki ejaleli na bango moko mpenja, ye asili kobátela bango na bongwana ya se- . . . minyololo ya seko na kati ya molili kino kosambisama na mokolo yango monene.*

<sup>28</sup> Banje oyo, na ntango moko, bazaláká na Likoló, kasi babátelaki motindo na bango te mpe lolenge oyo bazalaki na

yango, bakweyaki, mpe sikawa bakangami na minyololo ya Seko na molili, minyololo ya bileko na bileko na molili, babatelami na lolenge oyo kino na Kosambisama ya Mokolo monene, ntango bakosambisama ná bazangi kondima nyonso.

<sup>29</sup> Sikawa na Petelo ya Mibale, mokapo ya 2, kobanda na molongo ya 4, ezali kaka buku moko to mibale nsima na yango, bomoni.

*Mpo soki Nzambe atikaki banje te oyo basumukaki, kasi abwakaki bango na lifelo, atiaki bango na mabulu ya molili tuu, ete bábatelama mpo na kosamba;*

*Mpe atikaki mokili ya kalakala te, kasi abatelaki Noa, ná bato mwambe, mosakoli ya boyengebene, wana ayeisaki mpela na mokili likoló na batioli;*

<sup>30</sup> Abatelaki Banje te; akangaki bango na miniololo ya molili tuu, mpe akweisaki mokili mobimba na kobebisama, ya—ya Noa.

<sup>31</sup> Sikawa na Petelo ya Liboso, mokapo ya 1 mpe mo . . . Petelo ya Liboso, mokapo ya 3, mpe kobanda na molongo ya 18, totángi lisusu. Sikawa, býoka na bokebi sikawa.

*Mpamba te, Klisto asili kokufa mpo na masumu mbala moko mpo na libela, ye moyengebene mpo na bazángi-boyengebene, mpo ákoka komema biso epai ya Nzambe, abomamaki na nzoto, kasi azongisamaki na bomoi na Molimo: . . . abomamaki na nzoto, kasi azongisamaki na bomoi na Molimo:*

*Na yango mpe akendeki kosakwela milimo na boloko; ateyaki bato yango na boloko;*

*Bango kalakala batosaki te, wana ejilaki Nzambe na motema molai ya Nzambe ntango na mikolo na Noa, wana masuwa ejalaki ebei kotongama, oyo na kati na yango bato moke, elingi koloba, milimo mwambe, babikaki na mai.*

*. . . yango ezali elembo ya libatisa oyo ezali kobikisa biso sikawa, (ezali te kolongolama ya mbindo ya nzoto, kasi eyano ya lisosoli malamú epai na Nzambe,) na nzela na lisekwa ya Yesu Klisto:*

*Ye azali na loboko na Nzambe na mobali, wana akendeki na likoló; banje mpe makonzi mpe banguya nyonso batiamaki na nsé ya bokonzi na ye.*

Tóbondela lisusu.

<sup>32</sup> Sikawa, Tata na Likoló, ko—kolandana ya Makomi yango oyo awa, batatoli misato, bisika misato kati na Makomi ékopesáká litatoli. Mpe Yo olobaki na Liloba na Yo, ete: “Na monoko ya batatoli mibale to misato, makambo nyonso makokatama.” Sikawa, nabondeli Yo, E Nzambe, ete Óya mpembeni na bato mpe ólimbola Liloba oyo, Nsango oyo, na pole

oyo esengeli kozala kati na yango, mpo mobali, mwasi, elenge mobali, to elenge mwasi nyonso, ákoka kososola, kokokana na makoki oyo Osilá kobongísa mpo na bango, mpe sikawa, toyebi ete matatoli misato oyo ezali kotalisa Solo.

<sup>33</sup> Mpe nabondeli ete Ótinda Molimo Mosanto likoló na biso sikawa. Mpe biso tokotalela Ye Oyo azali Mokonzi na biso, katikati na biso na ntongo oyo, Nkolo Yesu Klisto; esika oyo tosili komata sikawa, na kondima, wana tofandi na bisika ya Likoló kati na Ye. Tozali kozela Nsango na Ye. Lobá yango na nzela na biso, Nkolo, yoka yango na nzela na biso, wana tosengi na Yo ete ókata ngenga ya bibebu oyo ekoloba ná matoi oyo ekoyoka, mpo ékoka kozala mpo na nkembo mpe lokumu na Ye Oyo azali Makomi. Mpo tosengei yango na Nkombo na Ye. Amen.

<sup>34</sup> Sikawa, bóbosana mayangani ya mpokwa te, liyangani ya kobondela mpo na babeli. Namoni ete ekozala na ntina te ya kokabola ba-kálati ya mabondeli, na bongo, tokobondela kaka mpo na babeli. Nazali na likambo moko oyo nalingi koyebisa bino, mpe na—nazali kolikia ete ekomema mpenza losambo na esika oyo bato bakobikisama na bokono ndenge na ndenge. Nayebi ete ekosalema, soki tondimi yango ndenge wana.

<sup>35</sup> Sikawa likambo oyo, milimo sikawa na boloko, milimo oyo ezali sikawa na boloko!

<sup>36</sup> Sikawa, elimo ya moto ezali nzoto ya moto te, ezali elimo. Bomoni? Mpe elimo ezali eloko moko oyo ezali lo—lolenge ya molimo. Na bongo, ntango lolenge ya moto. . . Ntango alobaki: “Tosilí kokúfa,” Makomi eyebisi biso polele ete “tosilí kokúfa, mpe bomoi na biso ebómbámí kati na Nzambe na nzela na Klisto, etiámí elemba kuna na nzela ya Molimo Mosanto.” Sikawa, ezalaki te ete nzoto na yo ekufaki; ezalaki te ete molimo na yo ekufaki. Lolenge ya molimo na yo nde ekufaki; bomoni, lolenge, elingi koloba molimo. Lolenge ya elimo na yo ezali—ezali Nzambe, soki obotami mbala mibale. Soki te, ezali ya mokili. Eloko nyonso oyo ebandaka esengeli kosuka, boye na yango, nzela kaka moko oyo okoki kozala na Bomoi na Seko ezali kozala na Bomoi oyo ebandá ata moke te. Na bongo, bomoi na yo ebandáki ntango obótamaki, ntango Nzambe apémaki mpema ya bomoi na zólo na yo, mpe okómaki molimo-na-bomoi, bongo, na ntango yango nde obandaki. Kasi ntango yo. . .

<sup>37</sup> Lolenge oyo ezalaki kati na yo, na lolenge yango, ozalaki moto ya mokili, mopaya epai na Nzambe, ozalaki mpenza nyama. Ya solo mpenza. Moto nyonso ayebi ete biso tozali ba-mammifère. Bato boni bayebi yango? Bisu, tozali ba-mammifère, tozali banyama ya-makila-ya-móto, kasi yango nde oyo tozali, na kokelama na biso na mokili. Kasi, bomoni, eloko oyo ezali kokesenisa biso ná ba-mammifère mosusu ezali ete—ete Nzambe atiáki molimo kati na biso. Bomoni? Sikawa, ba-mammifère mosusu bazali na ntina ya kolata bilamba te. Nyama mosusu ata

moko te azali na ntina ya kolata bilamba mpo na kobómba nsóni na ye, kaka biso. Kaka biso nde tolataka bilamba, mpo tozali na molimo. Kasi, bomoni, Nzambe, na ebandeli, ayebaki oyo moto akozala. Mpe Akelaki mokili, mpe azalisaki banyama ndenge na ndenge, kobanda oyo ya nsé koleka kino na oyo ya likoló koleka; mpe nyama ya likoló koleka oyo ayaki, ezalaki moto.

<sup>38</sup> Na nsima, liboso, ntango moto asalemaki, azalaki moto molimo, na elilingi ya Nzambe.

<sup>39</sup> Elingi koloba “Nzambe azali Molimo,” Santu Yoane 4. Sikawa: “Azali mo—Molimo. Mpe baoyo basambelaka Ye, basambelaka Ye na Molimo mpe na Solo. Mpe Liloba na Yo ezali Solo.” Sikawa, tosambelaka Ye na Molimo mpe na Solo. Azali e—Ezàli-Molimo.

<sup>40</sup> Na bongo moto azalaki te mpo na kotímola mabelé, na bongo Nzambe asalaki moto na mputulú ya mabelé.

<sup>41</sup> Na nsima Azuaki longwa na mopanzi na ye, eloko kouta na yango, mopanzi moko; pe, uta na yango, akabolaki moto oyo azalaki na lolenge mibale, oyo ezalaki na bomwasi ná bobali. Mpe Alongolaki bomwasi, mpo ezalaki bolingo, mpe Atiaki yango kati na moto oyo abengamaki Eva, oyo Adama abengaki Eva, oyo azalaki mwasi na ye. Kuna nde esika oyo bolingo na ye, ya bomoto, bolingo phileo, ekangamaki na mwasi na ye. Lolenge wana nde mobali asengeli kozala lelo, mpe mwasi epai ya mobali na ye mobali. Mobali, bobali; mwasi, bomwasi.

<sup>42</sup> Na nsima, bomoni, nsima na Ye kosala moto na elilingi na Ye Moko, “Akelaki bango, mobali mpe mwasi,” moto azalaki te mpo na kotimola mabelé. Mpe Atiaki ye na mputulú ya mabelé, na yango akómaki . . . azalaki moto yango. Moto oyo, na bomoto azalaki mammifère, bomoni, azalaki nyama; kasi Atiaki molimo oyo ya Nzambe, bomoi, na kati na ye, mpe asalaki ye na lolenge ete ákoka kopona. Na nsima, ntango moto yango . . .

<sup>43</sup> Sikawa tokanisaka ete tozali na eloko moko. Bómikanisela naino, tozali eloko nini? Libóké ya mputulú. Esili wana. “Mpe, lokola ozali mputulú, okozonga na mputulú.” Boye, soki omoni moto oyo azotambola na balabala, mpe azokanisa ete azali na motuya, boyebi, mpo atángá mwa moke ná nyonso wana, bómikanisela, ezali libóké ya mputulú ya Indiana. Esili wana. Mpe mwasi oyo alati mpenza kupé, mpe azomeláká makaya mpe kosala bisalela na balabala, kodendáká lokola ekólo mobimba ezalaki ya ye, ezali libóké ya mputulú ya Indiana, mpe akozonga na mputulú. Boye, ozali na yo ata na motuya te mpo na kobanda, bomoni. Na bongo, ezali solo, wana nde oyo ozali.

<sup>44</sup> Kasi, elimo oyo ezali na kati kuna, bomoni, elimo wana nde eloko oyo Nzambe asálelaka, bomoni. Soki Akoki bobele kozua lolenge wana, molimo wana, ézala na boyokani ná Ye, ntango wana lolenge yango ekufi, lolenge mpe bolingo ya mokili ekufi, mpe makambo ya mokili ekufi. Bomoni? Mpamba te “Soki olingi



mokili, to makambo ya mokili, bolingo ya Nzambe ezali kati na yo te.” Bomoni? Moto asengeli kobotama mbala mibale. Boye, lolenge wana esengeli kokufa, mpo lolenge ya Nzambe ekoya kofanda kati na yo. Mpe Nzambe azali eloko bobele moko oyo ebandá ata moke te mpe ekosuka ata moke te.

<sup>45</sup> Boye, yango wana, Ye amiyánganisaki, bomoni, mpe azuaki moto oyo, ya mokili, ná Molimo ya Seko, mpe asangisaki yango. Mpamba te, Nzambe amitalisaki Ye moko na kati na yango, mpo Akómaki Moto ntango Akómaki Klisto Yesu, mpe Azalaki Nzambe, bomoni. Nzambe azalaki kati na Klisto; mpo, bomoni, afandaki kati na Ye, mpo na kozongisa mokili na boyokani ná Ye moko. Mpe, na nzela na Moto oyo abongi be, moko na moko na biso ná kozanga kobonga be, oyo andimeli Nzambe mpe asili kondima Yango, akomi bobongi be na Ye.

<sup>46</sup> Mpe Atikalá te kotika nzoto na Ye komona kopola, mpe Atikaki elimo na Ye na ewelo te, kasi Asekwisaki Ye mokolo ya misato, mpe Azali na bomoi bileko na bileko. Mpe tokozala na nzoto lokola oyo ya Ye Moko ya nkembo.

<sup>47</sup> Yango wana tozuaka libatisi na Nkombo na Ye, mpo tókoka kobima na Nkombo na Ye, na kufa na Ye, na lisekwa na Ye, ete tosekwi, kotatoláká na mokili ete tozali na Bomoi ya sika, ete moto ya kala asili kokufa. Tokundá lolenge wana ya liboso. Bomoni? Lolenge wana ya liboso esili kolímwa, mpe sikawa tokómi na lolenge na Ye. Azali na bomoi kati na biso, mpe biso tosalaka mokano na biso moko te. Tosalaka mokano na Ye. Tokanisaka makanisi na biso moko te. Likanisi, likanisi ezali eloko oyo ekanisaka. Likanisi oyo ezalaki kati na Klisto Yesu ezali kati na mondimi nyonso. Bomoni, oyo wana—oyo wana nde ezali molimo, mpe yango nde eloko tozali kolobela. Sikawa, oyo wana nde eteni oyo nazali kokanisa sikawa, ete yango nde ezali na kati na biso, elimo.

<sup>48</sup> Sikawa, soki totali malamú, na likambo oyo, ezali na makambo mingi oyo esalemaka mbala mosusu, mpe tomitunaka mpo na nini esalemaka, totiaka ntembe biso moko, mpe totiaka bato mosusu ntembe. Kasi sukasuka, nsima na mwa ntango, tosolakaka ete, soki tozali Baklisto, makambo nyonso ekotambola malamú, na lolenge moko to mosusu. Bosílá kobikela yango. Baklisto nyonso babikelaka yango. Tomitunaka mpo na nini tosalaki bongo.

<sup>49</sup> Nazalaká komituna na ntango moko, ntango natángaká Biblia mbala ya liboso: “Mpo na nini Nzambe atikaki ete Abraham, moto monene wana, átelema wana mpe áloba ete Sara azalaki mwasi na ye te?” Mpe ndenge nini Atikaki ete ye átelema wana mpe ákosa mpo na yango, ná makambo oyo asalaki, mpe lisusu, ndenge nini Atikalá kotika ete Abraham átika mboka ya elaka, esika oyo Ayebisáká ye ete átika yango te. Moyuda nyonso oyo atikaka mboka ya elaka azali mozóngi-nsima, mpo Nzambe

apesaki bango yango mpe alobaki na bango ete báfanda kuna, bomoni, kasi batikaki yango. Boye, akendeki na Gelala. Kasi soki ézalaka mpo na yango te. . .

<sup>50</sup> Na bongo Abimeléke, mokonzi wana kuna na etuka ya Bafilistia, alingaki Sará mpe alingaki kobala ye, ye azalaki moto malamú, moyengebene. Ntango mosusu, nsima na ye ko. . . Ezali lokola likambo ezángá ntina, kasi ezali mpo na kotalisa bino yango polele mpenza. Ntango asilisaki kosukola na mpokwa, mpe alataki pijama na ye, abondelaki mpe akendeki kolala, Nkolo amonanaki epai na ye mpe alobaki: “Ozali mpenza lokola moto oyo asili kokufa,” kasi moto yango asalaki na ye ata eloko moko te. Bomoni? Bakosaki ye kokosa mpenza, na Abraham ná Sara. Ya solo. Alobaki: “Ozui mwasi ya mobali mosusu, omoni. Mpe Na—Nakoyoka mabondeli na yo te, ata obondeli ndenge nini. Ozali lokola moto oyo asili kokufa. Kasi mobali wana azali mosakoli na Ngai.” Bomoni?

<sup>51</sup> Bomoni, ezali mpasi mpo na kososola yango, bomoni. Kasi soki ezalaki bongo te, tolingaki koyeba te soki ngolu ezali nini.

<sup>52</sup> Mpo na nini akendeki kobálá Agar, na ntango oyo azalaki na mwasi kitoko lokola Sara? Mpe ye alingaki kosala yango te, bomoni, kasi Sara moto ayebisaki ye. Na nsima, Nkolo alobaki na ye: “Yoka oyo Sara ayebisi yo.” Mpo na nini? Ismael moko asengelaki kozala, “mpo mwasi moombo ná mwana na ye bakosangola elongo ná mwasi nsomi mpe mwana na ye te.” Bomoni oyo nalingi koloba?

<sup>53</sup> Makambo nyonso wana ezali bitaliseli. Mpo na nini mosakoli wana asengelaki kobala mwasi ya ndumba mpe kobota. . . elongo ná bana oyo, kobota ná ye bana mibale? Ezalaki elembo. Mpo na nini mosakoli moko asengelaki kolala na mopanzi moko ya mobali mikolo nkama misato na ntuku minei, na nsima alalaki lisusu mikolo mingi mpenza na mopanzi mosusu ndenge wana? Ezalaki elembo. Mosusu alongolaki bilamba na ye mpe atambolaki liboso na Yisraele. Mpe, sikawa, makambo nyonso wana, ezalaki bitaliseli mpe bililingi, bomoni; mpe tosengeli kozala na makambo yango, lokola bitaliseli.

<sup>54</sup> Mpe, mbala mingi, makambo ekómelaka biso, mpe tomitunaka mpo na nini esalemi. Ezali Nzambe nde azotalisáká biso likambo moko liboso.

<sup>55</sup> Sikawa, ntango nazalaki mwana moke, mpe boyebi lisolo ya bomoi na ngai, na—nandimá ntango nyonso, uta mbala ya liboso oyo nakoki komikanisela. . . Moko na makambo ya liboso oyo namikaniselaka. . . Sikawa likambo oyo, sikawa, ekoki kozala ete oyebisaki ngai likambo moko lobi, kasi lelo nabosani yango. Kasi ezali na makambo mosusu, ya kala, oyo esalemaki na bolenge na biso, mingi kati na biso tozalaka ndenge wana, makambo oyo tomikaniselaka yango ntango nyonso. Mpe likambo oyo ezoyokana lokola ezángá ntina koloba yango, kasi

nayebi lisusu ntango nazalaki konguluma, nalatá elamba moko ya molai. Ba-bebé, sikawa bayike kati na bino, baoyo ya mbula na ngai, bakomikanisela yango, ete bazalaki kolatisa ba-bebé bilamba ya milai mpenza. Mpe nazoyeba lisusu ete nazalaki konguluma, mpe kolongola neige na makolo ya nóko na ngai mpe nazalaki kolia yango, ntango akótati mpe atelemaki mpembeni na esika oyo batiaka móto.

<sup>56</sup> Na bongo likambo elandi oyo nazali koyeba lisusu, oyo esalemaki na bomoi na ngai, ezalaki emononeli, oyo ya liboso mpenza natikálá kozua, mpe Ayebisaki ngai ete nakofanda ntango molai ya bomoi na ngai mpembeni na engumba moko na nkombo New Albany. Mpe nazalaki bebé moke kuna na ngomba, ata monganga moko te azalaki, ntango nabotamaki. Mpe—mpe na—na. . . Boyebi, bango. . . nafandi awa pene na mibu ntuku mitano, awa mpenza; emononeli.

<sup>57</sup> Na bongo, nayebáká ntango nyonso ete Nzambe azalaka esika moko, mpe ntango nazalaki mwana moke, Alobaki na ngai ete “námela likáyá ata moke te, mpe námela masangá te, mpe nákotisa mbindo nzoto na ngai te,” elingi koloba kobika bomoi ya mbindo ná basi mpe nyonso wana. Nazaláká ntango nyonso kobanga yango, mpe nazalaki elenge mobali.

<sup>58</sup> Na bongo nakendeki bokila mokolo moko, yango ezalaka lokola bomoto ya mibale mpo na ngai, kolinga bokila. Nakendeki bokila elongo ná mwana mobali moko, Jim Poole, mwana moko malamumu. Nakanisi mwana na ye ya mobali ayáka na losambo awa, elenge Jim, libota moko ya bato malamumu. Nayebi libota Poole. Ngai ná Jimmy tozalaki kolála esika moko mpe kofanda esika moko, uta bolenge na biso na eteyelo. Tokeseni na sanza pene na motoba, na mbula. Mpe Jimmy atikaki bondóki na ye ébéta lisasi, mpe ezuaki ngai na makolo nyonso mibale, azalaki mpenza mpembeni na ngai, ná bondóki ya bokila. Bamemaki ngai na lopitalo, mpe, kuna, nazalaki ya kolala wana, kobunda na liwa, penicilline to eloko moko ezalaki te na mikolo wana. Mpe, sikawa, batiaki elamba moko ya ndembo na nsé na ngai, mpe nayebi ete na butu wana. . . Balingaki kosala ngai lipaso na ntongo oyo ekolanda.

<sup>59</sup> Bazuaki mpe basukolaki kaka mpota, mpe biteni minene ya misuni epanzanaki, mpe bazuaki sizó mpe bakataki yango, mpe esengelaki nákanga maboko ya moto moko. Mpe babengaki Frankie Eich, auti komiboma kala mingi te, basengelaki kosimba, kobenda maboko na ngai na makasi, mpo élongwa na maboko na ye, ntango—ntango basilisaki. Nazalaki koganga mpe kolela, mpe kokangama makasi boye, ntango bazalaki kokata eteni ya misuni wana na lokolo na ngai. Nazalaki na mibu zomi na minei, mwana moke mpenza.

<sup>60</sup> Na butu wana namekaki kozua mpongi, mpe bango. . . Nalamukaki, eloko moko epanzanaki. Mpe makila ezalaki wana,

pene na litre mibale, nabanzi, esilaki kobima uta na misisa wana. Bazalaki na . . . basalaki ngai radio, mpe balobaki ete lisasi yango elekaki mpenza mpembeni na mosisa ya monene, na ngámbo nyonso mibale, na lolenge ete soki épalolaka yango kaka moke, elingaki kokatana na biteni mibale, mpe nalingaki kobanda kobima makila. “Ee,” namilobelaki, “oyo nsuka na ngai.” Nakitisaki maboko na ngai *boye* mpe natombolaki yango, mpe makila ezalaki kotanga na maboko na ngai, naláláki na kati ya makila na ngai moko. Nabengaki, nabetaki ngonga. Infirmière ayaki, mpe apangusaki yango kaka na lisumé, mpo bakokaki kosala eloko moko te.

<sup>61</sup> Mpe na ntango oyo elandaki, na nsé ya bolembu nyonso wana, bazalaki kozongisa makila te, na mikolo wana, boyebi, boye ba—basalaki nga lipaso. Mpe bapesaki ngai éther. Mpe ntango na . . . Ether oyo ya kala, nabanzi bozoyeba yango lisusu, ezali anesthésie oyo ya kala. mpe na nsé ya mpongi ya éther wana, ntango nalamukaki, nalamukaki na mpongi ya éther nsima na ngonga mwambe. Bapesaki ngai yango mingi mpenza, bakanisaki ete nakokaki te . . . ete nakolamuka te. Bazalaki kokoka kolamusa ngai te.

<sup>62</sup> Nayebi lisusu ete Mme Roeder atelemaki na mopanzi na ngai, kuna na lopitalo. Nakobosanáká mwasi yango te. Ata eloko nini ekomi, nakokoka kobosana ye ata moke te. Azalaki naino elenge mwasi na ntango wana. Mobali na ye azalaki mokambi ya mosala awa na kompani ya mituka. Mpe na—nazoyeba lisusu ete azalaki ya kotelema na mopanzi na ngai, ye ná Mme Stewart. Kútu bango nde bafutaki mbongo ya lopitalo mpo na ngai. Ngai . . . Tozalaki ata na bilei ya kolia te, na ndako, bongo ndenge nini tokokaki kofuta mbongo ya lopitalo, ba-dollar nkama na nkama? Kasi ye mwasi yango, na nzela na lisanga ya lingomba na bango ná bato ya Ku Klux Klan, bafutelaki ngai mbongo ya lopitalo, lisanga ya Franc-maçon. Nakoki kobosana bango ata moke te. Bomoni? Ata basalaka nini, to eloko nini, nakokoba . . . ezali na eloko moko, mpe etíkálá na kati na ngai, bomoni, oyo basalaki mpo na ngai. Bafutaki mbongo yango na Docteur Reeder. Azali naino na bomoi, afandaka awa na Port Fulton, akoki kobetela bino lisolo yango.

<sup>63</sup> Ntango nalamukaki na mpongi ya éther wana, likambo moko ekómelaki ngai wana. Nandimaka ntango nyonso ete ezalaki emononeli. Mpamba te, nalembaki mingi, mpe na . . . Bakanisaki ete nalingaki kokufa. Azalaki kolela. Ntango nafungolaki miso, nakokaki kotala, nakokaki koyoka ye koloba, na nsima, nazongaki na mpongi, mpe nalamukaki, mbala mibale to misato. Na bongo namonaki emononeli. Na bongo nazalaki na . . .

<sup>64</sup> Pene na sanza nsambo koleka, nasengelaki kozonga mpo bálóngola mwa biteni ya masasi ná biteni ya bilamba ya bokila oyo ezalaki na mafuta, na makolo na ngai; monganga alongoláká yango te. Boye nazalaki na mbondo na makila, makolo nyonso

mibale evimbaki mpe ezongaki nsima, na nsé na ngai, mpe balingaki kokata ngai makolo nyonso mibale na loketo na ngai. Mpe ngai. . . nalobaki: “Te, bómata likoló mpe bókata yango *awa*.” Nakokaki koyikela yango mpiko te, bomoni. Na bongo, sukasuka, Docteur Reeder ná Docteur Pirtle, ya Louisville, basalaki lipaso yango, bafungolaki mpe balongolaki yango; mpe lelo oyo nazali na makolo ya malamau mpenza, na ngolu na Nzambe.

Kasi na kati ya—ya emononeli ya nsuka oyo namonaki. . .

<sup>65</sup> Emononeli ya liboso, ntango nalamukaki, na nsima, namemamaki. Nakanisaki ete nazalaki na lifelo, polele mpenza lokola. . .

<sup>66</sup> [Ndeko mobali moko alobi: “Limbisa ngai, misie.”—Mok.] Iyo. [“Mwasi moko auti kosézwawa awa, *kuna*.”] Malamau, moto moko átiela ye maboko, mpe ye. . . ntango mosusu esengeli komema ye na esika ya mopepe. Sikawa, moto oyo azali mpembeni na ye, tiéla ye maboko.

Tóbondela.

<sup>67</sup> Molingami Nkolo Yesu, tika ete ndeko na biso ya mwasi oyo azali na bokono na ntongo oyo, mpe auti kosézwawa na kati ya losambo, tika ete ngolu, makasi mpe nguya na Yo. . . batiéli ye maboko sikawa, ezali kotalisa Yo. Mpe Makomi elobi: “Bilembo oyo ekobila baoyo bakondima. Soki batiéli babeli maboko, bakobika.” Sikawa, tika ete ndeko na biso ya mwasi ábima na bokono yango, mpe ábika mpo na nkembo na Nzambe. Tosengi yango na Nkombo na Yesu Klisto, mpe totiki ye na maboko na Yo. Amen.

<sup>68</sup> Sikawa, bómema ye na esika ya mopepe. Mopepe e—ezali mpenza mpasi awa. Nakoki koyoka yango awa, molunge ezali mpenza, makasi mpenza. Ezali mpenza koyokisa lokola kosenzwa, awa na etumbelo. Nayokaki yango, mbala minei to mitano awa. Soki ezali na. . . kaka ntango akomiyoka mwa malamau, ee, bómema ye na esika oyo akoki kozua mopepe. Ezali malamau. Iyo. Bomoni, mopepe ezali mpenza mpasi awa, boyebi. Bato bakelaka, moko moko na biso, metre carré ebele ya bokono. Soki bozali na, soki moto moko azali na mai kuna, to eloko moko ya kotia likoló na ndeko mwasi. A—amiyoki malamau sikawa. Bomoni? Malamau. [Ndeko mobali moko alobi: “Tófungola bikuke, ata bongo, Ndeko Branham.”—Mok.] Iyo, ntango mosusu soki bofungoli bikuke, ntango mosusu, to ekokotisa mwa mopepe, oyo ekokoka mpenza, na lolenge moko boye, bomoni.

<sup>69</sup> Na bongo na ntango oyo, wana namonaki emononeli yango, mpe kokanisáká ete na—natikaki bomoi oyo mpo na kokota na minioko.

<sup>70</sup> Mpe nsima na sanza nsambo, awa na Lopitalo ya Clark County Memorial, nalekaki na lipaso ya mibale. Mpe na ntango

wana, ntango nalamukaki, nakanisaki ete nazalaki na Westi. Namonaki emononeli mosusu. Mpe ekulusu moko ya monene, ya wolo, ezalaki na likoló, mpe Nkembo ya Nkolo ezalaki kongenga uta na ekulusu yango. Mpe natelemaki, nasembolaki maboko *boye*, mpe Nkembo yango ezalaki kokita kino na ntólo na ngai. Mpe na . . . Emononeli yango etikaki ngai. Tata na ngai afandaki wana, azalaki kotala ngai, ntango emononeli yango eyaki.

<sup>71</sup> Nayokaka ntango nyonso, bino . . . Bato nyonso oyo bayebi ngai mibu nyonso oyo, bayebi ete nazalaka ntango nyonso na mposa ya kokende na Westi. Boyebi ndenge ezalaka. Ezalaka ntango nyonso na eloko moko na Westi. Kasi, mpo, mokolo moko, moyekoli-minzoto moko ayebisaki na ngai ndenge moko, ete nasengeli kokende na westi . . . Minzoto, ntango banzela na yango ekutanaka mpe bongo na bongo, nabótámá na nsé ya elembo yango, mpe nakotikáláká kolóngá na Esti te; nakosengela kokende na Westi. Mpe na mobu eleki, nakendeki na Westi, mpo na kokokisa mposa ya bomoi na ngai mobimba, bomoni, ya—ya kosala yango.

<sup>72</sup> Mpo na nini nazali kuna? Ezali likambo ezángá ntina mpenza. Nafandi kuna na lisobe, nazali kofutela ndako ya dollar mokama na zomi, na sanza moko, nzokande awa, ndako moko ezali awa, ndako ya moteyi, oyo bapésá ngai, bomoni. Kasi ezali likambo ya kolanda Nkolo, bomoni, yango—yango nde nyonso oyo nayebi kosala. Mpe boyebi bimononeli mpe makambo oyo esalemaki kuna. Sikawa—sikawa, na likambo oyo, nalingi koloba na . . .

<sup>73</sup> Sikawa, soki ndeko na biso ya mwasi ayoki mwa bolembu, Ndeko Roy, mpe a . . . soki okoki komema ye esika moko mpe kofandisa ye na esika moko awa, epai akozua moepepe mingi to eloko ya ndenge wana, ekozala malamumu mingi mpenza, mpo, nayoki ete akomiyoka malamumu sikawa, bomoni. Ezali malamumu. Azali kaka na bolembu, malali. Na bongo, na—nayebisi bino, soki a . . . soki okoki koya na ye awa, epai moepepe . . . fungola maninisa oyo, Ndeko Roy, mpe soki ndeko mwasi alingi koya awa, e—ekozala malamumu. Bomoni, soki alingi ko—koya awa, ee, kobanga yango te.

<sup>74</sup> Nalingi kotiéla ye maboko ntango akoleka awa. Bólimbisa ngai bino nyonso kaka mwa moke. Mpe Nzambe álimbisa ngai ndenge . . . Ézali, ezali malamumu, ndeko.

<sup>75</sup> Tata na biso na Likoló, mwana na Yo ya mwasi oyo, afandi awa na ntongo oyo, ayei mpo na koyoka Liteya, mpe azali na . . . Satana azali koluka kopekisa ye, kasi akokoka kosala yango te. Akokoka kosala yango te.

Pámbolama, ndeko mwasi, na Nkombo na Yesu Klisto.

Malamu. Ee, ekuke wana, nakanisi soki mwa . . . ? . . . bandeko, bongo, moepepe ekoki kokómela bino awa.

<sup>76</sup> Oh, mpo na likambo ya kozanga mopepe, bosengeli kokende na mikili mosusu, epai wapi bakanganaka moko likoló na mosusu, ná maládi ya mbala ná ya cancer. Mpe, oh! la la, okokoka mpenza kopema te, boyebi, na makambo ya ndenge wana. Batandamaka na kati ya bandako minene wana, bapésanaka ma—maládi. Mpe boyebi nini maládi ya mbala ezalaka. Kuna, batandamaka wana, bazángá matoi, ndambo ya elongi esílá koliama, bazángá maboko, mwa biteni mike ya makolo, ná makambo ya ndenge wana, batandami wana, bakangani-kangani. Mpe mingi kati na bango bazobunda na liwa, kaka wana, wana batandami wana, mpo bakangani-kangani, kolukáká kokóta esika moko, boyebi, mpo na koyoka Liteya.

<sup>77</sup> Sikawa—sikawa, na likambo yango, nakoyebisa bino eloko nini esalemaki. Na emononeli oyo namonaki, nakozongela, mpo nauti kolobela yango, bimononeli nyonso mibale, mpo nátálisa bino likambo moko na ntina na moko na yango. Nasengelaki kozala na Westi. Nazaláká ntango nyonso na mposa na yango.

<sup>78</sup> Sikawa, ntina ya Liteya ya ntongo oyo ezali mpo na koyebisa lingomba, na nyonso oyo Akolinga ete náyebisa lingomba, na boyebi na ngai, kino. . . wana ezali ngai kokóba. Mpe likambo yango ebétaki ngai, boye nalingaki koyebisa lingomba. Sikawa, likambo oyo ezali kaka mpo na eyanganelo oyo, bomoni, ya awa. Sikawa, na emononeli oyo, oyo ya liboso, bóyoka eloko nini esalemaki.

<sup>79</sup> Nsima na emononeli yango kobeta ngai, nalembaki mingi, makila nyonso wana esilaki kobima na nzoto na ngai, mpe. . . nakanisaki ete nazalaki kozinda na Seko moko ezángá nsuka. Mingi kati na bino bayóká ngai koloba likambo oyo liboso, mpe—mpe nazalaki kozinda na Seko moko ezángá nsuka. Liboso, nazalaki koleka lokola na kati ya mapata, na nsima, na kati ya molili, mpe kozindáká na nsé, na nsé, na nsé. Na mbala moko, nakotaki na bisika ya bato babúngá, mpe kuna, na—nazalaki kogánga. Natalaki, mpe kuna, nyonso mpenza, ezalaki na moboko te. Nakokaki kosilisa kokita ata moke te. Emonanaki lokola nazalaki kokende kokweya mpo na Seko. Makoki ya kotelema ezalaki te, esika moko te.

<sup>80</sup> Na bongo ekeseni mingi mpenza na emononeli oyo nauti komona awa, eleki ntango molai te, oyo nazalaki na Nkembo elongo ná bato, bokeseni mpenza! Kasi na oyo, nazalaki kokweya, sukasuka, na—nabélélaki papa na ngai. Na ntembe te, lokola nazalaki mwana moke, yango nde oyo nakokaki kosala. Nabélélaki papa na ngai, kasi papa na ngai azalaki kuna te. Mpe nabelelaki mama na ngai: “Moto moko ásimba ngai!” Kuna mama azalaki te. Nazalaki kaka kokita. Na bongo nabélélaki Nzambe. Kuna Nzambe azalaki te. Eloko moko ezalaki kuna te.

<sup>81</sup> Nsima na mwa ntango, nayokaki mongongo moko ya nsómo,

koleka nyonso oyo natikálá koyoka, mpe nayokaki nsómo ya koleka mpenza. Nzela ezali te. . . Ata móto oyo ezikisaka makasi mpenza, elingaki kozala esengo, kokokana na oyo yango ezalaki. Sikawa, bimononeli yango etikálá kokósa ata moke te. Mpe ezalaki mpenza nsómo oyo natikálá koyóka, mpe eloko esalaki. . .

<sup>82</sup> Nayokaki makeléle moko, lokola na—na—na esika ya milimo mabe. Na ntango esalaki bongo, natalaki, mpe namonaki ete basi moko bazalaki koya. Mpe bapakolaki biloko moko ya lángi ya mai ya pondu, nazalaki komona bilongi na bango, bapakolaki biloko moko ya langi ya mai ya pondu na nsé ya miso na bango. Mpe miso na bango ezalaki lokola ezóngá nsima, ndenge basi bapakolaka miso na bango lelo, ezóngá nsima *boye*, miso ná bilongi na bango. Mpe bazalaki kosala: “Uuh, uuh, uuh, uuh!” Oh, la la!

<sup>83</sup> Nagángaki makasi: “E Nzambe, yokela ngai mawa. Yoka mawa, E Nzambe! Ozali wapi? Soki Otiki ngai kaka názonga na bomoi, nalaki Yo, kozala mwana malamumu.” Sikawa, yango nde kaka eloko oyo moko nakokaki koloba. Sikawa, Nzambe ayebi, mpe na Mokolo ya Kosambisama, Akosambisa ngai mpo na maloba yango. Yango nde oyo nalobaki: “Nkolo Nzambe, tika ete názonga, mpe nalaki Yo ete nakozala mwana malamumu.”

<sup>84</sup> Mpe ntango babetaki ngai lisasi, nasiláká kobuka lokuta, nasiláká kosala pene na nyonso oyo ekokaki kosalema, likambo kaka moko oyo nakoki koloba. . . Ekozala malamumu ete náloba yango polele wana nazali awa sikawa. Ntango nakitisaki miso mpe namonaki ete nakatamaki pene na biteni mibale, nalobaki: “Nzambe, yokela ngai mawa. Oyebe ete natikálá kosala ekobo te.” Yango nde likambo kaka moko oyo nakokaki koloba na Nzambe. Natikáláká koyamba bolimbisi na Ye te, ná makambo nyonso oyo. Nalobaki kaka, nakokaki kaka koloba: “Natikálá kosala ekobo te.”

<sup>85</sup> Na nsima, bamemaki ngai kuna. Na bongo, kuna, nagángaki: “Nzambe, yokela ngai mawa. Nakozala mwana malamumu, soki Otiki kaka ngai názonga,” mpo nayebaki ete Nzambe moko azalaki esika moko. Mpe, ya solo mpenza, bikelamu ya nkanza wana bazalaki zinga-zinga na ngai, nazalaki moto ya sika mpo na bango. Mpe ezalaki nsómo, kolénga, kobánga ya ndenge mosusu, oyo nayoka naino te, na kati ya. . . Ezalaki lokola miso minene mpenza, ná suki ya miso ya milai *boye*, miso ezóngá nsima lokola ya niáwu, ezóngá nsima *boye*; ná biloko ya langi ya mai ya pondu, lokola ezalaki kopola to eloko moko bongo.

Mpe bazalaki—bazalaki kosala: “Uuh, uuh, uuh!” Oh, nsómo ya ndenge wana! Sikawa, ntango na. . .

<sup>86</sup> Bongo, nsima na mwa ntango, nazongaki lisusu na bomoi na mokili oyo. Likambo yango etungísáki ngai mingi. Nakanisaki: “Oh, tika ésalema ete nákende ata moke te na esika ya ndenge



wana; ata moto mosusu moko te á sengeli kokende na esika ya ndenge wana.”

<sup>87</sup> Sanza nsambo na nsima, namonaki emononeli ete nazalaki na Westi, mpe namonaki ekulusu ya wolo wana kokita likoló na ngai. Mpe na—nayebaki ete esika ya baoyo bakosambisama ezali esika moko boye.

<sup>88</sup> Sikawa, natikálá kokéba na yango mingi mpenza te, kino eleki pene na mpóso minei. Mwasi na ngai. . . Natikalá kokanisa yango na lolenge oyo te. Eleki pene na mpóso minei, ngai ná mwasi na ngai tokendeki kosómba biloko na Tucson. Mpe ntango tofandaki. . . Mwasi na ngai, tokitaki na rez-de-chaussée, mpe—mpe bilenge mibali moko lokola basi bazalaki kuna, ná suki elíngámá, boyebi, ndenge basi basalaka, ná—ná suki ekwéyá liboso na elongi, awa, ná ba-pantalons ya mikuse mpenza, lokola ba-beatnik, nabanzi, to ndenge bobengaka bango. Bazalaki kuna, mpe bato nyonso bazalaki kotala bango, mpe mitó na bango ezalaki minene *boye*, lokola basi oyo basálaka suki lokola “bato ya mitó minene”, boyebi. Mpe bazalaki kuna.

<sup>89</sup> Mpe elenge mwasi moko apusanaki, alobaki: “Okanisi nini mpo na yango?”

<sup>90</sup> Nalobaki: “Boye, osengeli komiyoka nsoni, soki okoki kokanisa bongo.” Nalobaki: “Azali na ndingisa lokola yo, ya kosala bongo. Moko te kati na bino azali na ndingisa.”

<sup>91</sup> Bongo, namataki na étage, mpe nafandaki. Ntango nafandaki, escalier roulant moko ezalaki wana, ezalaki na magasin monene ya J.C. Penney, mpe escalier roulant yango ezalaki komatisa bato na likoló. Ee, nayokaki mpenza mposa ya kosanza, ntango namonaki basi oyo bazalaki komata kuna; bilenge, mibange, bakipaka te, bazali na manyunyuku, bilenge, ya ndenge na ndenge, balati ba-kupé ya mike mpenza; nzoto na bango ya mbindo, mpe basi yango balataki bilamba ya sexy, ná mitó minene ndenge wana, mpe bazalaki koya wana. Mpe moko autaki na escalier roulant yango, azalaki koya, ndenge wana, na esika oyo ngai nafandaki, na kiti, nafandaki wana mpe nagúmbaki motó.

<sup>92</sup> Nabalukaki mpe natalaki. Mpe moko na bango azalaki komata na bibuteli, azalaki koloba: “Uuh,” azalaki kosolola na mwasi mosusu na Espagnol. Mwasi yango azalaki mondele, azalaki kosolola ná mwasi oyo alobaka Espagnol. Mpe ntango natalaki, [Ndeko Branham alelisi misapi na ye—Mok.] na mbala moko nabongwanaki. Nasílá komona yango liboso. Miso na ye, boyebi ndenge basi bakómi kosala sikawa, kopakoláká miso na bango, mikolo oyo, lokola niáwu, boyebi, bamatisaka yango *boye*, mpe balataka manéti lokola miso ya niáwu mpe nyonso wana, boyebi, ná miso ematá *boye*, ná eloko wana ya langi ya mai ya pondu na nsé na miso na bango. Eloko wana, oyo namónáká, ntango nazaláki mwana moke, ezalaki wana. Mwasi yango

mpenza azalaki wana. Mpe nzoto na ngai mobimba ekómaki kiló, nabandaki kotala zinga-zinga, mpe bato bazalaki koloba maloba oyo ezalaki koyokana te, boyebi, kokóba kotunáká bantalo mpe makambo mosusu na kati ya magasin yango. Mpe ngai. . .

<sup>93</sup> Emonanaki lokola nabongwanaki na ntango moke. Natalaki, mpe namilobelaki: “Yango nde namonáká na ewélo.” Bazalaki wana, ná kopola wana. Nazaláká kokanisa ete bakómaki bongo mpo bazalaki na ewélo, lángi ya mai ya pondu ná ya bléu na nsé ya miso na bango. Mpe tala basi yango, bapakoli biloko ya langi ya mai ya pondu ná bléu, kaka ndenge emononeli yango elobaki, eleki pene na mibu ntuku minei.

<sup>94</sup> Bomoni, esalemaki eleki pene na mibu ntuku minei. Nakómi na mibu ntuku mitano na minei; nazalaki na mibu zomi na minei. Boye, eleki pene na mibu ntuku minei, na. . . Mpe ezali mo—mo. . . Ezali motángó ya kosambisama, ata bongo, bomoni. Na bongo, ezalaki. . .

<sup>95</sup> Namonaká yango mpe nakokaki ata kosolola na mwasi na ngai te ntango ayaki. Akendeki mwa mosika mpo na koluka kosombela Sara ná bana eloko moko, ro—robe tó elamba mpo na eteyelo, mpe na—nakokaki ata te. . . nakokaki ata kosolola na ye te. Alobaki: “Bill, likambo nini ekómeli yo?”

Nalobaki: “Cherie, nakómi lokola. . .nakómi lokola ebembe.”

Mpe alobaki: “Likambo nini? Obélí?”

Nalobaki: “Te. Likambo moko euti kosalema.”

<sup>96</sup> Sikawa, ayebi te. Azali kozela ete bande oyo ékende kuna. Natikálá koloba yango na moto moko te. Namilobelaki ete nakozela, ndenge nalakaki, nakoteya yango liboso na losambo. Bomoni? Nakoteya yango na losambo. Ezalaki elaka na ngai. Mpe bokososola, nsima na mpokwa oyo, ntina oyo namekaka kotosa bilaka na ngai. Bomoni?

<sup>97</sup> Na bongo, nakanisaki, ntango namonaki miso ya basi wana, lokola epolá. Ba-Espagnol, ba-Français, ba-Indien mpe mindele, bango nyonso bazalaki wana, kasi ná mitó na bango ya minene wana, boyebi, suki elíngámá, ná bakisanóla wana, ndenge kozongisaka suki na nsima, kovimbisa motó, mpe komatisa yango. Boyebi, boyebi ndenge basalaka yango, ndenge batelemisaka yango. Bongo miso na bango ezalaki lokola epolá, mpe miso bapakólá lángi, ezóngá nsima lokola miso ya niáwu. Bazalaki kosolola, mpe ngai nazalaki lisusu yan kotelema wana, na magasin J.C. Penney, nazongaki na ewélo.

<sup>98</sup> Na—na—nabangaki mpenza. Nakanisaki: “Nkolo, ya solo, nakufi te, mpe Otiki ngai nácoma na esika oyo nsima na nyonso.”

<sup>99</sup> Mpe bazalaki wana, kosaláká. . .zinga-zinga, ndenge wana, lokola na emononeli yango, ezalaki mpenza koyokana malamumu te na matoi, boyebi. Kaka lokola koyima-yima mpe bongo na

bongo, ya bato, mpe basi yango bazalaki komata na escalier roulant yango mpe kotambola-tambola wana, kosala: “Uuh, uuh!” Tala miso yango, ya langi ya mai ya pondu, ya kobangisa mpe ya nsómo.

<sup>100</sup> Mwasi na ngai ayaki. Mpe nalobaki: “Tika ngai kimia mwa moke, molingami.” Nalobaki: “Soki ekotungisa yo te, na—na—nalingi kozonga na ndako.”

Mpe alobaki: “Obéli?”

<sup>101</sup> Nalobaki: “Te, yo koba na yo, cherie, soki ozali naino na biloko ya kosomba.”

Alobaki: “Te, nasilisi.”

<sup>102</sup> Mpe nalobaki: “Tika ete násimba yo na loboko.” Bomoni? Mpe nabimaki.

Alobaki: “Likambo nini?”

Nalobaki: “Meda, na—na—na...Likambo moko esalemi kuna.”

<sup>103</sup> Mpe wana nazalaki naino na nsé ya likambo yango, nakanisaki boye: “Tozali kobika na mokolo nini? Ekoki nde kozala Pull ya Misato?” Sikawa, nakomáki makambo mosusu awa.

<sup>104</sup> Yesu. Tomoni ete Yesu, na lotómo na Ye, nsima na Ye koteya bato...Sikawa, tokozala mpenza na kati na Makomi mpo na likambo yango. Nsima na Yesu kosilisa lotómo na Ye, mpe bato baboyaki lotómo na Ye. Sikawa, bokotánga kati na milongo, mpe bokososola bino moko. Bómikanisela likambo oyo nayebisaki bino na ebandeli. Nsima na Ye koteya... .

<sup>105</sup> Ayaki lokola Moto oyo alakamaki mpo na eleko wana. Biso nyonso toyebi yango. Makomi etalisaki Yesu Klisto lokola Masiya. Ezali solo. Na mobimba, na ntembe te, etatolamaki na Nzambe mpe na Liloba na Ye, ete Azalaki Masiya. Ntembe ezali te. Soki moto atii ntembe na yango, soki otii ntembe, boye osengeli koya na etumbelo, ete: “Azalaki Masiya te.” Atalisamaki polele lokola Masiya. Kasi nsima na Ye ko...Nzambe nde atalisaki Ye polele.

<sup>106</sup> Ndenge Petelo alobaki Mokolo ya Pantekote, ntango alobaki liboso na Koyangana kuna, na minei...pene na mikolo minei na nsima. Alobaki: “Yesu ya Nazarete, Moto oyo andimamaki na Nzambe katikati na bino ná bilembo mpe bikamwa, oyo Nzambe asalaki na nzela na Ye katikati na bino, biso nyonso tozali batatoli na yango. Bomoni? Bopesaki Ye na maboko ya bato na nkanza mpe bobomáki Mokonzí na Bomoi na ekulusu; Nzambe asekwisi Ye mpe atalisi makambo oyo bozali komona.” Bomoni? Klisto akobaki kozala na bomoi. Na ntembe te, azali na bomoi kino lelo.

<sup>107</sup> Sikawa, nsima na Yesu koya polele mpenza, komitalisa Ye moko, Nzambe atalisaki Ye polele, mpe Asakolaki. Nsima na mikolo ya lisakoli na Ye, ata etalisamaki kokokana na Makomi, bato baboyaki Ye. Ya solo. Na bongo Ateyaki nsima na bango koboya Ye awa, baoyo bazalaki na makoki ya kobikisama. Bomikanisela, ntango Azalaki koteya, moto nyonso azalaki na makoki ya kobikisama. Bisu toyebaka te banani bango bazali. Babongisámá liboso. Kasi Ye akobaki koteya.

<sup>108</sup> Kasi nsima na mikolo ya mateya na Ye, lotómo na Ye ekobaki, mpo lisanga ya nsuka oyo Ateyaki bango ezalaki milimo oyo ezalaki na ewélo, baoyo bakokaki kolimbisama te. Natángaki yango polele awa na Biblia, na Petelo ya Mibale. Bomoni? Akendeki koteya milimo oyo ezalaki na boloko, elingi koloba ewélo, bakangámá kino na Mokolo ya Kosambisama.

<sup>109</sup> Mpamba te, bomoni, Kosambisama ezali sikawa te, mpe lifelo ya kopela móto ezali sikawa te. Soki moto alobi na yo: “Moto wana azali sikawa kozika móto na lifelo sikawa,” ezali lokuta. Bomoni? Mosambisi ya mokili oyo azali sembo na lolenge ete akoki kokweisa moto ata moke te, soki aleki naino na esambiselo te. Nzambe mpe akobwaka moto na libeke na móto te, soki moto yango akweisami liboso te, na mibeko ya Nzambe mpenza. Aboyaki mawa, boye bomoni, asengeli liboso koleka na esambiselo, mpe esambiselo ezali Kosambisama ya Ngwende Monene ya Mpembe. Kasi sikawa, azali na esika oyo ebengami boloko.

<sup>110</sup> Lokola namonaki emononeli ya bisika mibale yango, mpe na ngolu na Nzambe. . . nazali koloba boye mpo na kotuka te, mpe, soki ezali lokuta, Nzambe álimbisa ngai. Nandimaka ete nazalaki na bisika nyonso mibale, bomoni, na bisika nyonso mibale. Namonaki basíkolami, bapámبولami; mpe namonaki babúngi, mpe esika oyo bazalaki. Yango wana natelemi lokola ndeko na bino, lelo, mpo na kokebisa bino ete bókima nzela oyo ezali kokita na nsé. Bómeka ata moke te kokende nzela wana. Mpe bozali na nyonso mpo na kobika mpo na nzela wana ya bapámبولami, oyo ezali kokende lilokó, epai basíkolami bazali kati na esengo mpe na kimia, mpe bakoki kosala lisumu te. Bakoki te—bakoki koyoka mawa te. Bakoki te. Kuna, eloko moko ezali te; bazali ya kobonga be. Namonaki bisika nyonso mibale! Nayebi ete ezali maloba makasi, mpo na moto koloba, kasi, Nzambe lokola Mosambisi na ngai, nandimaka mpenza ete namonaki bisika nyonso mibale. Na—nandimaka bongo.

<sup>111</sup> Mpe, oh, mosika na moto nyonso, likanisi ya kokota na bisika ya babúngi! Soki bakotisi yo basinga ya ebende ya móto, mpe batungisi yo na ndenge nyonso, ekokokana na motungisi ya milimo mabe oyo ezali na esika yango te. Eloko moko te ekokaki. . . Likanisi ya moto ekoki te, likanisi ya moto ekoki te kososola ndenge bisika ya babúngi yango ezali. Ndenge ya kolimbola yango ezali te. Ndenge mpe ya kolimbola bisika ya

bapámbolami ezali te, ezali mpenza na nkembo mingi. Oyo wana ezali mpenza nsómo, mpe Oyo awa ezali mpenza—mpenza na nkembo, ezali kolongwa na nsoni kino na kitoko mingi. Boye, soki moto ayoki ngai. . .

<sup>112</sup> Mpe nabandi kokóma mobangé. Nayebi te soki natikali na ntango boni. Etikali moke nákokisa mibu ntuku mitano na mitano. Mpe na—nayebi te, kokokana na mokili, ntango mosusu natikali na mibu mingi mpenza te. Nayebi te bisika oyo bande oyo ekokende. Kasi tika ete moto nyonso áyoka, baoyo bazali awa ná baoyo bakoyoka na nzela ya bande, to bisika nyonso oyo yango ekoki kokende. Bókende ata moke te na bisika ya babúngi wana. Bokoki koyeba mpenza te, ndenge ewélo ezali mabe mpenza. Ata bozali kosala nini, bómeka ata moke te kozua. . . kobosana likambo oyo, ete bisika ya bapámbolami. . . Nakoloba boye, elongo ná Santu Polo: “Liso emóná te, litoi eyóká te, to ekokaki mpe kokota na motema ya moto te, makambo oyo Nzambe abongisi mpo na bango bakolingaka Ye.” Boye bótelemisa, soki bozali koyoka bande oyo, bótelemisa yango, bóbongola mitema, soki bobikisami te, mpe bóbongisa bomoi na bino ná Nzambe.

<sup>113</sup> Nazali koloba yango mpo ngai moko nabikeli yango, ndenge nandimaka na motema na ngai. Mpe nalobi, soki bimononeli oyo, soki ekosaki ngai, Nzambe áyokela ngai mawa ndenge nalobi maloba ya boye. Kasi na bosembo ya motema na ngai, koyebáká ete emononeli ata moko te esílá kokweya, nandimi ete nakómá na bisika nyonso mibale. Tika ete ézala mosika na moto nyonso, likanisi ya kolanda nzela oyo ezali kokita!

<sup>114</sup> Sikawa, Yesu, nsima na Ye kosilisa lotómo na Ye, Ateyaki milimo oyo ekokaki kobikisama te, oyo ekokaki kobikisama ata moke te. Sikawa, Biblia nde eyebisi biso bongo. “Akendeki koteya milimo oyo ezalaki na boloko, oyo ebongolaki motema te.” Ntango mawa epesamelaki bango, baboyaki mawa, mpe sikawa bazali kozela Kosambisama. Oh, ezalaki ntango ya ndenge nini! Oh, soki nakoki mpenza kozala na makoki ya koningisa mokili na likambo yango, mpo nátalisa bango bosolo.

<sup>115</sup> Mpe Yesu Ye moko alobaki: “Pelamoko Tata atindaki Ngai, Ngai mpe natindi bino.” Mpe ndenge Tata atindaki Ye mpo na koteya ba—bato na bomoi, baoyo bazalaki na elikia, na nsima, akendeki kotalisa Nsango yango moko na baoyo bazalaki na elikia te, emonani lokola lelo nde ezali ntango oyo elongobani, oyo likambo yango esengeli kosalema lisusu, mpamba te Molimo ya Klisto oyo ezali kobika kati na biso ebongolaka lolenge na Ye te, to ebongolaka lolenge ya kosala ya Nzambe te. Asengeli kozala ndenge moko na ekeke nyonso. Asengeli kozala ndenge moko. Alobaki: “Ndenge Tata atindaki Ngai, Ngai mpe natindi bino.”

<sup>116</sup> Ntómo esengeli kozala ndenge moko, mpo Alobaki. . .

namoni ete bamosusu kati na bino bazali kokoma biteni ya Makomi. Santu Yoane 14:12: “Ye oyo akondimaka Ngai, misala mizali Ngai kosala, akosala yango mpe lokola.” Bomoni, “misala,” koteya epai na baoyo babúngi, kobikisa babeli, na nsima, epai na baoyo bakokaki kobikisama ata moke te. Bomoni? Mosala ekóbaki ndenge moko. Boye, oyo esili kosalema, (oyo esili kosalema?) bótika ete náloba yango boye, mosala ya Yesu Klisto elati lisusu nzoto na kati na Lingomba na Ye na mokolo oyo ya nsuka. Yango nde mingi kati na biso bandimaka. Nandimaka elongo ná bino. Nandimaka yango. Soki nándimaka yango te, nalingaki kosala likambo mosusu na ntina na yango. Mpamba te, nsima na nyonso, ngai nde likambo yango etal- . . . yango etali awa. Mpe soki Molimo ya Nzambe ezali kati na yo, okotala makambo ya bato.

<sup>117</sup> Ezalaki na Likomi moko oyo ezaláká ntango nyonso kotungisa ngai, ndenge Mose akokaki koyebisa Nzambe likanisi ya malamú koleka oyo Nzambe azalaki na yango, kino namonaki ete ezalaki nde Molimo ya Klisto kati na Mose. Bomoni?

<sup>118</sup> Nzambe alobaki: “Mose, kabwáná na bango. Nakoboma bango nyonso, mpe Nakobandela mosala ná yo.”

<sup>119</sup> Alobaki: “Nkolo!” Amibwakaki na katikati, alobaki: “Bomá nde ngai. Longola nkombo na ngai.” Bato oyo bautaki mpenza kotomboka, motema na ye eyokelaki bango mawa. Bomoni?

<sup>120</sup> Mpe ntango motei moko oyo azali na bato na motema na ye. . . Ndenge nini nakoki komisembolisa na miso na ngai. . . liboso na Nzambe, mpe na ngai moko, mpo na kobómba eloko moko na bato oyo olingaka koleka yo moko. Ndenge nini moto akoki kokotisa moto na lingomba na nzela na mbote ya loboko, to na komwangisa mwa mai, to na libatizi moko ya lokuta, to eloko mosusu, mpe kotika ete bá—bákambama na lokuta, wana ayebi ete Biblia ezali wana, bongo áloba ete alingaka moto yango?

<sup>121</sup> Atako nasengeli kolomba-lomba mpo na kobikela, ézala soko eloko nini, tika ete názala sembo liboso na Nzambe ná bato, mpo na koyebisa bango Solo. Tika ete názala ata moke te mozimbisi. Ndenge nini nakoki kozimbisa bato oyo nalingaka? Atako nasengeli koyokisa bango mpati, kasi nalingaka bango. Yango nde ntina oyo obetaka mwana na yo, ezali mpe olingaka ye. Ezali te mpo olingaka ye te; ezali mpo olingaka ye. Soki azali na libunga, akoki kokufa soki osémboli ye te.

<sup>122</sup> Sikawa, lotomo mpe ezalaki bongo. Ndenge ezalaki, ezali mpe bongo lelo. Eteyamaka, mpe etatolamaka na mobimba na nzela na Liloba na Nzambe, ete ekokaki kozala moto te, esengeli kozala Nzambe. Esengeli kozala bongo. Bótala, bilembo ya molimo moko oyo Yesu asalaki, esalemi lisusu na mokili, na mikolo ya nsuka. Kaka elembo ya molimo moko oyo Ye Amitalisaki na yango lokola Masiya, esili kotalisa Ye lelo. Azali Masiya kino lelo! Bilembo yango moko ya nzoto esili komonana

na mokili, oyo emonanaki na nzela na Ye, oyo Ye azalaki. Likonzi na Mító moko oyo Santu Polo amonaki, Yango moko, nyonso wana esalemi lisusu, ná lolenge yango moko na kati na yango, kosaláká ndenge moko.

<sup>123</sup> Yesu alobaki ete Azalaki kosala eloko moko te soki Tata alakisi Ye te. Mpe Tata azali Molimo Mosanto, toyebi yango. Ezali mosala moko ya Nzambe. Soki ezali yango te, boye nani kati na bango azali Tata na Yesu Klisto? Yesu alobaki ete Nzambe azalaki Tata na Ye, mpe Biblia elobaki ete Molimo Mosanto azalaki Tata na Ye. Sikawa, bokoki kokomisa Ye mwana makango te, boye, Molimo Mosanto azali Nzambe, Yesu mpe azalaki Nzambe. Boye, Nzambe, Tata, Mwana, mpe Molimo Mosanto ezali. . . Ezali. . . Ezali misala misato ya Nzambe moko. Ezali ba-attribut misato ya Nzambe yango moko.

<sup>124</sup> Bozali eteni na Nzambe, ngai mpe nazali eteni na Nzambe, bomoni; kasi nazali mobimba na Nzambe te, bino mpe bozali mobimba na Nzambe te. Bomoni? Bomoni? Ezali ba-attribut ya Nzambe likoló na biso, lokola bana oyo bapesami lokumu na Yesu Klisto. Elingi koloba, Nzambe Ye moko akómaki mosuni, mpo na kokufela biso.

<sup>125</sup> Sikawa, Molimo Mosanto azalaki ntango nyonso kolakisa Ye makambo oyo esengelaki koyá, mpe Azalaki na libunga ata moke te. Ezalaki ntango nyonso ya kobonga be. Boye te? Azalaki komikumisa Ye moko te. Azalaki kokumisa Nzambe. Alobaki: “Mwana akoki kosala eloko moko te na Ye moko, bobele oyo Amoni Tata kosala.” Mpe Tata, Molimo Mosanto azalaki Tata na Ye. Boye te? “Yosefe, mwana na Dawidi, kobanga te kozua Maria mwasi na yo, mpamba te Oyo azuami kati na ye auti na Molimo Mosanto,” oyo azalaki Tata na Ye. Mpe Molimo Mosanto azalaki kolakisa Yesu makambo oyo ekoya, azalaki koyebisa Ye makambo oyo ezalaki.

<sup>126</sup> Mpe Azalaki Nzambe-Mosakoli. Mpamba te, Liloba na Nkolo eyáka bobele na mosakoli; mpo na kolakisa ete Maloba eyaki, na lolenge ya moke, basakoli bazaláki kokoma makambo oyo Nkolo azaláki koyebisa bango. Kasi Ye akomaki eloko moko te, mpo Azalaki Liloba. Azalaki Liloba.

<sup>127</sup> Bótala, Molimo Mosanto moko oyo afandaki kati na Ye: “Etikali mwa moke, mpe mokili ekomona Ngai lisusu te; kasi bino bokomona Ngai, mpo Nakozala elongo ná bino, ata kati na bino, kino nsuka ya mokili. Nakoya epai na bino,” Alobaki. “Ngai,” ezalaki Tata oyo azalaki kati na Ye, “nde akoya epai na bino.” Mpe Alobaki: “Ntango Molimo Mosanto akoya likoló na bino, Akomonisa makambo oyo Nalakisaki bino, mpe Akotalisa bino makambo oyo ekoya.” Yango mpenza sikawa.

<sup>128</sup> Sikawa, tomoni ete ndenge Molimo Mosanto asalaki na Lingomba na eleko wana, Molimo Mosanto mpe asili kosala makambo yango moko mpenza lelo; kosakoláká, na nzela

na Likonzi na Mító, ndenge ezalaki mpenza na ebandeli, ndenge moko. Ntango Yoane amonaki yango kokita likoló na Yesu, asakolaki yango na ebale ya Yolodani. Mpe nyonso esili kotalisama polele, ata science ekangi yango ba-fotó. Bakoki kowangana yango te. Science etalisaki yango polele. Eloko ezalaki wana. Ezalaki likanisi ya lisapo te. Ezalaki psychologie te. Ndenge George J. Lacy alobaki: “Liso ya mécanique ya camera ekoki kokanga psychologie fotó te. Pole ebetaki objectif.”

<sup>129</sup> Ebongo mpo na bino, lingomba, eleki pene na sanza motoba to mwambe, awa, mpe natelemaki awa, mpe nalobaki: “YANGO ELOBI NKOLO, nakokende na Tucson, Arizona. Lokito makasi ekoyokana, mpe Banje nsambo bakomonana.” Bozali koyeba yango lisusu? [Losambo balobi: “Amen.”—Mok.] Ata te... Nzambe akomisi yango solo mpenza na lolenge ete zulunale *Look* ekangaki yango ba-fotó. Na molimo, namonaki yango liboso, ekokisami mpenza ndenge moko, Banje nsambo, oyo bayaki na mbano ya Makomi nyonso. Mpamba te, mabombami nyonso ya Biblia mobimba ezali na kati ya Bilembo Nsambo. Toyebi ete Yango ezali bu—Buku, elembo na Yango, ná Yango, makambo nyonso ezui biyano. Ezali libombami ya Buku mobimba, ezalaki na kati ya Bilembo Nsambo yango, oyo Nkolo apesaki biso nzela ya koteya.

<sup>130</sup> Mpe ezali na bato oyo bafandi awa, lelo, baoyo bazalaki wana elongo ná ngai ntango esalemaki. Zulunale *Look* mpe endimisaki likambo yango moko, ete e—esalemaki mpenza. Mpamba te, Ezalaki Nzambe nde alobaki yango. Ezalaki Nzambe nde atelemaka nsima na Liloba na Ye, mpo na kokokisa Yango, ntango Alobi ete Akosala yango. Na yango, ezali moto moko boye te, moto ya mosuni lokola ngai moko, oyo azali katikati na bino. Ezali Nzambe ya Seko.

<sup>131</sup> Asalelaka bato. Ezali solo. Asalaka eloko moko te, libanda na oyo Asalaka na nzela na bato. Toyebi yango malamumu. Ye, wana azali mosali na Ye—na Ye. Nde oyo Ye aponaki. Mpo na nini, nayebi te. Akokaki kosala ete moi éteya Nsango-malamumu. Akokaki kosala ete mopepe éteya Nsango-malamumu. Akokaki kosala ete mopepe é sala makambo, kasi Aponaki bato.

<sup>132</sup> Ezalaki likanisi na Ye, ete moto ázongisa maloba, na nzela na moto; ye moko te, kasi, “Liloba na Nkolo eyaki na basakoli,” bapési-masakoli, batei. Mpe mopési-lisakoli oyo awangani Liloba ya ebandeli, ndenge nini akoki kozala mosakoli ya solo? Bomoni? Akoki kozala yango te, mpamba te azali kowangana Solo ya Liloba. Na nsima soki te, na bongo Liloba oyo, Yango moko, wana Eteyami na bosolo ya Liloba mpe na bosolo ya Molimo Mosanto, Ekotalisa polele bilaka nyonso oyo Yango elakaki. Lolenge wana nde toyebaka soki ezali solo to te. Oyo wana nde likambo oyo Yesu alobaki: “Soki Nasali te makambo oyo ekomamaki na ntina na Ngai, na bongo bóndima Ngai te.” Bomoni? Sikawa tozali komona makambo yango.



133 Bómikanisela, Bilembo Nsambo esilaki, mpe ntango Solo nsambo oyo emonisami. . .

134 Moko na yango, Apesaki biso nzela ya koyeba yango te. Bisó. . . Bato boni bazalaki awa na ntango ya Bilembo Nsambo, mpe bayokaki yango? Bino nyonso, nabanzi. Bomoni, e—Elembo ya Nsambo, Apesaki nzela te.

135 Azalaki mpenza wana, na kati ya biró, mpe Amonisaki yango moko na moko. Mpe, soki natikálá kotéya likambo moko na bomoi na ngai, oyo epémélámá, ezalaki yango. Mpe esengelaki kozala solo, mpo na bino. Natelemaki awa mpe nayebisaki bino ete ekosalema, mpe nakendeki kuna, mpe ata science ná makambo nyonso mosusu, boluki-luki ya science mpe nyonso wana, ezali libombami mpo na bato, etalisaki polele ete esalemaki mpenza wana. Nazongaki awa mpe boyokaki kofungwama na yango, mpe Liloba moko na moko ekokanaki mpenza. Tozali kobika na mokolo nini? Tokómi wapi?

136 Mpe bómikanisela, na Elembo oyo ya Motoba, esika oyo, ba-Kelelo nyonso Nsambo ekoyula na ntango ya Elembo yango ya Motoba. Ntango tokokóma wana, bokomona yango. Kelelo nyonso (nsambo) ekokisamaki na Elembo yango ya Motoba.

137 Nsambo ezalaka ntango nyonso libombami. Bótala nsambo yango, yango nde nsuka. Ezalaki Boyei ya Nkolo. Likoló efandaki kimia, makelele te, moto moko te aninganaki. Mpamba te, Yesu Ye moko alobaki: “Ata Mwanje ya Likoló moko te ayebi ntango Nakozonga. Ata Ngai moko Nayebi yango te, ntango nini. Tata atiakí yango na likanisi na Ye.” Kaka Nzambe nde ayebi yango, Molimo. Alobaki: “Nayebaki yango te.” Na bongo, emonisamaki te. Ntango Kelelo yango ya Nsambo eyulaki. . . to Mwanje ya Nsambo, e—Elembo moko efungwamaki, na nsima, kimia ezalaki na Likoló. Bomoni, etalisamaki te, likambo oyo elingaki kosalema.

138 Kasi na ntango ya Elembo ya Motoba, nde ba-Kelelo yango efungwamaki, bómikanisela, na nsé kuna, tomoni ete Mwana-mpate ayaki, amonanaki polele. Atikaki Ebóngá-na-Mawa. Mosala na Ye ya lisiko esilaki. Mpe Ayaki kozua Buku yango na loboko ya mobali na Ye oyo afandaki na Ngwende, mpe “ntango ezalaki lisusu te.” Na mbala moko, mwanje moko amonanaki na mokapo ya nsambo, to mokapo ya 10, molongo ya 7, alobaki. . . Mwanje yango akitaki mpe akataki ndai ete “ntango ekozala lisusu te.”

139 Kasi, bomoni, baoyo basikolamaki bazalaki na kati ya Buku yango. Ezalaki Buku ya Lisiko. Mpe nyonso oyo Ye asilaki kosikola, ekomamáki na Buku yango. Bato nyonso oyo Akufaki mpo na bango, bakomamáki na kati ya Buku yango, mpe Akokaki kotika Ngwende na Ye ya kolobela bato te, kino Ásilisa na mobimba mosala ya lisiko. Mpe Akokaki kosikola bango na ekulusu te, mpo basílaki kobongisamá liboso, na kati ya Buku na

Bomoi ya Mwana-mpate, mpe Asengelaki kotikala Kuna, mpo na kolobela bango kino ékokisama mpo na moto wana ya nsuka. Nkembo!

<sup>140</sup> Kasi mokolo moko Atelemaki longwa na Wana, Ayaki. Buku yango ezalaki wapi? Ezalaki naino na maboko ya Monkólo na yango mpenza, Nzambe na-Nguya-nyonso. Mpe Yoane atambwisaki miso, mpe alelaki, mpo moto moko te abongaki, ata mpo na kotala Buku yango mpe, koleka mingi, kofungola Bilembo, mpo na komonisa oyo libombami yango ezalaki.

<sup>141</sup> Mabombami yango ezalaki na kati ya Bilembo Nsambo. Ntango Bilembo Nsambo yango efungwamaki, efungolaki Biblia mobimba. Bilembo Nsambo; Ekangamaki ná Mabombami Nsambo, mpe na kati ya Bilembo Nsambo oyo, libombami na Yango mobimba ezalaki. Mpe ezalaki Buku ya Lisiko, Kondimana na Sika.

<sup>142</sup> Oyo ya Kala te. Yango ezalaki kaka kosakola Kondimana na Sika. “Bakómaki . . . bakoki kokóma na kobonga be te kozanga biso,” Baebele 11. Bomoni? Bomoni? Sikawa, lisiko eyaki bobele ntango Mosikoli akufaki. Mpe basikolamaki na moke na yango, na nsé ya makila ya bana-mpate, ya Mosikoli te; basikolamaki naino te, kino Mosikoli ayáki.

<sup>143</sup> Bótala sikawa, ntango Mosikoli yango . . . Yoane atambwisaki miso, mpe Nzambe afandaki wana na Ngwende, ná Buku yango na loboko na Ye, ekangamaki na Bilembo Nsambo, mpe mwango mobimba ya lisiko ezalaki kati na Yango.

<sup>144</sup> Mpe moto nde abungisáká Yango, Adama. Mpe Nzambe . . . Ezongaki wapi? Satana akokaki kozua Yango te; ye nde asalaki ete moto ábungisa Yango. Kasi na nsima, Buku yango ekendeki wapi? Ezalaki ya libota ya bato te. Mapamboli yango ezalaki mpo na awa te; awa, awa bato basilaki kobungisa Yango. Boye, Ezongaki mbala moko na Monkólo na Yango ya ebandeli, elingi koloba Nzambe.

<sup>145</sup> Awa Afandaki ná Yango, mpe Abelelaki mpo moto moko, moto moko áya kozua Yango.

<sup>146</sup> Yoane atambwisaki miso, mpe ezalaki na moto moko te na Likoló, moto moko te na mokili, moto moko te, Mwanje moko te, eloko moko te ekokaki kozua Buku yango to kofungola Bilembo, to ata kotala Yango. Ata moto moko te alongobanaki. Yoane alobaki ete alelaki na mawa mingi.

<sup>147</sup> Na nsima, Mwanje moko ayaki epai na ye, alobaki: “Kolela te, Yoane, mpo Nkosi ya Libota na Yuda asili kolonga, mpe Ye alongobani.”

<sup>148</sup> Mpe Yoane atalaki mpo na komona mwana-mpate . . . to komona nkosi, kasi amonaki nini? Mwana-mpate, mpe ezalaki Mwana-mpate oyo azali kotanga Makila, Mwana-mpate oyo

asilaki kobomama. Uta ntango boni? Uta na kozalisama ya mokili.

<sup>149</sup> Mwana-mpate yango ayaki, apusanaki mpembeni na Ye oyo azalaki na Buku na loboko na Ye ya mobali, mpe azuaki Buku yango; amataki na Ngwende mpe afandaki. Ezali bongo. Esilaki (ntango nini?) ntango Bilembo emonisamaki. Ntango moto ya nsuka yango, wana ezalaki nyonso oyo Asilaki kosikola, ezalaki na eloko moko te . . .

Ayaki mpo na kosikola.

<sup>150</sup> Okoloba: “Mpo na nini Asikolaki bango te eleki mibu ntuku minei? Eleki mibu nkóto mibale?”

<sup>151</sup> Bomoni, nkombo na bango ezali na Buku ya Bomoi, na kati na Buku yango. Mpe Asengelaki kozala wana, mpo ezalaki mwango ya Nzambe mpo na kosikola bango. Nkombo na bango ekomamaki na Buku ya Bomoi ya Mwana-mpate liboso na kozalisama ya mokili. Mwana-mpate mpe akomamaki kuna elongo ná bango, mpo na kobomama. Mwana-mpate ayaki, ntango Abomamaki, Azongaki mpo na kolobela bato.

<sup>152</sup> Bótala Ye! Ekozala na makambo ya komekola mingi, makambo mingi ya ndenge na ndenge, kasi ezalaki mpenza na moto moko oyo alingaki kobikisama, mpo Ye. . . Lingomba ebongisamaki liboso mpo ézala na litónó to nzolóko te. Ekozala kuna. Mpe Mwana-mpate akufaki na ntina wana. Na bongo, ntango nkombo ya nsuka na Buku esikolamaki, Mwana-mpate ayaki kozua Buku yango: “Ngai nazali Ye oyo asalaki yango!”

<sup>153</sup> Banje, Ba-kelúba, Ba-mpaka ntuku mibale na minei, Bizali-na-bomoi, bango nyonso, balongolaki mitóle na bango, bafukamaki liboso na Ngwende, mpe balobaki: “Yo nde olongobani!”

<sup>154</sup> Yoane alobaki: “Nyonso na Likoló mpe na mokili bayokaki ngai kogánga: ‘Amen,’ kogánga makasi: ‘Alléluia,’ mpe masanzoli epai na Nzambe.” Kogánga eyókanaki. Mpo na nini? Nkombo na bango ezalaki kati na Buku wana, esengelaki komonisama, mpe Mwana-mpate amonisaki yango.

<sup>155</sup> Mwana-mpate asilaki kosikola bango, kasi Akokaki koya te, kino nkombo nyonso émonisama, mpe ezalaki kosalema na ntango ya Elembo ya Motoba, liboso oyo ya Nsambo éfungwama. Na nsima, oyo ya kozanga litónó. . . Bongo Mwana-mpate ayaki mpo na baoyo Asilaki kosikola. Ayaki kosenga baoyo Asilaki kosikola. Asili kozua yango, awa na Buku, Azuaki Yango na loboko na Ye. Sikawa Azali koya kozua baoyo Asíli kosikola. Wana ezali mosala na Ye. Asilisi. Ayei kozua yango. Oh, oyo—oyo ntango nini! Etalisami polele, Elembo ya Nsambo etalisi yango polele. Azongaki mpe Azuaki Buku ya Lisiko!

156 Bótala malamú, Nsango ya mwanje na nsambo nde esengelaki komonisa oyo ya nsambo, Bilembo Nsambo. Emoniseli 10:7, sikawa, bokomona yango. Bomoni?

157 “Mpe amonaki Mwanje yango kokita, Atiaki lokolo na mabelé mpe na mbu,” ezalaki Klisto, “azalaki na monamá likoló ya motó na Ye.” Bótala Ye, bokomona Ye lisusu na Emoniseli 1, “ná monamá likoló ya motó na Ye; Azalaki lokola libanga ya yasipi ná saladuane,” mpe bongo na bongo. Awa, Ayaki, atiaki loboko moko. . . “Lokolo moko na mabelé, mosusu na mai; atómbolaki loboko na Ye. Azalaki mpe na monamá likoló ya motó na Ye,” lisusu. Elingi koloba boyokani. Ye azalaki Mwanje ya Boyokani, oyo ezalaki Klisto; amitiaki mwa moke na nsé ya Banje, mpo na koyoka mpasi. Kuna Ayaki, “Atombolaki maboko na Ye na Likoló, mpe Akataki ndai na nkombo na Ye oyo azali na bomoi libela na libela,” Oyo ya Seko, Tata Nzambe, “ete ntango ekozala lisusu te,” ntango yango ekosalema. Ekómi na nsuka. Esuki. Esili.

158 Na nsima, Makomi elobi: “Na—na Nsango ya mwanje na nsambo ya mokili,” motindami na mokili, na Eleko ya Lingomba ya nsambo mpe ya nsuka, “na ebandeli ya lotómo na ye,” ntango ekobanda na mokili, na ntango yango, “libombami ya Nzambe, ya Bilembo Nsambo yango, esengeli koyebana na ntango yango.” Sikawa, tozali komona esika nini tokómi. Ekoki kozala bongo, baninga, ekoki kozala bongo? Bótala, nyonso ekoki kosalema.

159 Baoyo nyonso basilaki kosikolama na kati ya Buku, Ayaki mpo na lisiko na bango. Baoyo nyonso basengelaki kosikolama, bazalaki na kati ya Buku, babongisamá liboso, liboso na kozalisama ya mokili. Ayaki mpo na kosikola Yango. Baoyo nyonso Asiláká kosikola, bakomamáki kuna na kati.

160 Nalingi sikawa kotuna bino motuna moko. Ná bino baoyo bozali koyoka bande, bóyoka malamú. Miso ya nsómo wana, motó ya nsómo wana, ekoki nde kozala ntina oyo Nsango oyo etélemelaka mpenza basi ya mikolo oyo boye? Oyo ekoki kozala Nsango ya mwanje yango ya nsuka, boye te? Alobaki nini kuna, na ebale, eleki pene na mibu ntuku misato na misato? “Ndenge Yoane atindamaki,” bomoni, “mpo na kosakola boyei ya liboso ya Klisto, Nsango na yo ekosakola Boyei ya mibale.” Na mokili mobimba, mpe yango nde esili kosalema, na bongo, Boyei yango esengeli kokóma mpembeni. Bótala makambo oyo ezali kosalema sikawa.

161 Mpo na nini? Nakwanzaki motó na ngai. Nabalukaki na coussin na ngai. Natambolaki mwa moke. “Likambo nini ekómeli yo?”

162 Eleki mwa mikolo, natunaki bato mibale oyo nazalaki elongo ná bango na motuka. Mokolo moko natunáká Jack Moore. Bino nyonso boyebi Ndeko Jack Moore. Nazokende epai na ye na Shreveport. Nalobaki: “Ndeko Jack, ozali moninga na ngai ya

pene na mokili oyo.” Mpe liboso nátuna ye, natunaki mwasi na ngai.

<sup>163</sup> Soki moto moko ayebi likambo moko na ntina na ngai, bamabe na ngai ná—ná nyonso, ezali mwasi na ngai, bomoni, moto malamu. Nalobaki na ye mokolo moko, nalobaki: “Cherie, lokola mobali na yo, nazali motei ya Nsango-malamu. Nalingi te koyokisa nsoni na Moto oyo nalingaka. Te. Nalingi koyokisa yo mpasi te. Nakolinga te komemela yo nsoni. Nzambe ábatela ngai ete násala likambo moko te oyo ekoyokisa yo mpasi. Koleka boni likambo oyo ekoyokisa Nzambe mpasi, ndenge mpenza nalingaka Ye! Yo ozali mwasi na ngai; Ye azali Mobikisi mpe Nzambe na ngai. Nalingi kotuna yo motuna moko. Kotia mai na monoko te. Yebisa ngai solo.” Nalobaki: “Natángá nde mingi mpenza . . .”

<sup>164</sup> Mpe namitunaka. Naza, na—naza moto ya ezaleli ndenge, ya ndenge, ya kokamwa. Nayebi yango. Bato nyonso balobaka: “Oyo moto ya ndenge!” Ee, bomoni, okoki komisala yo moko te. Ozali oyo ozali, na ngolu na Nzambe.

<sup>165</sup> Na—na—nalobaki: “Nabungisi nde makanisi na ngai mwa moke, boyebi, mpe—mpe eningani moke?” Nalobaki: “Mpo na nini nazokweisaka ntango nyonso basi wana, na ntango oyo nalingaka bango?”

<sup>166</sup> Babengaka ngai, balobaki ete nazali “moyini ya basi,” nayinaka te . . .ete “nayinaka basi.” Bomoni? Ezali lokuta. Nalingaka basi, nalingi koloba, lokola bandeko na ngai ya basi.

<sup>167</sup> Nakobémbelisa bino te, na ntango oyo namoni ete bozali na libunga. Nakoki koyebisa bino yango. Nalingaka bino mingi mpenza mpo na kosala yango. Bato oyo bakosala bongo, ezali bolingo ya ndenge mosusu. Bomoni? Nalingi bino mpo nalingi oyo bozali; ozali molóngani ya mwana mobali moko ya Nzambe, mpe ozali eteni na ye. Bomoni? Mpe na—nalingi bino mpo—mpo bosálémá na elilingi ya mobali, mpe mobali asálémá na elilingi ya Nzambe, na yango, elongo, bozali moko kati na Klisto. Yango wana nalingaka bino. Nyonso oyo etikali ezali na ntina moko te. Nzambe ayebi yango, bomoi na ngai mobimba. Bomoni? Ya solo. Nalingaka bino. Mpo na nini nalingaka kotelema mpe ntango nyonso . . .

<sup>168</sup> Ntango balobaka: “Bóyebisa na basi nyonso, ete, soki bakei koyoka mateya ya Ndeko Branham, bábongisa suki na bango ndenge mosusu. Bálata ekoti to eloko moko to mosusu, mpo akobanda kopámela makambo ya suki mikuse, ná ba . . . Bápakola-pakola te,” mpe bongo na bongo ndenge wana. Yango nde basalaki. “Alobelaka kaka makambo yango!”

<sup>169</sup> Moto moko alobaki: “Mpo na nini te . . .” Alobaki: “Bato bandimaka ete ozali mosakoli. Mpo na nini oteyaka basi te ndenge ya koyamba makabo minene ya molimo, ná makambo

ya ndenge wana, na esika ya koluka koteya bango makambo ya ndenge wana?"

<sup>170</sup> Nalobaki: "Soki balingi koyekola ABC na bango te, ndenge nini bakoyeba algèbre?" Bomoni? Bóbongisa oyo esengeli liboso.

<sup>171</sup> Mpe koleka nazali koteya, koleka ezali kobeba. Na bongo, bokoloba: "Mpo na nini otikaka te?" Te misie. Esengeli kozala na mongongo moko, motatoli moko mpo na kotelemela yango.

<sup>172</sup> Moko na bato minene koleka na lotomo lelo, atiaki maboko na ye likoló na ngai, kala mingi te, alobaki: "Nakobondela mpo na yo, Ndeko Branham, soki opesi ngai nzela ya kosala yango, mpo Nzambe álongola likambo yango na motema na yo." Alobaki: "Tika basi yango kimia, na makambo wana."

<sup>173</sup> Nalobaki, nalobaki: "Misie, ondimaka makambo yango? Ozali motei ya bosantu."

<sup>174</sup> Alobaki: "Te. Nandimaka yango te, kasi," alobaki, "e—ezali likambo ya . . ."

Nalobaki: "Te."

Alobaki: "Ezali likambo ya bakengeli."

Nalobaki: "Bazali kosala yango te."

<sup>175</sup> Moto moko asengeli kosala yango. Ebale yango esengeli kokatisama. Loposo yango esengeli kolongolama na nzete. Ngai nalingi kosala yango te. Nzambe ayebi ete nalingaka kosala yango te. Mingi kati na basi yango baleisaka bana na ngai, mpe bakoki ata kopesa bomoi na bango mpo na ngai. Bókanisa naino, ná ngolu na Nzambe oyo Molimo Mosanto asopi likoló na ngai, bokanisi ete nakoki kofanda kimia, mpe komona moto komizindisa na kati na Seko kozanga elikia, mpe názanga kogánga makasi mpo na kotelemela yango?

<sup>176</sup> Ezali te likambo ya kozala mayele koleka bamosusu; kasi molimo ya ekólo oyo, molimo ya lingomba, ezali Molimo ya Klisto te, sikawa; molimo ya lingomba, ya denomination, ekotisi basi oyo na bosoto oyo nyonso wana kuna. Mpe nazali bobele mongongo oyo ezali kogánga: "Bóbima kuna. Bókima mbindo wana." Bótika te ete zabolo ásala bino likambo ya ndenge wana. Ezali mabe!

<sup>177</sup> Mpe bino ba-Assemblées de Dieu, botikaka basi wana, botikaka basi wana kokáta suki na bango, kasi bopekisaka bango ete bápakola-pakola. Mpenza, Likomi ata moko te etelemelaka kopakola-pakola, kasi oyo etelemelaka kokata suki na bino ezali. Biblia elobi ete abongi ata te mpo na kobondela liboso na Nzambe. Mobali na ye azali na ndingisa ya kobengana ye na libala mpe koboya ye. Ya solo. Azomitalisa na mokili lokola mwasi ya mbindo. Biblia nde elobi bongo. Azoyokisa mobali na ye moko nsoni ntango azosala bongo. Yango mpenza nde oyo Biblia elobi. Bomoni?

178 Ee, kasi mwasi oyo apakoli-pakoli, tomoni ete mwasi bobele moko nde asalaki yango na Biblia. Ezalaki Yezabele. Ezalaki nde ye. Moto bobele moko, na Biblia, oyo atikalá kopakola-pakola, ezalaki Yezabele, mpe Nzambe akabaki ye mbala moko lokola bilei na—na bambwá ya zamba. Akómaki eloko ya nsoni, mpe ata ye. . . Eloko nyonso, eloko nyonso ya nkanza ebéngamaka Yezabele.

179 Bozali na ntina ya kosala likambo yango te. Bozali na ntina ya kosala yango te. Kasi eloko nini esalaka ete bósala yango? Molimo ya zabolo.

180 Boyebaka yango te. Nayebi ete boyebaka te. Bozali—bozali bato malamu mingi. Bozali bato malamumu. Bopesaka ngai mbote ya loboko, bosololaka na ngai.

181 Mpe nalingaka bino. Ya solo. Kasi soki namoni yango, nakozala mokosi mpenza te. . . Polo alobaki: “Nabómbaki eloko moko te mpo na kopesa bino Toli mobimba ya Nzambe.” Tika ete makila ya mwasi moko to mobali moko te ézala na maboko na ngai na Mokolo wana. Nasili koyebisa bino Solo. Nayinaka kosala yango; ezali te ete nayinaka mpo naboyaka kosala likambo oyo Nzambe alobelaka ngai, kasi mpo nalingaka bino. Nalingaka koyokisa bino mpasi te, boye nakosala nini? Kasi Bolingo ya Nzambe, ya peto, ekotinda yo ósala yango.

182 Ata Yesu abondelaki mpo na kokima ekulusu. “Ekoki kosalema ete kopo oyo éleka?” Alobaki: “Ata bongo, mokano na Ngai te, oyo ya Yo.”

183 Ngai nde moto oyo asengeli koloba makambo yango? Ngai nde moto oyo asengeli kozua basi ya motuya wana, oyo ya malamumu mpe nyonso wana, mpe kozokisa mitema na bango? Ngai nde nasengeli kosala yango? Ngai nde nakosengela kozua bandeko na ngai batei, kotelema wana mpe koyebisa bango ete balingaka mbongo mpe de—denomination mingi koleka ndenge balingaka Nzambe? Ngai, mpo na bandeko na ngai balingami, baoyo batiaka maboko na bango. . . Oh, esengeli na ngai kosala yango? E Nzambe, kotika te ete násala yango.

184 Kasi nabombaki eloko moko te mpo na kopesa bino Toli mobimba. Bolingo ya solosolo nde etindaki ngai násala bongo.

185 Yango nde ntina Nsango oyo ezalaka boye? Ezalaka esika mosusu te na mokili. Ezalaka wapi? Malamumu. Bazali kobanga. Bomoni? Kasi ezalaka ya kobangisa te. Ya solo mpenza. Nzambe azalaka ntango nyonso bongo, bomoni. Malamumu. Yango nde ntina oyo basi bapámelamaka na Nsango oyo? Kozanga koyeba, emonisamaki te. Etalisamaki na ngai, kasi etikali koyela ngai te kino mokolo mosusu wana. Bomoni? Bótala kuna. Malamumu. Elongobani mpenza na lotómo.

186 Sikawa, bózela naino. Esilá kozala na ntango moko liboso, oyo mokili ekómá ya basi? Iyo. Kokokana na histoire, na mikolo ya Eliya, ezalaki na mwasi moko, nkombo na ye Yezabele.

Azuaki bokonzi likoló na lingomba ya Nzambe, oyo Biblia elobi ete akozua lisusu bokonzi na ntango ya nsuka; molimo na ye, na nzela na lingomba, ebongiseli. Akozala mwasi ya ndumba, mpe mangomba mosusu nyonso, elongo ná ye, bakozala basi ya ndumba, kaka lokola ye. Boye te?

<sup>187</sup> Emoniseli 17 elobi: “Azali mwasi ya ndumba, mpe azali MAMA YA BASI YA NDUMBA.” Ekoki kozala mibali te. Ezali basi. Bomoni? Mpe bango nyonso babwakamaki, na bomoi, kati na Libeke na Móto, mpe bazikisamaki. Ezali solo? Yango mpenza.

<sup>188</sup> Bótala, ntango Yezabele yango amonanaki liboso na bato, moto moko atelemelaki yango. Nzambe nde atelemisaki moto moko. Toyebi kutu te epai wapi autaki. Azalaki ata na mobóko ya lotómo te. Atikálá kozala nganganzambe te eloko moko te. Ayaki, mobange moko, moto ya zamba, ya makambo makasi, na nkombo ya Eliya, atiaki epasola na mosisa ya nzete, mpe bayinaki ye. Kaka yango te, kasi lingomba na bango mobimba eyinaki ye.

<sup>189</sup> Mpe na ntango moko, akanisaki ete atikali ye moko. Alobaki: “Te, Nazali lisusu na bato nkoto nsambo, oyo bazali sembo elongo ná yo.” Bomoni? Ezalaki etónga oyo ya baponami, bomoni. Etónga yango ezangaka te. Alobaki: “Kobanga te, Eliya. Nayebi ete ozali kokanisa ete yo osili mpo ba-denomination bakimisi yo kuna, likoló na ngomba. Kasi,” alobaki, “Nazali na bato nkoto nsambo oyo bandimaka makambo ndenge moko na oyo oteyaka. Omoni, Nazali na bango.”

<sup>190</sup> Bongo, nsima na eleko na ye, Roma ezuaki bokonzi, mpe ekómaki lisusu ntango oyo mokili ekómaki ya mwasi, bilátá-láta nyonso ya—ya basi, ndenge babimaka ná bikoti na bango mpe nyonso wana, bomoni. Mpe Nzambe atelemisaki moto mosusu ná Molimo yango moko likoló na ye, Molimo ya Elisa. Boye te? Mpe alobaki: “Epasola etiami na mosisa ya nzete.”

<sup>191</sup> Mpe ezalaki na mwa mobange mwasi moko kuna, alingá koswana, oyo abálaki ya ye. . . atikaki mobali na ye mpe abalaki ndeko na ye mobali, Elode. Elodia, mpe ye azalaki bipakólá-pakola ya mwasi na eleko wana, mpe kobina. Alakisaki mwana na ye ya mwasi lolenge ya kobina. Abotáká mwana moko ya mwasi, ná tata mobokoli na ye, ná ta—tata mobokoli; ná tata, ndeko na ye ya mobali. Elodia! Oyo wana azalaki mwana mwasi ya—ya—ya mwasi yango. Na bongo, alakisaki ye kobina, mpe ye akómaki mpenza mobini oyo alongolaka bilamba, lokola mama na ye. Akanisaki ete akokaki kobala mbala minei to mitano, kosala nyonso oyo alingaki.

<sup>192</sup> Mpe Elode ayaki wana. Bango nyonso bazalaki Bayuda, sikawa, bómikanisela. Bazalaki bato ya lingomba. Elode ayaki wana, ná lingomba na ye, mpo na koyoka mosakoli yango, bato bazalaki kondima ete azalaki mosakoli.



193 Akendeki mpenza mbala moko liboso na bango mibale, mpe alobaki: “Mobeko epesi yo nzela te ete óbála mwasi oyo.” Mpe likambo yango epesaki ye mpenza nkanda! Bomoni?

194 Sikawa, moto mosusu alingaki koloba: “Nsango nini, Elodia? Tosepeli mpenza koyamba bino na losambo na biso lelo.” Kasi Yoane te.

195 Yesu alobaki: “Nani bokendeki kotala, ntango bokendeki kotala Yoane? Bokendeki kotala moto oyo alati lokola nganganzambe? Te, bango bakoki, bango bapwepwaka babebé mpe bakundaka bibembe.” Bomoni? Alobaki: “Bokendeki kotala nini? Mopepe, mokékélé oyo eningisami na mopepe nyonso? Bakokaki koloba: ‘Yaka awa, Yoane. Tokofuta yo mbongo mingi koleka soki okómi koteya mpo na biso. Mpe, biso, tozali ebongiseli ya monene koleka?’” Yoane te. Te, akendeki kotala yango ata moke te.

196 Alobaki: “Bokendeki kotala nini, bongo, ntango bokendeki koyoka mpe kotala Yoane, mosakoli?” Alobaki: “Mpe Ngai nalobi na bino, azali koleka mosakoli! . . . bokoki koyamba yango, ye azali ye oyo mosakoli alobeláká, ete akoya: ‘Nakotinda motindami na Ngai liboso na Ngai, mpe akobongisa nzela ya Nkolo.’” Azalaki motindami ya Boyokani. Alobaki: “Ata moto moko te, oyo abótámá na mwasi, azali monene lokola ye.” Bomoni?

197 Yango nde lolenge ya moto oyo Nzambe atelemisaki mpo na mokolo wana, Eliya, moto ya zamba. Yoane, ndenge moko. Bomoni? Molimo ya Eliya ezalaki likoló na Yoane. Mpe Alobi, ntango eleko ya mwasi ekoya lisusu, ete Molimo yango ekotelema lisusu, “Liboso na Boyei na Nkolo, ntango mokili ekozikisama, mpe bayengebene bakotámbola likoló na—na mputulú ya bato na nkanza, lokola mputulú na nsé ya makolo na bango.” Alakaki yango, lisusu, na mikolo oyo. Bótala, Molimo Mosanto nde alakaki yango. Elongobani na eleko oyo tozali kobika na yango.

198 Moto moko asengeli kotelema. Yango esengeli koya, mpo ezali YANGO ELOBI NKOLO, Malaki mokapo ya 4. Yango mpenza oyo Ye alobaki ete ekozala embo: “Kaka liboso ya koya ya Mokolo monene mpe ya nsómo ya Nkolo, Nakotindela bino Eliya.” Mpe akosala nini? “Akozongisa mitema ya bana na Malakisi ya batata, kozóngisa na Biblia,” libanda na bokeseni ya ba-denomination oyo, “mpe kozongisa bango na Biblia, na Nzambe.” Yango nde eloko oyo akosala. Bótala ntango monene nini oyo tozali kobika na yango.

199 Basakoli yango bapamelaki basi ya mikolo na bango, mpe bango mibale bafutaki yango na bomoi na bango. Histoire ezotalisa polele ete bileko wana moko na moko ezalaki mokili ya mwasi, ntango basi bazalaki kokonza.

200 Bótala lelo. Tokozala na moko, Président moko, moko na mikolo oyo, ezomonana ete ekoki kosalema sikawa. Na

bosolo mpenza, ye nde azali Président. Bomoni? Mobali azali bobele mpo na komonana. Awa kala mingi te, na moko na bikólo mosusu, bato nyonso bazalaki kokumisa mpenza mwasi yango mingi, mpe nyonso wana, na lolenge ete Président, ye moko, alobaki: “Ngai nde mobali na ye.” Président ya États-Unis, bomoni. Mwasi yango nde abandaka ba-móde, mpe basi balandaka yango, bomoni, kaka ndenge Yezabele asalaki. Boyokaki liteya na ngai na ntina na *Losambo Ya Yezabele*. Boyebi. Boyebi makambo yango. Bomoni esika nini tokómi sikawa?

<sup>201</sup> Bomoni likambo nini esalemaki awa, eleki mpóso moko to mibale, awa na engumba? Motei ya lingomba Lutherien ya Kondima abengisaki sángó ya Katoliko ya Sacré-Coeur mpo áya koteya mpo na ye, mpe ateyaki, mpe motei ya lingomba Lutherien ya Kondima akendeki epai ya sángó ya Katoliko mpe ateyaki mpo na ye.

<sup>202</sup> Likita ya Mangomba ezali kuna sikawa, bazali koyangana na Roma. Mokanda na bango, oyo moninga na ngai ya malamú, David duPlessis; nafandaki kuna mpe nalobelaki ye makasi na ntina na yango, na Fourteen-Mile Creek, kala mingi te; ayebaki te ete akotisaki lingomba na kati ya Babylone mpenza, na ntango oyo bato nyonso bazalaki koloba: “Oh, mangomba nyonso ekokóma moko sikawa.” Iyo, nayebi yango, bomoni, yango mpenza nde ekomamaki na buku na ngai ya masakoli na mobu 1933, ete ekosalema. Ee, bozali koyeba te ete Satana nde azali kosangisa bango? Biblia elobi yango. Etikali moke, etikali mpenza moke, kaka ntango bakokóma moko, na bongo, ki-interdenominational yango ekosuka, bomoni. Elembo ya nyama na bino ekozala wana, ya solo. Bomoni?

<sup>203</sup> Nazali na ntango ya kokoba kolobela yango te, kasi, etikali pene na miníti zomi na mitano liboso na midí. Bomoni, nalingi kosilisa likambo oyo, kolobela likambo oyo. Nazali kaka kotia Makomi oyo awa, mpo bózala na makoki ya komona epai tokómi, nsima na yango, tokosilisa, nsima na miníti moke.

<sup>204</sup> Sikawa bójala eloko nini esalemaki mpenza. Ba—basakoli bapámelaki basi yango, na mikolo na bango, mpe babéngaki bango “bayini ya basi.” Ezali solo. Histoire ezotalisa polele ete ezalaki bongo.

<sup>205</sup> Sikawa, bozela mwa moke. Bino baoyo bozali kokoma Makomi, bosengeli kokoma Timoté ya Liboso 5:6. Biblia elobi: “Mwasi oyo azali kobika kati na—kati na bisengo ya mokili.” Ekoki kozala bisengo ya Nzambe te; esengelaki kozala yango, bomoni. “Mwasi oyo azali kobika na bisengo ya mokili asili kokufa, ata azali na bomoi.” Yango nde eloko oyo mosakoli alobaki, Santu Polo: “Mwasi oyo azali kobika na lolenge ya mokili oyo asili kokufa, ata azali na bomoi.” Mpe soki aboi mawa, akoki kokatisa ndelo ya bokabwani, epai oyo mpo na ye

esika ezali lisusu te. Na bongo, akómi wapi, ná miso na ye oyo bapakólá-pakólá, ná suki bakátá? Asili kokatisa ndelo, nzela ya kozonga ezali te, mpe lotómo moko esengeli kozala mpo na koteya ye. Kasi bómikanisela, na ntango yango, nyonso esili nye. Esili. Etikali kaka esika ya nsomo.

<sup>206</sup> Lotómo moko ekoya, oyo ekosala bikamwa ya minene, Joel alobaki bongo, kasi ntango ya lisiko ekozala lisusu te. Esili nye. Mwana-mpate asili kozua Buku na Ye, mpe basíkolami na Ye basili. Lokola Yesu ateyaki liboso mpe aboyamaki, na nsima akendeki epai ya baoyo bazalaki na esika ya nsomo, ateyaki baoyo bazalaki na boloko, baoyo bakokaki kobongola motema te, ntango ya lobiko ezalaki lisusu te, lotómo yango moko esengeli koya lisusu. Bongo soki ekokaki kozala Pull ya Misato? mpo na baoyo babungi Seko. Bongo soki ezali yango? Nazolikya ete ezali yango te. Bongo soki ezali yango? Bókanisa naino mwa moke sikawa. Bongo soki ezali yango? Nzambe ábatela. Nazali na bana. Bomoni? Kasi ezali komonana ete ekómi mpenza pene awa.

<sup>207</sup> Mpo na nini emononeli yango eyaki ntango nazalaki mwana moke? Mpo na nini nakanisaki na ntina na yango liboso te? Mpo na nini namemamaki na molimo kuna, na chambre, mokolo wana, elobaki: “Yango oyo”? Ezali mpenza katikati na ba- . . . mi—milimo oyo ebúngá. Mpe Yesu ateyaki bango, atitolaki, kasi ba—babongolaki mitema ata moke te. Mpe koleka nazali koteya, koleka bazali kokóma mabe. Kobongola motema ezali te. Esika mpo na yango ezali te.

<sup>208</sup> Mwana-mpate azuaki Buku na Ye, ntango Elembo ya Nsambo elingaki kofungwama, Elembo ya Motoba. Bómikanisela, Abómbaki Elembo ya Nsambo na miso na biso. Alingaki kosala yango te. Na ntango oyo Mwanje azalaki wana, mokolo na mokolo, mpo na komonisa yango, kasi Aboyaki kosala yango mpo na oyo wana. Alobaki: “Kimia ezali na Likoló.” Moto moko te ayebaki. Ezalaki Boyei ya Nkolo.

“Oh,” okoloba, “ekoki kosalema te.” Nazolikia ete ezali bongo te.

<sup>209</sup> Tópusana lisusu mwa moke awa. Nakomáki likambo moko, bomoni. Malamu.

<sup>210</sup> Bómikanisela: “Mwasi oyo azali kobika na bisengo ya mokili,” na makambo ya mokili, kosala makambo lokola yango. Akoki kokende na losambo mpe kosala lokola mosanto moko, etali yango ata moke te, bomoni, kasi, “asili kokufa, ata azali na bomoi.”

<sup>211</sup> Bótala oyo ba-denomination ekómisi mwasi. Bakómisi ye mosaleli ya Liloba ya Bulee, yango ekeseni na Biblia. Bakómisi ye motei. Yango epekisami na Makomi. Basali kutu ete sikawa ákoma mokambi, moyangeli ya engumba, bakonzi ya etúká, eloko nyonso kati na ekólo, mpe motei na ndako ya Nzambe.

212 Nzokande, akwei na masumu nyonso oyo etikálá kosalema, ye nde mobandisi na yango. Ya solo. Sikawa, nazali te, nazali kolobela bandingisa te. Akwei. Ye nde asálá ete bebé nyonso abótámá mokúfi-miso. Mpo na ye nde ba-nkunda nyonso etímolámá. Ye nde asálá ete lisumu, bokono, mawa, ézala. Ambulance moko ekoki kobeta ntangwa te, soki mpo na mwasi te. Moto akoki kobomama te, lisumu moko te, kufa moko te, mawa moko te, mpasi moko te ekoki kozala, soki mpo na mwasi te. Mpe Nzambe apekisi ye kokende koteya na eteyelo, kasi, ata bongo, bazali kosala yango. Denomination, bomoni epai ekómi?

213 Mwasi akómi nzambe. Zabolo azali mpenza kosala mosala! Ee, Bakatoliko bakómisi basi ba-nzambe, bakómi kosambela bango; ya solo, nzambe Maria, mpe bongo na bongo. Nayoki ete, na Likita ya Mangomba, balobaki ete ekosalema ete bakosambela Yesu mwa mingi koleka, soki ekoki kosunga ete ba-Protestant bákota. Bomoni? Bomoni? Oh, bapakoli yango sukali! “Abongwanaka te,” ndenge balobaki. Bomoni? Ezali kaka molimo mabe oyo ya kala. Biblia elobi: “Mpe asalaki ete bango nyonso bázua elemba na nyama na elongi na bango, baoyo nkombo na bango ekomamaki te na Buku ya Bomoi ya Mwana-mpate.”

214 Nazali kolobela nde Lingomba oyo eponámá liboso, baoyo bazali kuna na libanda te. Te, misie. Kati na lisanga moko na moko, Asili kobenda baponami na Ye. Mpo na bango nde Azali koya, na eleko moko na moko.

215 Kasi ye mwasi azali wana. Ye wana. Ezali ye; akómi koteya Liloba, komaniola Liloba, akómi nzambe, mpe mobandisi ya masumu nyonso. Biblia elobá: “Napesi nzela te ete mwasi áteya, to ázua bokonzi, kasi ázala na botosi, ndenge mo—mobeko mpe elobi.” Bomoni? Akoki kosala yango te. Kasi bakokómisi ye mokambi ya mboka, moyangeli-engumba, mokonzi ya etúká; kala mingi te, akokóma Président. Na ntembe te. Ezali yango mpenza. Ezali lolenge wana, ezali lolenge wana nde ekosalema, bomoni. Mpe bato bazali kosala bongo mpo bazali na ntina ya Liloba oyo te. Bakomona yango ata moke te.

216 Bótala Bayuda oyo bazalaki wana, bato ya mayele mingi, bato malam. Mpe Yesu alobaki: “Bozali bana ya tata na bino, zabolo.”

217 Bongo soki nalekisi Ye na esambiselo sikawa, liboso na bino? Tómeke yango naino mwa moke, mpe Nzambe álimbisa ngai ndenge nakozua ngámbo ya kotelemela Ye; kasi ezali mpo na kolakisa bino likambo moko, kaka miniti moko.

218 Bongo soki olobi: “Ee, ngai, nkembo na Nzambe, nalobaki minoko na sika! Aleluya! Nayebi. Ngai, iyo, na—nazali na Yango. Nzambe ápambolama. Iyo!” Ah iyo, ezali bongo?

219 Bómikanisela libota ya Yisraele. Biblia elobi, nsima na Ye kobimisa libota yango, mpe kobikisa bango libanda na Ezipito,

Abomaki bango mpo balandaki Nsango te. Bomoni? Baliáká mána kouta na Likoló. Baliáká mána oyo Nzambe akitisáká lokola mbula na mabelé, mpo bango bália, mpe bazaláká liboso ya motindami, bamonáká Likonzi na Móto, bayokáká Mongongo ya Nzambe, mpe bamonáká yango kokokisama. Na nsima, lokola basepelaki kondimela Kora: “Bato ya bulee bakoki kozala mingi koleka. Bato bakoki kozala *boye, boye to boye*. Biso mpe tosengeli kozala bulee. Tosengeli kosala makambo nyonso *oyo*. Bato nyonso bazali bulee.”

Nzambe alobaki: “Kabwana na bango. Zala mosika na wana.”

<sup>220</sup> Mose alobaki: “Baoyo nyonso bazali na ngámbo ya Yawe báya elongo ná ngai.” Ya solo. Bomoni? Mpe Afungolaki mabelé mpe Azindisaki bango. Bomoni?

<sup>221</sup> Bango mpe, bazalaki bato malamumu. Na ntembe te. Bazalaki bato malamumu. Iyo, misie, kasi oyo wana ekokaki te. “Ezali te baoyo nyonso balobaka: ‘Nkolo, Nkolo,’ kasi moto oyo akosala mokano ya Tata na Ngai.” “Ezali te ye oyo abandí; ezali ye oyo akómi na nsuka.” Yango nde, nzela ya mokuse ezali te; okotiana mpembeni na nsuka ya kopota mbangu. Nzela ya mokuse ezali te. Osengeli koyela bobele lolenge oyo Makomi elobi.

<sup>222</sup> Soki Elobi: “Bongola motema, mpe bátisama na Nkombo na Yesu Klisto, mpe okozua likabo ya Molimo Mosanto,” nzela ya mokuse ezali te, kopesana mbote ya loboko, kokota na lingomba to na denomination. Landa Nzela yango! Soki okufi na yo moko te, mpe obotami na Molimo ya Nzambe te, o—o—obungi. Esili. Nzela ya mokuse ezali te.

<sup>223</sup> Okoloba: “Ee, nazali moto ya lingomba.” Nayebi. Ezali malamumu. “Ee, mama na ngai. . .” Natie yango ntembe te, kasi nazali koloba nde na yo. Bomoni? Osengeli kolanda Nzela yango, mpo nzela ya mokuse ezali te; okotiana mpembeni, na Kosambisama. Landá kaka Nzela moko wana.

<sup>224</sup> Nzela ezali kaka moko, mpe Klisto azali Nzela yango. Mpe Klisto azali Liloba oyo ezali kobika kati na yo, oyo etatolaka makambo nyonso oyo Alakaki na eleko na yango. Bomoni? Bososoli yango? [Losambo balobi: “Amen.”—Mok.] Malamumu. Bótala sikawa.

<sup>225</sup> Bato mosusu balobaka: “Bato oyo bazali bato malamumu.” Ya solo. Nalobi te ete bazali bato malamumu te. Nalobi te ete Santu Cecile ná bamosusu nyonso bazalaki basi malamumu te; mama na ngai mpe azalaki bongo, kasi, ya solo, nasambelaka ye te. Ata moke te. Ya solo, nasilá komóná bato mingi ya malamumu, kasi bazali banzambe ya basi te. Bazali basi, mibali. “Molobeli azali bobele moko katikati na Nzambe ná bato.”

<sup>226</sup> Na bongo, mpo na nini, mpo na nini moto, Pantekotiste, moto oyo ayebani na mokili . . . mokanda oyo Ndeko duPlessis, ndeko na biso ya motuya, azali kotambwisa. Ntango mosusu

bamosusu kati na bino bazali na yango. Afandaki . . . Iyo, bozali na yango. Na Likita ya Mangomba, mpembeni na pápa, mpe alobaki: “Ezalaki likambo ya molimo mpenza.” Ezali lisosoli ya molimo, boye te? “Oh, Molimo ya Nkolo ezalaki kuna, likambo ya molimo mpenza.” Iyo. Yango mpenza.

<sup>227</sup> Mpo na nini? Mpo ezali libaku malamumu ya kosangisa ba-Protestant ná oyo wana esika moko, eloko oyo tobundisi mibu ebele, mpe Biblia endimisi yango mpe eyebisaki biso ete yango nde ekokóma. Mpe biso . . . moko na bakambi na biso ya minene koleka amikotisi mbala moko kuna, alobaki: “Ezali malamumu. Yango nde tosengeli kosala,” mpe lingomba mobimba ya ba-Protestant ezali kokweya na motámbo yango.

<sup>228</sup> Ndenge moko mpenza, soki botali yango malamumu, ezali YANGO ELOBI NKOLO. Liboso, Liloba elobaki yango. Na nsima, Molimo ya Nkolo elobaki, na 1933, elobelaki makambo mosusu nyonso oyo, ete bikólo ekokota na etumba, mpe ndenge ba-masíni ekokóma, mpe makambo nyonso ndenge wana, mpe elobaki ete yango mpenza nde ekosalema na nsuka. Mpe yango oyo. Ekwéyá naino te. Tozali komona ete ebandi kozua lolenge.

<sup>229</sup> Boyebi lisusu liteya na ngai, na ntina na *Losambo Ya Yezabele*, kala mingi te? Bóyebi lisusu ndenge Elisa azalaki kotambola na nzela na ntongo wana, mpo na kolobela bango? Oyo wana, nateyaki yango. Bomoni? Mpe ndenge nalobaki yango liboso, ete ntango ekoya, oyo Likita ya Mangomba yango, sukasuka, ekokóma elembo ya nyama, mpo ekosangana ná nyama. Ezali kosalema. Na mobu na ngai, nasili komona yango. Mpe tala ba-Protestant, ba-milió na milió, bazali kokweya na motámbo yango. Mpo na nini? Yango nde bazali koluka.

<sup>230</sup> Bazali bakúfi-miso! Yesu alobaki na Bafalisai wana: “Bozali bakúfi-miso oyo bazali kokamba bakúfi-miso. Soki mokufi-miso akambi mokufi-miso,” Alobaki, “bango mibale bakokweya na libulu, boye te?” Mpe kuna nde esika bazali kokweya. Ndenge nini nakokaki kondima ete moto oyo azalaki elongo ná ngai mpe asololaki na ngai, ákoka kofanda mpe koloba makambo ya ndenge wana! Bomoni: “Ebombami, na miso ya bato na bwanya ná mayele, mpe Emonisami na bana mike oyo balingi koyekola.”

<sup>231</sup> Nayebi ete mokolo moko, ekoluka liwa na ngai. Ezali solo. Ekosalema, kasi awa Solo ezali koyebana. Iyo.

Moto ya liboso oyo akufaki mpo na mwango  
 oyo ya Molimo Mosanto,  
 Ezalaki Yoane Mobatisi, kasi akimaki te,  
 akufaki lokola moto;  
 Na nsima, Nkolo Yesu ayaki, babakáki Ye na  
 ekulusu,  
 Ateyaki ete Molimo ekobikisa bato na  
 masumu. (Boye te?)

Na nsima, babomaki Etieni na mabanga, na mateya na ye, atelemelaki masumu, Apesaki bango nkanda makasi, bapanzaki motó na ye;

Kasi akufaki kati na Molimo, akataki motema, Mpe akendeki kokutana ná bamosusu, bato mingi oyo basilaki kopesa bomoi na bango.

Petelo ná Polo, ná ntóma Yoane, Bapesaki bomoi na bango mpo Nsango-malamu éngenga; (Basalaki nini?)

Basangisaki makila na bango, ná oyo ya basakoli ya kala,

Mpo Liloba na Nzambe, oyo ya solo, éteyama na bosembo.

Milimo na nsé na etumbelo, ezalaki kogánga: “Kino ntango nini?”

Mpo Nkolo ápesa bitúmbu na bato nyonso oyo basalaki mabe;

Kasi bamosusu mpe bakopesa makila ya bomoi na bango, (Iyo, ya solo.)

Mpo na Nsango-malamu ya Molimo Mosanto mpe mbónge na yango ya motáne.

Ezali kokóba kotanga makila.

<sup>232</sup> Iyo, ekosalema bongo, mokolo moko, kasi nazali kozela ngonga wana, ntango nyonso ekosila.

<sup>233</sup> Ndeko mwasi moko auti kolota ndoto. Atindelaki ngai yango, alobaki: “Namonaki bango, lingomba yango ebongisaki lolenge moko,” ekoboma ngai, na nkukú, na ntango moko boye, ntango nazali kobima na motuka na ngai, “mpo na kokota, bakobeta masasi longwa na . . .” kasi alobaki, “na nsima, Molimo elobaki: ‘Sikawa te, kasi ekosalema nsima.’” Iyo.

<sup>234</sup> Nzambe ábatela ngai ete nákakola eloko moko te. Nayebi eloko mosusu te, bobele Yesu Klisto, oyo Abakámaki na ekulusu. Tozali kobika na ntango moko ya nsómo. Lisumu nde esali bongo. Iyo. Ba—babomaki Etieni na mabanga. Bakátáki motó ya Yoane, mwasi wana. Nayebi te ndenge biso tokopesa oyo ya biso, kasi ekosalema mokolo moko. Malamu, bótala.

<sup>235</sup> Na Santu Yoane, soki bozalaki na mposa ya Likomi mpo na yango. Santu Yoane 6:49, ezali esika oyo baliaki mána, mpe Yesu alobaki: “Mpe bango nyonso bakufaki.”

<sup>236</sup> Okoloba: “Ee, ndeko na ngai ya—ya mwasi, na—namonaki mwasi oyo kobína na Molimo.” Oh iyo. Ah-hah. “Namonaki ye kosala yango. Namonaki ye koloba minoko na sika. Namonaki ye . . .” Iyo.

<sup>237</sup> Yesu alobaki: “Mingi bakoya epai na Ngai mokolo wana, mpe bakoloba: ‘Nasalaki makambo nyonso oyo.’” Bomoni? “Baliaki

mána na biliki,” Yesu alobaki, “mpe bango nyonso bakabwaná, mpo na Libela. Bakufá.” Elingi koloba bakabwani mpo na Libela. Bakufaki kaka kuna na lisobe.

<sup>238</sup> Bómikanisela Baebele, mokapo ya 6: “Baoyo basilaki koyeba Solo, kasi baboyaki kotámbola kati na Yango, bakoki lisusu kobongola motema te.” Bomoni, mondimi ya ndelo-. . . Ntango Solo epesameli moto mpo na mbala ya nsuka, kasi baboyi koyamba Yango; kokokana na Buku ya Baebele, bomoni, bako. . . ezali ata na eloko moko te na mokili, oyo ekokoka kobikisa bango.

<sup>239</sup> Mpo na bango, esili nye. Kobongola motema te, kosikolama te, eloko moko te etikali mpo na bango. Bakabwani mpo na Libela. Biblia nde elobi bongo: “Etikali bobele kotalela nkanda mpe móto ya nsómo oyo ekozikisa batomboki.” Mpe ntango Solo ya Nsango-malamu etalisami polele, mpe etatolami na mobimba, kasi babaluki mpe bakei mosika na Yango, esili mpo na bango. Esili nye. Ezali nsomo, kasi nasengeli koloba yango.

<sup>240</sup> Bómikanisela Banje oyo babatelaki lokumu na bango ya liboso te, kasi babatelami kuna na esika ya boloko wana, kati na molili, esika oyo mokili ezali kotambola lelo na kati na boloko yango moko, kobongola motema ezali te.

<sup>241</sup> Bómikanisela, eleki mwa mibu, ntango nautaki na Chicago, nalobaki: “To Amerika ekoyamba yango mobu oyo, to ekoyamba yango lisusu ata moke te.” Bomoni esika nini ekómi? Iyo.

<sup>242</sup> Sikawa nazali komituna soki ekoki kozala Pull ya Misato? E Nzambe, tika ete ézala mosika na yango! Yango nde ntina ya Pull ya Misato? Ekoki kozala bongo? Oh, la la! Bókanisa naino, baninga. Bókanisa naino; nalingaka kokanisa yango te.

<sup>243</sup> Yesu alobaki: “Lolenge ya bokosi oyo. . .” Soki bolingi kokoma yango, ezali na Matai 23, -nsambo. Na—nakomaki awa: “kotánga yango,” kasi bokoki komona. “Bino, Bafalisai bakúfimisó!” Tika ete. . .

<sup>244</sup> Bokoki kopesa ngai lisusu mwa miníti moke? [Losambo balobi: “Amen.”—Mok.] Tótala naino. Tózua yango, mpo nakomaki “kotánga yango.” Eloko moko ezalaki kuna, oyo nalingi kotánga liboso. . . Sikawa, ntango mosusu nakotika makambo mosusu mpembeni, kasi to—tózua naino eteni oyo mwa moke. Matai 23, bozela naino, malamú, mpe tokobanda na molongo ya 27. Bóyoka sikawa. Bótánga yango mobimba ntango bokozonga na ba-ndako, soki bolingi. Totikali kaka na miníti moke.

<sup>245</sup> Sikawa bótala malamú, awa. Matai 23, bóbanda na molongo ya 27: “Mawa na bino, bakomeli!” Sikawa, bómikanisela, Azali koloba na bato ya búlee.

*Mawa na bino, bakomeli, mpe bino Bafalisai, bakosi!  
mpo bozali lokola malita oyo epakolami mpembe (elingi*



koloba bato bakufá, bomoni), *malita oyo epakolami mpembe, oyo na libanda emonani kitoko mpenza, kasi na kati etondi na mikuwa ya bakufi mpe bosoto ya ndenge nyonso.*

246 Bokósi, ná bilulela ná koswana, na kati na bango; na libanda: “Ngai nazali Molakisi *Songolo-pakala.*”

*Bino mpe ndenge moko, na libanda bomonanaka mpenza bayengebene na miso ya bato (bótala Likita ya Mangomba ná ba-Pantekotiste oyo bafandi kuna), kasi na kati bozali botóndi na bokósi ná masumu na nko.*

247 Lisumu na nko ezali nini? Likambo oyo oyebi mpenza ete ezali malamau, kasi oboyi kosala yango. Yesu, sikawa bótala eloko oyo Ye . . . na ekeke nini Ye atii yango sikawa.

*Mawa na bino, bakomeli mpe Bafalisai, bakosi! mpo botongaka malita ya basakoli mpe bokómisaka kitoko malita ya bayengebene, . . . (Bomoni, “Oh, basakoli!”)*

*Mpe bolobaka: Soki tozaláká na mikolo wana ya batata na biso, mbele tosonianaki na bango te mpo na kosopa makila ya basakoli.*

248 “Tolingaki kondima Liloba ya Nkolo, soki tozalaki na eleko wana.” Bótala malamau.

*Boye bozali kotatola bino moko mpe komikweisa ete bozali bana na baoyo babomaki basakoli.*

*Yango wana, bósilisa mosala oyo batata na bino babandaki.*

249 Yango nde mpenza eloko oyo ezali kosalema. Sikawa bótala likambo oyo Alobi awa.

*Bino banyoka, mpe bana na bitúpa, bokokíma ekweli ya lifelo ndenge nini?*

250 Bokokima yango ndenge nini? Sikawa, Azali koloba na batei, bomoni, ezali solo, bato ya búlee. Ndenge nini bokoki kotikala kuna, wana boyebi ete Biblia esili koloba yango liboso mpe eyebisi bato ete básala bongo te, kasi botikali kuna mpe bozali kokakola yango, mpo na mwa ba-dollar ya nsolo mabe, mpo na lokumu moko boye, mpo moto moko ásimba-simba yo na mokongo mpe bábenga yo “Molakisi”? Ndenge nini okoki koloba ete olingaka bato yango?

Nazali mpe koteya na nzela na ba-bande. Bomoni?

251 Ndenge nini okoki, ndenge nini okoki koloba ete olingaka bato yango, kasi otiki likambo ya ndenge wana kosalema? Bomoni? Bino—bino Bafalisai, bino bakúfi-miso, bino banyoka, bino libota ya bitúpa, ndenge nini bokokima ekweli ya lifelo? Ntango bino . . . Ndenge nini, lelo, moto oyo ayebi ete makambo oyo ezali mabe, kasi atikali kuna mpo na kobatela eyanganelo na ye, mpo denomination na ye ékóma monene, kasi aboyi

kolobela basi ná mibali? Ndenge nini bokokima nkanda ya lifelo, ntango oyo esalemaki mpo na bino? Ndenge nini bokosala yango? Bomoni?

<sup>252</sup> Bóyoka, bóyoka likambo oyo. Likambo nini ekosalema? “Yango wana. . .” Molongo ya 34.

. . . tala, nakotindela bino basakoli, . . .

<sup>253</sup> “Nakotinda,” na mikolo ekoya. Tala Bafalisai na bino, bakoya lisusu. Bomoni?

. . . bato na bwanya . . . bakomeli: bokoboma bamosusu  
mpe bokobáka bamosusu na ekulusu; mpe bokobeta  
bamosusu fimbo na ba-sinagoga na bino, mpe  
bokonyokola bango na engumba na engumba:

<sup>254</sup> Alobaki liboso ete Akotindela bango basakoli, ná Liloba ya Nkolo. Mpe bakosala nini? Likambo moko oyo ba-tata na bango basalaki, mpo yango nde oyo bozali. Bomoni, milimo ekufaka te. Bato oyo bakonzamaka na yango bakufaka, kasi milimo ekufaka te. Alobaki: “Bozali bana. Bino nde bato yango.” Mpe bótala ndenge makambo yango ezali kosalema.

<sup>255</sup> Santu Polo atelemaki wana (bondimaka ete azalaki mosakoli?) mpe akweisaki basi, mpo bazalaki kokata suki na bango; akweisaki bibongiseli na bango; alobaki ete moto nyonso oyo abatisamaki na Nkombo na Yesu Klisto te asengelaki koya kobatisama lisusu. Ya solo.

<sup>256</sup> Lelo, bakómi kokakola yango mpe kolembisa makasi na yango. Bakoki kosala ndenge mosusu te, ata bongo. Ezali mawa. Soki ngonga esili, nakoki koloba boye, bomoni: bazalaki bakúfi-miso, babongisamá liboso mpo bázala bakúfi-miso. Nzambe yoka mawa. Bakokaki komona yango te.

<sup>257</sup> Yesu alobaki: “Bozali bakúfi-miso. Bino bakomeli mpe Bafalisai, bakúfi-miso, bino bakosi! Na ntango oyo botángaka Liloba moko oyo bango nyonso batángaka, mpe bino boyei kokweisa Ngai. Mpe Nazali mpenza oyo Liloba elobaki ete ekosalema na mokolo oyo. Ngai nde nasengelaki kozala Motindami ya eleko oyo. Ngai nazali Masiya,” Alobaki bongo, na maloba mingi mpenza. “Ngai nazali Masiya. Natalisi yango polele te? Soki Nasali oyo ekomamaki mpo na Ngai te, na bongo, bókweisa Ngai. Mpe bino Bafalisai, bakúfi-miso, bozali komema bato na bino na kati ya eloko ya ndenge wana, mpe kotinda bato nyonso.” Alobaki: “Ee, mokúfi-miso azali kokamba mokúfi-miso.” Alobaki: “Bino. . .”

<sup>258</sup> Bolobaki: “Oh, soki tozalaki na ntango ya Santu Polo, iyo, nalingaki kozua ngámbo ya Santu Polo.”

<sup>259</sup> Bino bakosi! Bomoni? Mpo na nini bozali kozua ngámbo na Malakisi na ye te? Bolingaki kosala ndenge moko na ntango wana ndenge bozosala lelo, mpo bozali bana ya batata na bino, batata na bino ya bibongiseli: Bafalisai, Basadukai ná baoyo

bamimonaka bayengebene. Ezali—ezali bongo. Ah-hah. Nalobi na bino, mpe—mpe na ngonga oyo tozali kobika, nazali komituna soki oyo ekoki kozala Pull ya Misato? Bozela mwa moke sikawa, bomoni, Yesu alobaki: “Bato ya lolenge oyo bakozua ekweli ya monene koleka.” Bomoni? Ezali mpasi, boye te?

<sup>260</sup> Lokola Americain monene moko, mokolo moko, ntango monguna alingaki kobótola ekólo oyo, moto moko, na ngonga ya minuit, amataki na mpunda mpe akendeki na nzela, kobebeleká: “Monguna azali koya!” Ezalaki Paul Revere.

<sup>261</sup> Ngai mpe nazali Americain. Naye na ngonga ya minuit oyo, nazali koloba te ete monguna azali koya, kasi azali awa! Azali koya te; asili kozala awa! Asili kolóna. Nazobanga ete likambo esili; azolóna, na ngonga ya minuit oyo.

<sup>262</sup> Bómikanisela, na Tucson, Banje nsambo yango, Nsango yango ezalaki oyo: “Nsuka ya libombami ya Nzambe.” Kaka nsima na yango, nazalaki kokita bangomba . . .

<sup>263</sup> Bino nyonso boyokaki na ntina na bangomba yango. Bótala. Ndeko Fred akangaki yango mwa ba-fotó, ná Ndeko Tom. Mpe ngai nazali na ba-fotó mosusu, ba-filme mosusu, nyonso wana. Tokolakisa yango awa, mokolo moko, tokolakisa bino esika yango esalemaki. Bino nyonso boyebi lisolo yango.

<sup>264</sup> Bótala, nsóngé ya ngomba misato. Alobaki: “Tala oyo ya yo ya Liboso, ya Mibale mpe ya Misato.”

<sup>265</sup> Mpe Ndeko Fred akangaki yango fotó moko ya malamau mpenza, ntango ye ná Ndeko mwasi Martha balekaki kuna. Mapatá esilaki komata uta na londendé ya mabelé, mpe esilaki kobomba bansóngé mosusu oyo etikali, etalisaki kaka Pull Misato; moko *awa*, moko *awa* mpe moko *kuna*. Bomoni? Nsambo!

<sup>266</sup> Bótala malamau, oyo ya Liboso, misato. Misato ezali bobongi be. Oyo wana ezali ntango lotómo ebandaki.

<sup>267</sup> Pull ya Mibale ezalaki lisosoli ya milimo, lisakoli. (Ya Liboso ezalaki kobikisa babeli.) Ya Mibale ezalaki lisakoli oyo ebandaki, mpe eyebaki sekelé ya makanisi, ntango Liloba Yango moko emitalisaki polele. Yango, ezali ngolu.

<sup>268</sup> Kasi, bómikanisela, ya nsambo ezali nsuka. Oyo ekoki nde kozala Pull ya nsuka, ete nyonso esili nye? Ekoki kozala yango? Bókanisa naino sikawa. Bókanisa naino. Bokómi wapi? Bomoni? Nsambo elakisaka ntango nyonso nsuka. Pull Misato!

<sup>269</sup> Lotómo na Yesu ezalaki na Pull Misato. Boyebaki yango? Bótala! Bózala sembo, soki bosílá kozala sembo na bomoi na bino, bózala sikawa sembo mwa moke, na miníti moke.

<sup>270</sup> Pull na Ye ya Liboso ezalaki kobikisa babeli. Akómaki moto ayebani mingi. Bato nyonso bazalaki kondimela Ye, emonanaki bongo. Boye te? Ntango Abandaki kobikisa babeli, bato nyonso bazalaki na mposa na Ye na losambo na bango.

271 Kasi mokolo moko, Abalukaki mpe Abandaki kosakola, mpo Azalaki Liloba, mpe Azalaki Mosakoli oyo Mose alobeláká. Mpe ntango Akendeki kolobela bango, mpe koyebisa bango bomoi na bango, ná makambo oyo bazalaki kosala, bakomaki kosepela na Ye mpenza te. Ezalaki Pull na Ye ya Mibale.

272 Nazali komituna soki etalisami lisusu awa te? Bókanisa naino mwa moke. Ekoki kozala bongo? Ya Liboso, lobiko na nzoto, bato nyonso. Ya Mibale: “Oh, ekoki kozala makambo ya ba-Jésus Seul. Ekoki kozala Belezebula, ekoki kozala...” Ezali likambo yango moko oyo basalaki kuna. Bomoni? Milimo yango moko ezali kobika na kati na lolenge yango moko ya bato, bato bakweisámá, oyo bakoki kobikisama ata moke te, mpo basilaki kokweisama liboso; bazali lokola Yudasi Mokeliota, oyo abotamaki mwana ya libebi.

Bokoloba: “Yudasi?” Na ntembe te.

273 Bómikanisela, azalaki mosambeli monene, kasi akokaki kokende kino na nsuka te, elongo ná Nsango yango. Akokaki kondima eteni na yango, kasi oyo etikali, akokaki koyikela yango mpiko te. Bakoki kondima lobiko na nzoto ná makambo ya ndenge wana, kasi ntango ekómi likambo ya Nzambe alobi mpe bisende ekelami, na ntango wana ekómi na bozindo mingi koleka mpo na bango. “Ekoki kosalema te!” Oyo wana nde Yudasi. Molimo na ye ekoki kobika kino esika wana. Akoki kokende mosika koleka te. Bomoni?

274 Bakokaki kondima Mose ntango afungolaki Mbu Motane, mpe bongo na bongo ndenge wana. Kasi ntango ekomaki likambo ya koyebisa bango ete basengelaki te, ete bato mosusu nyonso basengelaki te kosala *boye* na *boye* mpe *boye*: “Azali komikómisa Nzambe, likoló na bizo.” Bomoni, bakokaki kondima yango te, Kora ná bamosusu. Boye, esengelaki na bango kosala ebongiseli, boye, Nzambe asalaki ete mabelé émela bango.

275 Lotómo ya Yesu, ntango Azalaki kobikisa babeli, “Azalaki malamungu mingi, elenge Mosakoli oyo ya Galilai! Ee, Azali kofungola miso ya bakúfi-miso. Asekwisi ata bakufi. Tozali na ndakisa misato na yango. Asekwisaki mpenza bakufi.”

276 Kasi mokolo moko, Abalukaki, Alobaki: “Bino libota ya bitúpa. Bopétolaka libándá ya saáni. Bomonanaka lokola basantu, kasi kati na bino, bozali eloko te bobele banyoka.” Oh, ntango lisakoli yango epesamaki, kokweisáká ebongiseli yango, na nsima, makambo ebongwanaki. Babalukelaki Ye. Ya solo. Mpe sukasuka, na koboyáká Ye, babákaki Ye na ekulusu.

277 Kasi Lotómo, bokoki koboma yango te. Ekóbaka kobika. Bokoki kolalisa motindami mpongi, kasi bokoki kolalisa Nsango mpongi te. Iyo. Ya solo. Akobaki kobika. Mpe bótala ntango Pull ya Misato ya lotómo na Ye ebandaki. Ya Liboso ezalaki kobikisa babeli.

278 Ya Mibale ezalaki kopamela bibongiseli, mpe kosakola; oyo basiláká kosala, oyo bango bazaláká, mpe eloko nini ezalaki koya. Oyo ezali, oyo ezali, ekoya; ná oyo ezalaki, oyo ezali, mpe oyo ekoya. Yango nde eloko oyo Asalaki. Boye te?

279 Kasi Pull na Ye ya Misato ezalaki ntango Ateyaki babúngi, baoyo bakokaki kobikisama lisusu te. Bazalaki kuna, epai miso minene oyo bapakólá-pakólá ezalaki: “Hun, hun!” Ateyaki milimo oyo ezalaki na ewelo, baoyo baboyaki koyamba mawa, kasi bakabwanaki mpo na Libela longwa na Bozali ya Nzambe. Kasi ata bongo, basengelaki koyeba yango, oyo Ye azalaki, mpamba te Nzambe nde atiaki Ye wana.

280 Nazali komituna soki lotómo na Ye, na ntango oyo ya nsuka, ezali kosuka ndenge moko, ndenge ezalaki? “Ndenge Tata atindaki Ngai, Ngai mpe Natindi bino. Misala oyo Nazali kosala, bino mpe bokosala yango.”

281 Babúngi, bakokaki kobikisama ata moke te. Baboyáká mawa. Yango nde ezalaki Pull na Ye ya Misato.

282 Sikawa motuna ezali? Pull na Ye ya Liboso, Abikisaki babeli. Boye te? Lotómo na Ye ya Mibale, Azalaki kosakola. Lotómo na Ye ya Misato ezalaki koteya baoyo babungi Libela. Ngomba misato, mpe bongo na bongo; baoyo babungi Libela!

283 Lotómo ya Noa, ntómo nyonso, ezalaki ndenge moko. Noa ateyaki. Ya solo mpenza. Akotaki na masuwa. Mpe ntango akotaki na masuwa, mikolo nsambo elekaki oyo eloko moko te esalemaki. Litatoli na ye eteyaki baoyo bakweisamaki.

284 Sodoma ná Gomora! Yesu alobelaki yango nyonso mibale, ete ekoya. “Liboso na boyei ya Mwana na moto, ekozala lisusu ndenge ezalaki na ntango ya Noa, ekozala lisusu ndenge ezalaki na ntango ya Sodoma.” Alobelaki Noa.

285 Noa azalaki na Pull Misato, mpe oyo ya ye ya Misato, ezalaki mpo na babúngi, nsima na ekuke kokangama. Mpamba te, Nzambe atikaki yango wana, epai moto moko te akokaki kokota to kobima. Bango bazalaki na kati. Mpamba te, (lokola likoló na ngomba ya nsambo) ngomba oyo eleki likoló, ezali kuna nde esika oyo Atiaki masuwa, likoló na ngomba. Bomoni? Boye te?

286 Na mikolo na Sodoma, Pull ya Liboso ezalaki moyengebene Lota. Biblia elobi: “Masumu ya Sodoma ezalaki kotungisa molimo na ye ya moyengebene mikolo nyonso,” bizaleli ya basi wana mpe makambo oyo bazalaki kosala.

287 Bómikanisela: “Pelamoko esalemaki na mikolo na Noa.” Bazalaki kosala nini? “Kolia, komela, kobala, kobalisa.” Basi, bomoni, basi. Likambo nini esalemaki na mikolo na—na Sodoma? Basi.

288 Mpe nsango ya Liboso ezalaki Lota. Batiolaki ye.

289 Na nsima batindaki batindami mosusu, mibale, bakendekei kuna. Ezalaki Pull na Ye ya Mibale mpo na Lota...mpo na Sodoma.

290 Kasi bójala Moto oyo akendekei kuna na nsuka, mawa ezali kofuluka se kofuluka. Na bongo nyonso esilaki, nyonso esilaki na ntango wana. Motindami ya misato wana oyo akendekei kuna, Pull ya Misato, ezalaki Nani? Azalaki na lotómo ya ndenge nini? Afandaki elongo ná baponami, mpe Ayebisaki bango likambo oyo ezalaki kosalema nsima na Ye. Boye te? Kasi ntango Akotaki na Babylone, to na Sodoma, Azalaki na mposa ya komona . . .

291 Ata Abraham, alelaki: “Soki nakoki komona bayengebene ntuku mitano?” Akitaki kino na “bayengebene zomi?”

Nzambe alobaki: “Iyo, luka bayengebene zomi.”

292 Nakoyebisa yo likambo moko, ndeko mwasi, zela moke. Ekoki kozala ete osilá ngala, kasi ozali na eloko moko oyo basi oyo batondá-mposa-nzoto bazali na yango te. Ozali na eloko moko oyo ye akoki kozala na yango ata moke te. Ya solo. Ekoki kozala ete olátaka bilamba esilá ngala, láta lokola mwasi ya lokumu. Bakoki koloba: “Tala motúntuki ya kala wana.” Komitungisa te. Azali na eloko moko oyo mwasi wana oyo atondá-mposa-ya-nzoto, oyo mokili mobimba etalaka ye, kuna, azali na yango te. Akoki kozala na yango ata moke te. Asili kobunga, mpo na Libela. Akweisami. Bomoni? Ye atikálá te. . . Yo ozali na bomoto; ozali na misala malamú. Ye azali na eloko moko te. Azali na mpambu oyo ezali kokanga na motambo milimo oyo ebúngá kino na lifelo. Mokúfi-miso nde akweyaka na motámbo yango. Sikawa, yo ozali na eloko moko.

293 Oyebi, ntango mosusu nkombo na yo ekomami ata na buku ya lingomba te, kasi ntango mosusu bomoi na yo ya sémbo nde ezali kopekisa nkanda ya Nzambe, mpo ébeta mokili lelo. Mokili ekondima yango te. Yo mwasi oyo babengaka motúntuki, yo mobali ya mpamba, oyo ozali na boyebi mingi te, kasi obélelaka Nzambe, butu mpe moi, mpo na masumu ya ekólo, ntango mosusu yo nde ozali kopekisa nkanda yango. “Soki Namoni bato zomi, Nakoboma yango te. Soki Namoni bato zomi!” “Oyo esalemaki na ntango ya Sodoma, ekosalema lisusu.” Bomoni eloko nini nalingi koloba?

294 Ezali te: “Soki Nakoki komona ba-Methodiste zomi, soki Nakoki komona ba-Batiste zomi, soki Nakoki komona ba-Pantekotiste zomi, soki Nakoki komona bapoti-mbangu zomi, soki Nakoki komona ba-senateur zomi, soki Nakoki komona batei zomi.”

295 Kasi: “Soki Nakoki komona bayengebene zomi!” Moyengebene azali kaka moko, ezali Klisto. Soki Klisto, Ye moko, azali kobika kati na bato zomi, bomoni: “Nakoboma yango te.”

296 Kasi Motindami oyo ya nsuka ateyaki baoyo bakweisamaki. Bokoloba . . . Akendeki kuna. Makomi elobi te oyo esalemaki, kasi móto ekitaki na ntongo oyo elandaki, ya solo, nsima na Ye kosala bilembo wana, kaka nsima na Ye kokokisa lotómo na Ye ya lisakoli. “Mpo na nini Sará aseki?”

Alobaki: “Naseki te.”

Alobaki: “Iyo, oseki.” Bomoni?

297 Sikawa, kaka nsima na wana, Akotaki na Babyllone, to Akendeki kino na Sodoma. Atikálá komona bango te, na bongo, móto ekitaki. Amonaki Lota ná bana na ye mibale ya basi, Alobaki: “Bóbima awa sika-sikawa.” Bomoni? Babimaki. Akendeki kuna. Bómikanisela, Azalaki na nzela na Ye kokende kuna. Atindaki naino batindami liboso na Ye, kasi Akendeki kuna Ye moko, ya solo, mpo na komona soki nyonso wana ezalaki mpenza bongo. Mpe Akutaki yango etondi na nini? Na basi bilongi bapakoli-pakoli. Nsango epai na baoyo bakweisami. Basalaki nini? Batiolaki yango.

298 Bazali kosala nini lelo? Ndenge moko. “Nazali mondimi ya ba-Assemblée. Nazali mondimi ya ba-Unitaire. Naza—naza . . . nabíná na Molimo. Nkembo na Nzambe, nalobaka . . .” Malamumu, kende liboso. “Nakokáta suki na ngai soki nalingi. Nakosala *boye*. Nako—nakoloba *boye*. Nazali na ntina ya kozua libatishi na Nkombo na Yesu te. E—etali ngai te, oyo elobami kuna. Kútu, Polo azali mobange moyini ya basi. Ezali . . .” Malamumu, kende liboso.

299 Moko na mikolo oyo, soki osali yango naino te, okokatisha ndelo wana. Okozala lisusu na mposa ya kosala oyo ezali malamumu te. Boyoki oyo ngai nalobi? Ezali likambo monene. Ndeko mobali, ndeko mwasi, osósoli oyo euti kolobama? Okokatisha ndelo wana, mpe okozala lisusu na mposa ya kosala yango te. Okokóba koyoka Nsango-malamumu, ya solo, kasi okoyamba Yango lisusu te. Okoki koyamba Yango te. Kasi Nsango-malamumu ekoteyama na baoyo bakweisami, baoyo babungi mpo na Libela, baoyo bakoki lisusu kobikisama te. Osili kokóma na esika yango, kasi oyebi yango te. Okanisi ete ozali kobika na bisengo, kasi osili kokufa, ata ozali na bomoi.

300 Oh, báyoka. Bango nyonso oyo baboyaki Nsango ya ntango, liboso bákweisama, Nsango-malamumu eteyamaki liboso na baoyo bakweisamaki, liboso bákende; kozanga mawa. Noa, akangamaki na kati, ezalaki litatoli. Nzambe nde akangaki ekuke, nsima na Pull na ye ya Misato. Nsima na Pull ya Misato na Sodoma, bikuke ekangamaki. Mawa ezalaki lisusu te. Bato zomi bamonanaki te. Mpe Nsango-malamumu esilaki koteyama na babúngi, baoyo bakokaki kobikisama te, mpo ezalaki . . . Ezalaki bongo na bileko nyonso, bileko nyonso eboyaka Nsango liboso ésembisama.

301 Basali yango lisusu? Yango nde ntina ya komonana ya Likonzi na Mótó awa na ebale? Yango nde ezali komonisa Nsango oyo ezali kokweisa basi, mpe kozongisáká makambo na bisika na yango, mpe kopameláká batei oyo bazali kozua ngámbo ya denomination na esika ya kotikala na Liloba? Na ntango oyo, Nzambe asili kotatola mpenza ete ezali Ye, mpe ezali na yango te mobola moko boye oyo atángá te, moínga. Ezali Nzambe! Mpe tokómi sikawa na esika oyo Pull ya Misato ekozonga lisusu epai ya babúngi, mpo na Libela?

302 Yango nde ntina emononeli wana epesamelaki ngai, wana nazalaki mwana moke kuna? Nakendeki na Wésti, mpe tala Ekulusu ya wólo, ya Nsango-malamu, ezalaki kuna, kongengáká, ezalaki kotalisa mpenza elembo longwa na Likoló. Bómikanisela, Ekulusu yango mpe, ezalaki na likoló, lokola—lokola pyramide, oyo etongami. Bomoni? Ekoki kozala ete ezali eteni ya motó, esika yango esuki, mpe ebandaki *awa* mpe emati kino na motó?

303 Lokola pyramide, oyo etongami uta na Luther, Wesley, Pantekote, na nsima nde libanga ya motó. Ekoki kozala yango? Soki ezali yango, tokómi wapi? Oyo ekoki kozala yango. Nazolikia ete ezali yango te, kasi esengeli kosalema. Ekosalema. Bómikanisela, ntómo yango esengeli, esanganaka ntango nyonso ndenge moko, moko na mosusu. Esengeli kokóma. Mpe Nzambe abongwanaka te. Bókanisa naino!

304 Bóswa lisosoli na bino na mino ya molimo, mpe bóluka koyeba epai wapi tokómi. Bongo soki ezali yango, kasi yo ozali naino lolenge oyo ozali? Na bongo ekozala malamu kotambola. . . Esili mpo na bino, baoyo bazali libanda. Nsima na Mwana-mpate kozua Buku, Elembo ya Motoba emonisami ná Bilembo nyonso, esili. Ekoki kozala yango. Nazolikia ete ezali yango te. Ekoki kozala yango. Malamu.

Sikawa, yango nde ntina oyo Pull ya Misato oyo eumeli boye?

305 Bótala, Pull ya Liboso ná Pull ya Mibale ekendaki longwa na moko kino na mosusu. Nalobaki yango liboso, bómikanisela, ntango nabandaki liboso, na ntina na oyo ya Liboso. Nalobaki: “Ntango moko ekoya oyo Ekoyeba ata ba-sekelé ya mitema.” Bozali koyeba lisusu? Bato boni? Ee, bino nyonso boyebi yango lisusu, na mayangani na ngai bipai na bipai. Mpe na mpokwa moko, nautaki kokóma, na Regina, kuna, namataki na etumbelo; mpe Ndeko Baxter, kuna, bato nkoto na nkoto. Moto moko amataki na etumbelo, [Ndeko Branham alelisi misapi na ye—Mok.] mpe ekokisamaki. Mpe kobanda wana, ezali kokoba kosalema.

306 Kasi mibu esili koleka kobanda ntango natikaki elanga ya koteya, mibu minei, pene na mitano, kobanda natikaki. Ezali nini? Eloko nini esali bongo? Esalemi nde na ntina wana



lokola na ebandeli, na Genese, na ntango ya “motema molai ya Nzambe”?

<sup>307</sup> Bómikanisela, ntango Asalaki mokili, na mokolo ya nsambo Asalaki eloko te. Apemaki. Bomoni? Nzambe azalaki na motema molai na mobu oyo ya motoba wana, alingaki te ete moto moko ákufa, kasi bato nyonso bákóma na kobongola motema. Nzambe azalaki na motema molai.

<sup>308</sup> Mpe lisusu, na Genese 15:16, soki bolingi kokoma yango, 16, 15. Ayebisaki Abraham: “Kuna, na mokili ya Baamola, lisumu na bango ya nko,” bazalaki bato ya Mabota. “Nakoki kokotisa bino kuna sikawa te, mpo lisumu na nko ya Baamola, ya Mabota, etondi naino te. Kasi Nakosambisa bango. Nakoya na libota ya minei wana, na bongo, Nakosambisa ekólo yango na lingenda ya ebende.” Boye te?

<sup>309</sup> Ntango molai esili koleka, oyo motema molai ya Nzambe, ete lotómo oyo ntango nyonso, na nzela na bande mpe nyonso wana, ekatishi na mokili mobimba, mpo na komona soki moko mosusu azali? Kasi ntango mosusu moto ya nsuka auti kokota. Lisumu na nko nde—nde eumeli boye? Soki Yesu azali ndenge moko, Azali mpenza bongo, Baebele 13:8, Nsango na Ye esengeli kozala ndenge moko. (Nalingi kosilisa.) Misala na Ye esengeli kozala ndenge moko.

<sup>310</sup> Soki Pull ya Liboso ná ya Mibale etiami ntembe te! Ntembe ezali nde na makanisi na bino na ntina na Pull ya Liboso ná ya Mibale? Ekokisamaki ndenge mpenza Alobaki? [Losambo balobi: “Amen.”—Mok.] Na bongo, mpo na nini kotia ntembe na oyo ya Misato? Bomoni? Mpo na nini bokotia Yango ntembe? Nyonso mibale ya liboso etalisamaki na Makomi. Natalisi bino polele na ntongo oyo ete oyo ya Misato mpe etalisami na Makomi.

<sup>311</sup> Bótala mokili, bómona esika ekómi. Bótala ndenge baboyi Solo, mpe ndenge yango esili kotalisama na ndenge esengeli, eteni oyo ya lisakoli. Sikawa tokómi wapi? E Nzambe, yoka mawa! Yango etangisi motema na ngai makila na kati. Ezali ndenge nini? Tokómi wapi?

<sup>312</sup> Bómikanisela, nsóngé nsambo wana kuna, bakoki koyebisa bino. Ezali. . .Nsóngé mosusu ezali te, nsima na yango. Ezali likoló ya bangomba Continental Divide. Ekei kino na lisobe, longwa na esika wana. Seko ebandi. Nsóngé nsambo, likoló ya bangomba Continental Divide mpenza. Ezali mpenza na katikati ya solo ná lokuta. Mpe na nsuka na yango, Pull ya Misato ezalaki Pull ya nsuka na molongo yango. Boye te? Bomoni? Malamu.

<sup>313</sup> Noa akotaki, mpe, bongo nsima na mikolo nsambo, eloko moko esalemaki te, bomoni. Nsima na mikolo nsambo nde kosambisama eyaki. Soki kaka. . .Bóyoka sikawa, mpo na kosilisa. Soki kaka, na ntango ya Noa, báyébaka elembo yango! Soki kaka báyébaka! Sikawa nalingi kosilisa. Soki báyébaka kaka elembo yango, mokili na eleko wana! Mpe, Nzambe

atalisaki yango polele awa, na Makomi oyo touti kotánga, ete Abomaki bato yango.

<sup>314</sup> Azángaki mawa te; mawa etindamelaki bango na nzela ya mosakoli. Balingaki koyamba yango te. Nzambe atóndá na mawa, kasi, Atindaki mawa kasi baboyaki koyamba yango. Atindaka liboso mawa, ntango nyonso.

<sup>315</sup> Bongo soki báyébaka ete elembo yango ezalaki elembo ya ntango ya nsuka? Mpe ntango bamonaki yango, na mbala moko, lobiko esilaki kokende. Moto moko te, bomoni. Kaka, na mbala moko, ekuke ekangamaki. Soki bango. . . Kaka moto moko nde ayebaki elembo yango, ezalaki Noa ná etóna na ye. Yango nde etóna kaka moko oyo eyebaki. Ntango ekuke yango ekangamaki, Noa ayebaki yango. Noa ayebaki ete esili. Ayebaki yango. Ya solo. Soki bóyébaka kaka elembo!

<sup>316</sup> Oh, soki báyébaka kaka elembo yango, ntango bamonaki Moto oyo koya wana, oyo azaláká kuna elongo ná Abraham!

<sup>317</sup> Soki báyébaka kaka ete Billy Graham wana oyo ya mikolo yango, nde akendeke kuna, ye ná Oral Roberts, mpe bateyaki nsango yango na bakúfi-miso wana! Soki kaka báyébaka ete ba-Metodiste ná ba-Batiste ya sembo wana nde bazalaki elembo mpo na bato ya eleko wana, Lóta, masumu ezalaki kotungisa milimo na bango mpenza. Na bongo ba-Metodiste ná ba-Batiste bakómaki eloko nini? Ndenge Lota asalaki, ndenge moko. Kasi bayengebene babimaki kuna. Ya solo mpenza.

<sup>318</sup> Bongo soki ésálemaka bongo ntango Billy Graham akendeke kuna? Mpe baoyo bazali koya kozua mokano, koliáká bazoká, kobétanáka mbata, mpe kosekáká, basi bakati suki, ná bilongi bapakólá-pakólá, mpe bazali kosala ata eloko moko te na ntina na yango. Billy ayaki lisusu mokolo oyo elandaki, mpe alobaki: “Nazui bato nkóto ntuku misato; nazongi nsima na mobu moko, batikali ata ntuku misato te.”

<sup>319</sup> “Oh, nazuaki mokano. Na—na—nakokende na lifelo te; nakokende na Lola, bomoni,” bazokoba kopotana na masumu. Soki kaka bázalaka na. . .

<sup>320</sup> Na nsima, Nsango-Malamu ezali koteyama na Nguya, ná bilembo mpe bikamwa, ná Likonzi na Móto likoló na yango, ná makambo nyonso oyo ezali kotambola mpenza ndenge elobamaki liboso mpe ebongisamaki. Soki bázalaka na. . . Balobaki: “Ezali etóna ya batúntuki. Ezali telepathie ya makanisi. Lolenge moko boye ya molimo ya bondoki. Molimo mabe, Ezali kaka yango. Bómeka kondima Yango te. Ezali kati na ebongiseli na biso te. Tozali na ntina na Yango te.” Soki báyébaka kaka elembo yango! Soki báyébaka kaka!

<sup>321</sup> Yesu alobaki, alobaki: “Soki óyebaka bobele mokolo na yo, Yelusaleme. Soki okokaki bobele kososola! Kasi,” Alobaki, “sikawa, otikali na yo kaka yo moko.” Bomoni? “Soki óyebaka na yo kaka. E Yelusaleme, Yelusaleme, mbala boni Nalingaki

kotia yo na nsé ya mapapu na Ngai, lokola mama soso asangisaka bana na ye, mpo na kobatela yo na kosambisama oyo esengeli koya! Kasi oyebaki mokolo na yo te.” “Yo oyo obomaki basakoli na mabanga, mpe obomaki bayengebene, soki okokaki bobele koyeba mokolo na yo! Soki okokaki bobele koyeba, koyeba Makomi na ntina na yo, mpe koyeba ete boyei na Ngai ezalaki elembo ya nsuka na yo. Sikawa okúfi-miso. Sikawa opámelami. Ntango na yo esili.” Mpe ezalaki bongo. Ya solo. “Soki okokaki bobele koyeba ntango!”

<sup>322</sup> Bótala, ntango Yesu alobaki maloba yango, mokili ekóbaki kaka kokende liboso. Bomoni? Mokili ekóbaki kaka kokende liboso, bo momesano. Mpo na nini? Mpo bayebaki ngonga na bango te.

<sup>323</sup> Mokili ekóbaki kaka kokende liboso, ntango Noa akotaki na masuwa. Mokili ekóbaki kaka kokende liboso. Batioli, na eleko yango, bakóbaki kosala ba-féti ya koyebana nzoto. Bakóbaki kolia, komela, kobala, kosala makambo oyo bazali kosala lelo. Ezali mpenza bongo, lokola momesano. “Ha-ha! Mobange motúntuki wana akangaki ekuke. Sikawa, bosilá koyoka likambo ya ndenge wana? Ha-ha! Boyebi nini alobaka? Ete biso nyonso ‘tokozinda na mai.’ Bolémá! Mai yango ezali wapi?”

<sup>324</sup> Batioli, na mikolo ya Noa. “Ekozala mpe bongo na boyei ya Mwana na moto.” Malamu. Noa ayebaki elembo. Ndenge moko na mikolo ya Lota. Ndenge moko na mikolo ya Yesu. Ezali mpe bongo lelo. Bazali kotiola mpo na mbala ya nsuka . . . ? . . .

<sup>325</sup> Ndenge moko na Sodoma, batikálá koyeba te. Ntango Motindami yango azalaki kuna, ná Nsango kouta na Nzambe, bango batiolaki bango kaka mpe balukaki kosala na bango misala na bango ya mbindo. Boye te? “Yaka kosangana na biso. Kóma moko na biso.” Boye te? “Yaka kosangana ná biso, kóma moko na biso. Okokóma moko na baninga. Yaka kosangana ná biso.” Bomoni? Bayebaki elembo na bango te.

<sup>326</sup> Bayebaki yango te, ntango Nsango yango ezalaki kosakolama, ete kaka . . . Bazalaki komona yango te, ete móto ná nkanda ya kosambisama, lokola Nzambe, ete móto makasi ya sufúlu ezalaki kopela na likoló. Bakokaki komona yango te. Batindami bakokaki komona yango. Ah iyo. Lota mpe ayebaki yango. Ayebaki ete ezalaki wana. Ya solo mpenza.

<sup>327</sup> Kaka ndenge ezali lelo, ndenge moko mpenza. Nkanda ezali kopela, ba-bombe atomique etiami na likoló, nyonso ekómi na nsuka. Ezali ndenge mokó sikawa.

<sup>328</sup> Bótala, baninga, býoka. Boyebaki . . . Bokoloba: “Ndeko Branham, oh, nyonso wana elingi koloba nini?” Boyebi, bato bakoki kokóba koteya Nsango-malamu ndenge bateyaka ntango nyonso, oyo bango babengaka Nsango-malamu, ntango mosusu

ekoki kosila. Basalaki bongo na mikolo ya Noa. Basalaki bongo na mikolo ya Lota. Basalaki bongo na mikolo ya Yesu. Ezali solo?

329 Ata Bayuda, nsima na Yesu koyebisa bango ete nkanda. . . “Esuki mpo na yo. Esili mpo na yo. Eloko ezali lisusu te. Esili mpo na bino.”

330 “Oh,” alobaki, “motúntuki wana. Atángá na eteyelo nini? Moto yango autaki wapi?”

331 Bómikanisela, Abelemaki, na ntango yango, mpo na Pull na Ye ya Misato. Iyo. Ya solo. Alobaki: “Mbala boni Nalingaki kotia bino na nsé na mapapu!”

332 Lota apesaki mbela na ye mbala ya nsuka. . . to, nalingi koloba, Mwanje nde, motindami, nyonso oyo Ye azalaki. Nzambe oyo atalisami na eleko oyo, Nzambe oyo atalisami kati na mosuni ya moto, atalisi elembo ya nsuka, asali mosala ya nsuka. Na ntango yango, nyonso esilaki.

333 Noa ateyaki liteya na ye ya nsuka; ekuke ekangamaki nsima na ye. Esilaki nye. Basekaki yango, mpe batiolaki yango.

334 Bókanisa naino, bato bakoki kokoba koteya! Likita ya Mangomba ekoki kosangana ná lingomba Katoliko, kaka ndenge balakaki kosala. Bibongiseli nyonso ekoki kokende liboso, kasi elembo na nyama esili kozala wana. Bazali kozua yango na kati na yango. Bomoni? Mpe balobaka: “Oh, aleluya, Nzambe ápambolama, bato mingi mpenza babikaki lobi na mpokwa.” Babikaki? “Babinaki na Molimo. Balobaki minoko na sika.” Yango ezali na ntina moko te. Bomoni? “Oh, bazali na bopolo, na kosókema mpe na komikitisa. Iyo, misie. Bazali na mbuma ya Molimo.” Oyo wana ezali elembo te. Ata moke te.

335 Bótika ete nápesa bino mbuma ya Molimo, katikati na Yesu ná Bafalisai, tótala nani azalaki na mbuma ya Molimo. Bongo soki, ndenge nabandaki koloba kala mingi te, natelemeli Klisto mwa moke sikawa? Nzambe álimbisa ngai, ata na ndenge nalobi bongo, bomoni, kasi ezali kaka mpo na kolakisa bino likambo moko.

336 Bongo soki naye koloba na bino: “Eh, bino eyanganelo, nani nde moninga na bino? Nani atalisaka mbuma ya Molimo? Mobange malamumu ya nganganzambe na bino. Nani ayaka kotala bino na lopitalo, ntango bobélaka? Mobange malamumu ya nganganzambe na bino. Ya solo. Nani yango adefisaka bino mbongo ntango nyonso, ntango bozalaka na kpókóso, ná bozángi? Bino bato ya eyanganelo na ye, bokendeke epai ya mobange malamumu ya nganganzambe na bino, mpe adefisaka bino mbongo, boye te? Bomoni? Nani yango azalaka ntango nyonso na bolingu mpe boboto, mpe atalisaka mbuma ya Molimo? Mobange malamumu ya nganganzambe na bino.

337 “Nani yango atángá mibu na mibu, na ba-sinagóga, awa, epai nkoko ya nkoko ya nkoko ya nkoko ya nkoko ya nkoko

ya nkoko na ye autá, kobanda ntango wana kino lelo? Nani yango atángá mpe azuá . . . asálá makasi mpo ázua ba-diplome ya molakisi ná Diplome ya Philosophie ná Diplome ya Droit, mpo na koyeba Liloba oyo, mpe atelemaka awa mpo na koteya bino yango mikolo nyonso ya Lomingo na ntongo na eyanganelo na ye? Mobange malamau ya nganganzambe na bino.

338 “Motúki oyo babengi ‘Yesu’ azali nani? Autá na eteyelo nini? Atángá na eteyelo nini? Kalati na Ye ya lingomba ezali wapi? Azali Moto ya ebongiseli nini?”

339 “Asalaka nini ntango kowelana ekotaka na mabota na bino nyonso? Nani ayaka epai na bino? Mobange malamau ya nganganzambe na bino, mpo na komeka ko . . . Ntango oswanaka ná mozalani na yo awa, mobange malamau ya nganganzambe na bino moto ayaka kozongisa bino na bondeko. Alobaka: ‘Bino nyonso bozali bana na Nzambe. Bosengeli kosala bongo te.’ Yango nde ye . . .”

340 “Yesu ya Nazarete oyo asalaka nini? Apanzaka makita. Asalaka nini? Apupolaka ebongiseli na bino. Asalaka nini? Abengaki nganganzambe na bino ‘mokambi mokúfi-miso ya bakúfi-miso.’ Abengaki ye ‘nyoka kati na matiti.’ Ye azuaki mbeka oyo Nzambe asengaki, akweisaki bamésá mpe abwakaki mbongo libanda, mpe atalaki bango na nkanda. Botikálá komona nganganzambe na bino kotala ndenge wana?” Sikawa mbuma ya Molimo ezali wapi? Ah-hah. Ah-hah.

341 Ezali na kolobáká minoko na sika te. Ezali na kobináká na Molimo te. Ezali na kokótáká na lingomba te. Ezali na mbuma ya Molimo te; bandimi ya Science Chrétienne bakoki koleka bino nyonso, na likambo yango, bomoni, kasi bandimaka ata moke te ete Yesu Klisto azalaki Nzambe. Ezali yango te.

342 Kasi ezali Liloba, ya bomoi! Yango mpenza. Soki bátalaka kaka malamau, Azalaki Masiya. Azalaki Liloba ya bomoi litalisami polele.

343 Mpe mobali oyo azali na Molimo ya Nzambe kati na ye, to mwasi, abikelaka Liloba yango, ebikaka mpenza kati na bango. Bango bazali kobetabeta ya motema, baponami, mpo Liloba na Nkolo eyaka epai na bango, mpe bazali Liloba mpo na bato. “Mikanda mikomami, mitángami na bato nyonso.” Boye te? Ekoki kosalema ete Pull ya Misato esili kobanda?

344 Bato ya bande, ezali bino baoyo bozali koyoka bande oyo, elingaki kozala malamau soki bókokaki kotala eyanganelo oyo sika-sikawa. Ah. Nabanzi ete bozali komiyoka ndenge moko.

345 Bongo soki ezali bongo? Bótala ndenge Makomi etondi awa. Ekoki kozala bongo? Pull ya Misato ezali nde koteya bato oyo bakweisami mpo na Libela, baoyo baboyi Nsango ya lobiko?

346 “Ee,” bokoloba, “lingomba eko . . .” Iyo, bakosala yango. Bakokoba kaka kokende liboso, ndenge moko.

<sup>347</sup> Kasi, bómikanisela, na ntango nyonso oyo, Noa azalaki na kati ya masuwa. Mwasi na libala akangami na kati elongo ná Klisto, mondimi ya nsuka asili kosikolama. Elembo ya Motoba esili komitalisa. Elembo ya Nsambo ezongisi Ye na mabelé. Mwana-mpate ayaki mpe azuaki Buku na loboko na Ye ya mobali, afandaki mpe asengaki bato na Ye, baoyo Asilaki kosikola. Boye te? Ezalaka ntango nyonso Pull ya Misato wana.

<sup>348</sup> Misato ezali bobongi be. Lotómo ekomaki na bobongi be na yango ntango etalisaki lisusu Klisto na nzoto, elongo ná bato, ndenge elobamaki liboso: “Pelamoko esalemaki na mikolo na Lota.”

<sup>349</sup> Oh, bókanisa naino, bato bakoki kokoba koteya, kokanisáká ete bazali kobikisama, kondimáká ete bazali kosala malamú, kondimáká ete ebongiseli na bango ezali kokóla, na ntembe te, kasi elikia ata moke ezali te. Soki emononeli yango ezalaki bongo, mpe soki ezalaki mpenza matata mpo na basi, tosili kokóma na ntango yango. Ekuke ekangami, esili, Buku esili kokóma na loboko na Ye. Bókanisa naino.

<sup>350</sup> Bótika náyebisa bino likambo oyo, liboso tósilisa sikawa. Nazosilisa. Elobamáká, na ntina na Irlande, oyo ezali pene na mbu. Esanga moko ya monene ezalaki mpembeni na libongo, mpe likoló na ngomba moko ya monene oyo. Moto moko azalaki kokende, kotambola kuna mokolo moko, na—na ntango mai emataka. Mpe moto moko ya lokumu azalaki kofanda likoló ya ngomba yango, ayebaki ntango mai emataka. Ayebaki na ngonga nini ya moi mai esengelaki komata. Ayebaki na ngonga nini mai ekomata. Mobali mosusu oyo azalaki komitungisa mpo na ngonga yango te. Azalaki moko na bato oyo bayebi-nyonso. Azalaki na likanisi na ye moko. Ayebaki kopota mbangu, moto ya mayele, mabali ya mayele mingi, kasi ayebaki te ntango oyo mai emataka. Ayebaki étúka yango te. Asósolaki elembo yango te na ntango elongobani, ntango sanza epesaki mabele mokongo.

<sup>351</sup> Mpe ntango Nzambe akolongola mpenza Molimo na Ye na mokili, ndeko, ekosila mpo na yango, nyonso ekosila.

<sup>352</sup> Soko sanza wana elongwe na esika na yango, mai ekozipa mabelé, ndenge ezalaki ntango Nzambe akelaki yango, na Genese 1. Kasi sanza ezalaki wana, mpe soki kaka ebaloli motó na yango, mai ebandaka komata.

<sup>353</sup> Mobange ya bwanya oyo azalaki kofanda kuna, liboso na yango, ayebaki ntango nini yango ezalaki. Oyo mosusu ayebaki te. Atikalá koyekola yango te. Azalaki komitungisa mpo na yango te. Bongo mobange ya bwanya apotaki mbangu, mpe alobaki: “Moninga malamú, komeka kokende mosika te. Zóngá noki. Etutú moko ezali kuna. Okokoka komata etutú yango te. Okokufa. Ba . . . Bilembo ebandi komonana, ngonga ekoki. Ma—mai ekomata mbala moko, mpe okokoka kozonga te. Kokende mosika te.”

354 Kasi moto yango abalukaki, asekaki ye, alobaki: “Kende kotala makambo na yo. Nayebi oyo nakoki kosala mpe oyo nakoki kosala te.” Mpe mai ememaki ye. Bomoni?

355 Ntango mosusu ngonga ekómi mosika, koleka ndenge tozali kokanisa. Bomoni? Ekomema yo. Bókende mosika te. Bómeka kosala bongo te, baninga. Soki bondimelaka ngai ntango nyonso, ete nazali mosali ya Nzambe, bókamata oyo nalobi na ntongo, soki botikálá kondimela ngai. Ekoki kozala ete ntango esili koleka. Makomi mingi mpenza ezali kotalisa yango bongo. Sikawa, bómikanisela, nalobi te ete ezali bongo. Nayebi te. Kasi bótala kaka.

356 Mpe natii mpembeni pene na nkasa zomi awa, oyo nabangaki koyebisa bino yango. Bomoni? Bomoni? Mme Wood azali nzeneneke na yango, ná M. Wood. Ntango nakendeki kotala bango na ntongo oyo, nalobaki: “Na—nakoki koyebisa bango yango te, nakoki kokende teee kuna te. Nakopesa bango kaka Makomi, mpe nakotikela bango yango, mpo ekotiana na bande.” Ekoyebana.

357 Mpe bato bakotiola Liteya oyo. Likambo te, moko na mikolo oyo, nzela ya kozonga nsima ekozala te. Kende na yo liboso, zalá kaka mondimi ya lingomba. Kátá suki na yo, pakólápakólá elongi na yo. Kende liboso, zua “Tata, Mwana mpe Molimo Mosanto,” soki olingi, ete, kómisa yango Ba-nzambe misato mpe zala mopakano. Kende liboso, kangámá na ebongiseli na yo. Sálá bongo, soki olingi.

358 Loba: “Nabínáki na Molimo, nalobáki minoko na sika; nazali na Yango.”

359 Namóná milimo mabe kosala likambo yango moko. Namóná bandoki koloba minoko na sika mpe kolimbola yango; mpe kokoma na minoko eyebani te mpe kolimbola yango; bazalaki komela makila na mokuwa ya motó ya moto, mpe kobelela zábolo, bazalaki kobina na molimo.

360 Ba-Musulman babinaka na molimo, ndenge wana, kino bakoki kozua biteni ya nzete mike mpe komitúba yango na nsé na misapi; kozua likongá mpe komitúba yango na elongi, ndenge wana, mpe kobimisa yango, kasi ata litangá moko ya makila ekobima wana te.

361 Ba-Indien batambolaka makolo ngulu likoló na móto ya centimetre ntuku libwa na bozindo; mpe ya centimetre mokama na ntuku mibale, ntuku libwa to mokama na ntuku mibale na bonene; bafúlaka, bapepaka makala kino móto ékóma pembe; kasi makolo na bango ezikaka ata moke te, kasi baboyaka kondima ete Yesu Klisto azali.

362 Te, te, moninga. Liloba nde elobi bongo. Bato ná Liloba basengeli kokóma moko. Bomoni? Yesu ná Liloba bazalaki moko; Azalaki Liloba. Mpe ntango Yesu azali kobika kati na moto,

yango nde ekomisaka ye ná Liloba ndenge moko. Ezali te... Bomoï na yo etalisaka oyo yo ozali.

<sup>363</sup> Sikawa, mítala na talatala ya Nzambe, lobá: “Nazali ndenge nini na ntongo oyo?” Wana tozali kobondela.

<sup>364</sup> [Ndeko mobali moko alobi na minoko na sika. Ndeko mobali mosusu alimboli: “Bana na ngai, lelo, nalobi na bino. Iyo, ata Ngai, Nzambe na-Nguya-nyonso, nakitisi miso na mabelé lelo. Namoni kino wapi mabe ememi bokelamo oyo. Iyo, Namoni lisumu oyo moto, lelo, azali kopotana na yango. Iyo, oyebi te ete Nasili kosala likambo moko ya monene mpo na yo? Iyo, Nasili kotinda moto moko na ntango oyo ya nsuka, iyo, mpo ázala molobeli mpo na ekeke oyo. Kasi Nalobi na bino, lelo, libota na Ngai, bato mingi batioli nkombo oyo. Iyo, bapesi mokongo na makambo oyo auti koloba. Kasi Nalobi na bino, baoyo bakoyoka Maloba oyo, nakokitisela bango mapamboli minene. Nazali Nzambe na-Nguya-nyonso. Nakofuta, lelo, baoyo bakoyamba Maloba oyo na bosembo nyonso, Nkolo alobi bongo.”—Mok.]

. . . nakendeki mosika na Nzambe,  
Sikawa nazongi na ndako;

Bóbondela, ntango ya kobondela yango oyo!

Fungola mpenza maboko na Yo ya bolingo,  
Nkolo, nazóngi na ndako.

Nazóngi. . .

<sup>365</sup> Wana bozali kokóba koyemba, nalingi kotuna bino likambo moko. Litónó moko ezali na motema na yo, oyo emonani lokola eyindisami na lisumu? Soki ezali bongo, sikawa nde ntango ya kokabwana na yango, sika-sikawa, soki mawa ezali naino.

<sup>366</sup> Nabanzi ete oyo ezali bongo te. Nabanzi ete ekómi kuna te. Kasi ezali komonana lokola ekoki kozala bongo, boye te? Bóyoka oyo Molimo Mosanto auti koloba katikati na bato, nsima na ngai kosilisa: “Ezali Mongongo epai na *bino*.”

<sup>367</sup> Mpe soki ezali, soki ozali na molili na bomoi na yo, mpo na nini oyei awa na etumbelo te, sikawa, wana tozali kokóba koyemba? Sika-sikawa, soki eloko moko ezali kotungisa yo, soki litónó moko ezali, kozóngisa yango lisusu nsima ya mikolo te.

<sup>368</sup> Nákolikya mpe kotia motema ete ezali bongo te; kasi ekozala bongo, moko na mikolo oyo, mpe ekoki kozala lelo.

Sikawa, Nkolo, nazongi. . .

<sup>369</sup> Wana ozali naino na péma na zolo na yo! Soki bato oyo bazali koyoka bande oyo bakokaki mpenza komona oyo ezali kosalema awa sikawa; bato mingi bazali koya, batondi bamoko likoló na bamosusu, bazali kolela mpe koya, kouta bipai na bipai.

<sup>370</sup> Emononeli yango, ntango nazalaki mwana moke, ngonga yango nde ekoki? Oyo nde ntango ya motungisi monene mpe ya nsómo. . . ewelo ezali nde kokelama awa na mokili?



371 Bitumbelo ná banzela, mpe nyonso, etondi sikawa. Soki okoki koya na etumbelo to na banzela te, esika nyonso katikati na bato nkama na nkama awa, telema kaka, soki olobi: “Nalingi kotelema mpe kobondela, mpo bato báyebe,” to kofukama, ndenge nyonso olingi. Oh la la! Sikawa bokoki ata komona moto moko te oyo afandi. Bato batelemi bisika nyonso.

372 Tika ete naloba boye: Nzambe átika te, Nzambe átika te ete oyo nauti koloba ésalema sikawa. Tika ete násosola yango, bino nyonso; Nzambe átika te. Ezali. . . Nazali na bana oyo bakoti naino te. Nazali na bana basi mibale ná mwana mobali moko. Nazali na bandeko mibali. Nazali na bandeko oyo bakoti naino te. Nzambe átika te ete ngolu étika biso; ete nyonso oyo ézala mpenza bongo te.

373 Ngolu ezali naino, Nkolo? Tika ete názala na libunga na oyo, Nkolo. Tika ete ézala bongo te mbala oyo. Ete ngai, ézala bongo te, ete bato bákoba kobikisama. Kokisa yango, Nkolo. Nabondeli, mpe napesi Yo eyanganelo oyo sikawa, na Nkombo na Yesu Klisto.

374 Moto nyonso ábondela sikawa, ndenge. . . Bongo soki ezalaki bongo? Sikawa, nayebi te soki ezali bongo, kasi soki ezalaki bongo? Bondela na ndenge na yo. Bondela mpenza ndenge olingi kobondela. Bongo soki ezalaki solo, tokosala nini, baninga? Tokosala nini? Eloko nini, eloko nini ekosalema? Sikawa bóbondela, bino nyonso. Bélélá mpe—mpenza, bondela ndenge olingi. Bélélá epai na Nzambe, na lolenge na yo moko. E Nzambe!

. . . maboko na Yo ya bolingo,  
E Nkolo, nazongi na ndako.

375 “Nkolo, nalingaki kosala yango banda kala. Nazeli nde ntango mingi koleka, Nkolo? Yango, yango esili nde kosila? E Nzambe, fungola maboko na Yo ya bolingo mpe yamba ngai. Eloko moko na motema na ngai ezali kosenga yango, Nkolo. Fungola lisusu mbala moko. Soki nkombo na ngai ezalaki na Buku ya Mwana-mpate, lobela ngai sikawa, Nkolo. Tika ete náyamba yango sikawa. Nalómbi Yo, e Nzambe.”

Nazongi na ndako, nazongi na ndako,  
Oh, ata moke te (Nakotelengana lisusu ata  
moke te, Nkolo.) esili;  
Fungola mpenza maboko na Yo ya bolingo,  
E Nkolo, nazongi. . .

376 Ntango bakoyeba Yesu, Biblia elobaki ete: “Moko na moko akolela lokola babomi mwana na ye moko ya likinda.”

Nazongi na ndako,

377 Bino baoyo bozali libanda, bino baoyo bozali koyoka na radio na kati ya mituka, bino baoyo botelemi zinga-zinga na ndako oyo, mingi kati na bino, bolalisi mitó na bitutú ya ndako oyo, bozali koloba: “Nkolo Nzambe, yokela ngai mawa.”

Fungola . . .

Bózala mpenza na bosembo, baninga! Bókanisa ntango oyo tozali kobika! Tokómi wapi?

. . . bolingo

Nkolo, nazongi sikawa na ndako.

Nazongi na ndako . . .

<sup>378</sup> Nkolo Yesu, nasili kosala oyo nayebi kosala. Nasili kosala nyonso oyo nayebi kosala. Kokisa, Nkolo, ete bikuke ya mawa ékangama naino te. Bato nkama na nkama, bazali mpenza nkama na nkama, bazali koluka Yo sikawa, longola matóno nyonso ya masumu kati na bango, Nkolo, mpe kótisa bango lelo.

<sup>379</sup> Na—nalómbi, na motema na ngai mobimba, wana tozali komona bobele moto koloba te, kasi, Makomi Yango moko ezali komema biso na ngonga oyo. Mpe emononeli yango, ntango nazalaki mwana moke, namonaki bato yango na lolenge wana; mpe sikawa, kokanisa ete ewelo yango moko, wana mawa esili kolongolama na mokili, mpe sikawa ewelo yango moko ekómi awa, mpe bato, Nkolo, bakómi na lolenge oyo ya kobangisa.

<sup>380</sup> E Nzambe na Nguya, nabondeli, e Nzambe, ete Ósopa mapamboli na Yo likoló na Lingomba Liponámá, mpo bákoka koyamba lo—lotómo ya litatoli, lokola Lota azalaki na yango, lokola Noa azalaki na yango, lokola Yesu azalaki na yango, mpo na baoyo babungi mpo na Libela, soki esili kokóma wana; ete bango moko bátiáma elembo na kati ya Bokonzi na Nzambe, kasi bákoba kotatola ete Yesu Klisto azali ndenge moko lobi, lelo mpe libela. Kokisa yango, Nkolo. Tika ete Oyamba malómbo na biso, wana tolómbi na Nkombo na Yesu.

<sup>381</sup> Bóndela bobele ndenge olingi kobóndela sikawa. Kowela ntango te. Kowela ntango te. Bongo soki yo nde ozali nkombo ya nsuka oyo ekomamaki na Buku?

. . . Nazongi na ndako.

Nazongi na ndako, nazongi na ndako,

<sup>382</sup> Ndeko Neville, kende kobondela mpo na bango. Mokengeli akobondela sikawa, elongo ná bino, wana bozali kobondela. Ngai nakoyemba.

Fungola mpenza maboko na Yo ya bolingo,  
Nkolo, nazongi na ndako.

Nazongi na ndako, nazongi na ndako,  
Nakotelengana lisusu te; (Iyo, Nkolo.)

Fungola mpenza maboko na Yo ya bolingo,  
Nkolo, nazongi na ndako.

Nazongi na ndako, nazongi na ndako,  
Nakotelengana lisusu te;

Fungola mpenza maboko na Yo ya bolingo,  
Nkolo, nazongi na ndako.

383 [Ndeko Neville akobi kobondela: “Mpe tika ete moko na moko, Nkolo, ásepela lelo, mpo Ozali Nzambe-na-Nguyanyonso. Soki oyo ezali bokóbi ya mawa, tika ete ézala bongo mpo na moto, moko na moko mpenza.”] Kokisa yango, Nkolo. [“Tika ete ésalema bongo sikawa, Tata. Mpe tika ete kimia ya Nzambe, oyo elekelaka ntango nyonso lisosoli, tika ete éya lisusu na mitema oyo ezali kozela.”] Iyo, Nkolo. [“Tika ete oyo ézala ngonga yango.”] Iyo. [“Tondimi ete Osili koyoka uta na Likoló.”] E Nzambe, kokisa yango. [“Nyonso oyo ebombami mpo na biso, soki esili, na bongo, Nkolo, toyebi eloko nini nsuka ezali.”] Iyo, Nkolo. [“Kasi, soki te, tika ete Litatoli éya.”] Iyo, Nkolo. [“Tika ete baoyo bayei, tika ete bázia kimia lelo,”] Kokisa yango, Nkolo. [“na nzela na Yesu Klisto. Mpe tobondeli na Nkombo na Ye. Amen.”—Mok.]

384 Nkolo Yesu, nabondeli ete Óbikisa Becky, Sarah ná Joseph, ná bamosusu mpe, Nkolo. Kotika te ete likambo yango ékómela bana na ngai, Nkolo. Kotika te ete ékómela bandeko na ngai ná baninga na ngai. Kokisa yango, Nkolo.

385 Toyebi te, toyebi te, kasi tozali komona likambo moko, Nkolo. Ezali nde elembo oyo eningisami liboso na biso sikawa? Kokisa yango, Nkolo. Benda biso nyonso mpembeni na Yo, nokinoki, Nkolo. Tolingaka Yo mpe tozali na bosenga na Yo. Tata, tika ete Molimo Mosanto ábondisa biso na mitema sikawa.

386 Tobondeli ete tókoka kozala batátoli na Yo na ngonga oyo, mpo toyebi ete likambo oyo esengeli kosalema. Elobamaki liboso kati na bileko, mpe tosengeli kokutana na yango, ete tokómi na ntango ya nsuka, na ntango tozali komona bilembo oyo kotalisama. Toyebi, mpe elobamaki na biso eleki mibu mingi sikawa, ete likambo oyo ekosalema. Sikawa, tokómi komona yango liboso na ekuke na biso, nkanda monene makasi ya Nzambe ezoleka na babalabala, komemáká baoyo bakatami ngenga te. Esika Makila etiami na ekuke te, mwanje ya kufa akobeta; mpe bakokoba kozala na bomoi, kasi basili kokufa, wana bazali na bomoi, kozanga mawa, kozanga Nzambe, mpe bakoki kobikisama ata moke te.

387 E Nzambe, totondi Yo mingi mpo na baoyo babikisami! Ndenge biso. . . Ezali lipamboli monene mpenza na mitema na biso, kozala na kati sikawa, na nsé ya Makila, wana mwanje oyo ya nsuka azali koleka na mboka, komemáká. . .

388 Baoyo bazalaki libanda na makila, bakufaki kozanga mawa. Ezalaki Pull ya nsuka ya Mose. Ya liboso, e—elenge mobali moko azalaki kosolola na Yisraele; ya mibale, akendeki kosikola bango; ya misato, ezalaki nsango ya nsuka. Bikamwa esilaki kosalema, Mose azalaki na nzela kokende na mboka ya elaka, elongo ná basikolami. E Nzambe, yoka mawa, nabondeli, na Nkombo na Yesu.

389 Sikawa, nalingi kotuna boye: Bino baoyo bozali kobondela, bino baoyo bozomiyoka ete bozui mawa, mpe ete (Nzambe) bozomiyoka ete bozali na kati ya Bokonzi na Nzambe, bozali komiyoka ete—ete bopikámi na lolenge moko to mosusu, ete kati na Klisto, ozali na kondima mpo na kondima ete ozali Moklisto, ete obotámi mbala ya mibale, mpe oyebi ete ozali Moklisto, kozanga ntembe. Nakosepela ete bino nyonso bótelema, bino baoyo bolingi yango, bondimi yango, ete mawa yango esili kobakisamela bino sikawa, mpe ete bozali Baklisto, mpe bo—mpe bondimi ete—ete Makila etiami na mitema na bino, mpe—mpe—mpe ete bosili kolimbisama na masumu nyonso.

390 Ezalaki likambo ya matata mingi mpo na koloba na bino. Nazongisi matondi mingi, komona ete bato batelemi na bisika nyonso. Mpe bino, ngai—ngai. . .

391 Nayebi te soki likambo yango ezali solo, kasi esengeli kosalema bongo, mokolo moko. Bomoni, esengeli kokóma na oyo wana, mpe ekoki kozala sikawa. Bomoni? Na lolenge nyonso, mokili ekokoba na yango. Bato bakokoba koya na etumbelo, bakokoba kobelela, kasi ekozala na ntina moko te. Bomoni? Ekosila mpo na bango, bomoni, ekosila nye. Mawa ekozala lisusu te. Bobosana yango te. “Mpe esika na bulee etóndaki na mólinga.” “Ye oyo ezali na mbindo ámiyeisa lisusu mbindo; ye oyo azali moyengebene ámiyeisa lisusu moyengebene; mpe ye oyo azali mosanto ámbulisa lisusu.” Mawa ezali lisusu te, ntango Mwana-mpate azui Buku; ezali bongo, nyonso esili. Mpe ezali komonana mpenza lokola ekoki kosalema sikawa.

392 Ntango mosusu totikali na mokolo mosusu; ntango mosusu lelo nde mokolo yango. Ntango mosusu lobi nde mo- . . . Ntango mosusu mpokwa ya lelo nde mpokwa ya nsuka. Ntango mosusu oyo nde mobu ya nsuka. Nayebi te, baninga. Nazoyebisa bino, nayebi te. Ekotikala kolobelama na ngai te.

393 Kasi ntango Nzambe akozua nkombo ya nsuka oyo ezali na Buku ya Bomoi mpe akosikola yango, nyonso esili. Bomoni, bakoki kobakisama lisusu te, ata ndenge nini. Bakoki kobakisama lisusu te, ata ndenge nini. Esili. Esili nye.

394 Bato boni bayebi ete ezali solo? Malamu. Ezali—ezali solo. Sikawa, lokola tozali komiyoka mpenza. . .

395 Mpe nazali komona losambo oyo nateyaka mpe nakébisaka na mibu nyonso oyo, mpe komona Nsango lokola oyo ete na. . . oyo na—natei na lolenge ya amateur. Mpe bómikanisela, nalobi bongo mpo bósosola yango, lolenge ya *amateur*; makambo mosusu ekokaki mpenza, tóloba, koningisa bino makasi, bomoni. Kasi natiaki yango mpembeni, nakambamaki kosala bongo, mpo nayebi mpenza te. Soki nayebi mpenza te esika nazali kotia lokolo, nakotambola malembe, bomoni, kasi nakoyebisa bino yango kaka.

<sup>396</sup> Bóyoka. Bosepeli te? Ezali na eloko moko oyo ekoki kozala monene koleka, oyo bokoki kokanisa, oyo bosálá na bomoi na bino?

<sup>397</sup> Bongo soki yango esili nye sikawa? Bongo soki nyonso wana esili nye? “Oh,” bokoloba, “Ndeko Branham, ntango mosusu. . .” Iyo, nayebi. Bakoki kokoba kokende liboso. Basalaki bongo, mbala nyonso. Nalimbolaki yango mpe natalisaki yango polele na nzela na Makomi, bomoni, mokili ekobaki kaka kokende liboso, kasi esilaki nye. Bomoni?

<sup>398</sup> “Bolémá ya mateya ebikisaka mobúngi. Ezali bolémá mpo na bato. Ezali bwanya ya Nzambe.” Bomoni? Nzambe azali Molimo. Asalaka makambo na ndenge ya molimo, bomoni, mpo na kosala bikamwa na Ye; na ndenge ya kokamwa. Kasi, tozali bato, tozali na ndelo. Toyebaka te; totalaka kaka oyo tokoki komona. Kasi Eloko moko na kati na biso. . .

<sup>399</sup> Ntango okobima na ndako oyo, awa, soki omóná naino te na bomoi na yo, soki omóná naino pole ya moi te, okoyeba ete obimaki na ndako oyo, awa, mpe mpo na koleka na moi to na eloko mosusu. Molunge ezalaki. Okokaki koyoka yango. Soki ezali na eyokeli moko te ya nzoto na yo mpo na kotalisa yango, okoyeba yango, oh, ata ozangi miso mpo na komona yango. Ata ozangi makoki ya komona banzete ya mobesu, ya komona bozalisi; ata ozangaki miso, ata soko moto moko te atikálá kozala na yango. Okoyeba ete ozali liboso na eloko moko; boyóki na yo ekoyebisa yo yango. Okoyeba yango. Soki nameki koyebisa yo: “Ezali moi. Engengaka. Elakisaka biloko,” bomoni, okoyeba ete ezalaki wana, mpo okokaki koyoka yango na boyóki na yo. Boye te?

<sup>400</sup> Sikawa, toyebi ete Klisto azali awa. Bomoni? Ntango mosusu bozali komona Ye na miso na bino te. Bomoni? Ntango mosusu te. Kasi na nzela na emononeli, nazoyebisa bino, Azali awa. Tozali koyoka Yango. Toyebi ete Eloko moko ezali awa, oyo biyokeli na biso ezali kotalisa te. Molimo nde etalisaka yango, ete Klisto azali awa.

<sup>401</sup> Nazali komiyoka ete Asili kosikola biso. Nazali komiyoka ete bankombo na biso ezali na Buku na Ye. Nandimi ete tosili kosikolama na Makila ya Mwana-mpate.

Nalingi bino, mpe nayebi ete bolinganaka kati na bino.

Oh, ekanganelo oyo esangisaka mitema na biso  
Na bolingo ya Baklisto épambolama;  
Boyokani na bandeko  
Ekokani na oyo ya Likoló.

<sup>402</sup> Tosengelaki ntango nyonso komiyoka bongo bamoko mpo na bamosusu. Bomoni, tosengeli, tosengeli komiyoka bongo bamoko mpo na bamosusu. Bomoni? Mpo, ntango tolinganaka, tolingi Nzambe. “Okoki koyina ndeko na yo oyo ozali komona, bongo óloba ete olingaka Nzambe Oyo omonaka te?” Tosengeli

kolingana kati na biso. “Moto moko te azali na bolingo monene koleka Ye oyo akabaki bomoi na Ye mpo na bayini na Ye, mpo bákóma baninga na Ye.” Oh!

<sup>403</sup> Boyebi loyembo yango, *Ekanganelo Oyo Esangisi Bisó Épambolama?* Ezali kitoko mingi, boye te? Ekanganelo yango épambolama! Okolinga kotindela biso loyembo yango, ndeko mwasi? Koba naino kobeta yango mwa miniti.

<sup>404</sup> Bongo soki esili nye? Bongo soki Pull ya Misato, oyo ezali koya sikawa, ezali mpo na koteya baoyo babúngi? Bongo soki bililingi nyonso ekotalisama sikawa? Mpe tozali na kati, tozali na kati, oyo wana ekozala kitoko mingi, boye te? Oyo nde boyokani na bandeko mpenza!

Oh, ekanganelo oyo esangisi (Oyo nde esalaka yango:)  
Mitema na biso na bolingo ya Baklisto épambolama;  
Boyokani na bandeko  
Ekokani na . . .

<sup>405</sup> Ezalaki nini? “Boyokani na bandeko.” “Tika ete Bokonzi na Yo éya. Tika ete mokano na Yo ésalema.” Bomoni?

<sup>406</sup> Tolukaka kokómisa Nzambe nga—nganga moko boye, mwana ya bitíndá to eloko moko ya ndenge wana: “Nzambe, sálá *boye*, sálá *boye*.”

<sup>407</sup> Yesu alobaki: “Bóbondelaka: “Tika ete Bokonzi na Yo éya. Tika ete mokano na Yo ésalema na mokili, ndenge esalemaka na Likoló.” Na bongo, Likoló ekiti epai na biso, mpe biso—bisó tosili komemama na Likoló, mpe tofandi sikawa na bisika bileki Likoló kati na Klisto Yesu. Bisó nyonso tondimaka ete Nsango ezali Solo, ete Yesu Klisto, Mwana na Nzambe, asíkoli biso.

<sup>408</sup> Tókanga miso sikawa mpe tótombola maboko, wana tozali koyemba yango.

Ekanganelo oyo esangisi mitema na biso  
Na bolingo ya Baklisto épambolama;  
Boyokani na bandeko  
Ekokani na . . . (Koba kobeta yango.)

<sup>409</sup> Sikawa, moto áseka te. Oyo ezali ntango ya koseka te. Na bosembo nyonso mpenza, wana loyembo yango ezali kobeta, tópesana mbote ya loboko ná moto oyo azali pene na yo, loba: “Nzambe ápambola yo, Moklisto,” na bosembo.

<sup>410</sup> Nzambe ápambola yo, Ndeko Neville. [Ndeko Neville alobi: “Ápambola yo, Ndeko Branham!—Mok.] Mibu ntuku mitano na libwa. [“Ezali bongo.”] Nzela molai!

Nzambe ápambola yo, Ndeko . . . ? . . .  
Sikawa tótombola maboko epai na Ye.  
Ntango tokabwanaka,

Esalaka biso mpasi na motema;  
 Kasi tokosangana ntango nyonso na motema,  
 Na elikia ete tokokutana lisusu.

<sup>411</sup> Sikawa tógumba mitó, mpe, elongo, toyebi te eloko nini ekosalema nsima na mikolo, toyebi te soki esili kosila. Nayebi te. Nakoki koloba eloko te. Nakoki koloba eloko te. Nayebi te. Kasi liboso na makambo oyo tosili komonisa na ntongo oyo, tóbondela libondeli oyo Nkolo alakisaki biso. Ata ezali bongo: “Tika Bokonzi na Yo éya. Tika mokano na Yo ésalema.” Tóbondela elongo:

Tata na biso Oyo ajali na Likoló, Nkombo na Yo éjala mosanto.  
 Tika Bokonzi na Yo éya. Tika mokano na Yo ésalema na nsé, pelamoko na Likoló.  
 Pesa lelo bilei na biso ya mokolo na mokolo.  
 Limbisa mabe na biso, pelamoko biso tokolimbisaka baoyo basalaka biso mabe;  
 Salisa biso ete tokweya na masénginya te, kasi bikisa biso na mabe; Mpamba te Bokonzi ezali ya Yo, mpe nguya, mpe nkembo, libela na libela. Amen.

<sup>412</sup> Sikawa, wana togumbi mitema. Biblia elobi: “Bayembaki loyembo, mpe babimaki.” Bómikanisela, ntango basalaki bongo, na Makomi, ezalaki mpo basilaki kobáká na ekululu lotomo ya Pull ya Mibale ya Nkolo na biso, mpe Pull ya Misato elingaki kobanda. Mwa ba-ngonga nsima na yango, Amataki kino na ewelo mpe Ateyaki babúngi oyo basilaki koboya mawa na bango.

<sup>413</sup> Tindela biso loyembo ya *Kondima Na Ngai Etalesi Yo*.

Ko—kondima na ngai etaleli Yo,  
 Yo Mwana-mpate ya Kalvari,  
 Nzambe Mobikisi;  
 Sikawa yoka ngai kobondela,  
 Longola masumu na ngai nyonso,  
 Mpe tika te ete ná- . . . kobandá lelo  
 Názala mobimba wa yo!


Na bomoi, ekotambola ngai na nzela ya molili,  
 Mpe mawa ezingi ngai,  
 Yo zala Mokambi na ngai;  
 Sálá ete molili ékóma pole,  
 Longola nsomo mpe kobanga nyonso,  
 E tika ete kobanda lelo  
 Názala mobimba wa yo!

<sup>414</sup> Nkolo ápambola bino mpe Ángengisa Mwana na Ye mpe ngolu na Ye líkoló na bino. Mpe Nkolo ápesa bino Bomoi na Seko, mpe Ázala na bino awa na mokili oyo, mpe na mokili oyo ekoya

nsima. Mpe, Bomoi na Seko, tika ete bósalela Ye na bileko nyonso oyo ekoya.

<sup>415</sup> Soki ntango yango ekoki, mpe soki tokómi na esika yango, nazali na nsoni te na oyo nauti koteya. Mpe soki motei moko na moko asengeli kotelema elongo ná eyanganelo na ye mpo na kosambisama, ndenge namónaki na emononeli, nazóngisi matondi mpo na Nsango-malamu oyo nauti koteya, mpo ezali bobele Nsango-malamu moko oyo Polo ná bamosusu bateyaki.

<sup>416</sup> Nazali na esengo mpo na bino. Nazali na esengo mpo boyambi Klisto lokola Mobikisi na bino. Bólinga Ye, mpe bóbondela.

<sup>417</sup> Mpe nakomóna bino na nsima ya zángá ya lelo, soki Nkolo alingi, na ngonga ya nsambo, awa na losambo. Nzambe ápambola bino. Losambo esili. 



63-1110M Milimo Oyo Ezali Na Boloko Sikawa  
Branham Tabernacle  
Jeffersonville, Indiana U.S.A.

LINGALA

©2024 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamú ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, koméla:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)